

北京圖書館 編

北京圖書館藏珍本

年譜叢刊



第 102 期


DUXIU.COM

北京圖書館出版社


□ 北京圖書館 編

北京圖書館藏珍本
年譜叢刊

北京圖書館出版社



第 102 册



(清)那彥成編，王昶勘定，盧蔭溥增修 清嘉慶十八年刻本

阿文成公年譜

(卷十八至卷二十四)

阿文成公年譜卷十八

受業

王 昶 勘定

盧蔭溥增脩

第三孫那彥成恭纂

乾隆四十二年丁酉六十一歲

正月十八日

諭曰緬甸自撤兵以來已經八載每歲沿邊派人駐守究屬不成事體而其地水土惡劣朕意又不欲用兵惟嚴令各關隘絕其貿易稍足使之畏懼耳但向來雖有禁遏之名仍恐具文塞責徒爾因循歲月總未能完此事

之局原擬合阿瓦爲雲貴總督前往經理邊務其事庶
可早竣茲據圖思得奏聞得緬酋憤駁已死其子贅角
牙襲職前據該處頭目得魯蘊具稟鎮將等稱情願送
還內地之人輸誠納貢懇請開關隨遣諭來人先回俟
其到關再定今據張鳳街辦事之騰越州知州吳楷稟
稱派送孟矣等出口之擺夷南多木比等回關據稱孟
矣等至老官屯向該頭目綻拉機稱揚大皇帝威德嚴
重及地方廣大富庶光景該頭目甚爲感畏孟矣等卽
日登舟赴阿瓦聞得魯蘊現在阿瓦料理貢物并將蘇
爾相多朝相接往阿瓦要同楊重英俱從天馬關送還

內地并欲親自到關叩懇納貢等語緬匪果知悔罪投誠還人納貢自可就此完事但受降通市及善後章程必須曉事之重臣相度妥辦方能合機宜而符體制著阿桂卽速馳驛前往雲南辦理受降諸事完竣卽行回京至開關以後沿邊一切事宜均關緊要非圖思德所能經理所有雲貴總督員缺著李侍堯調補圖思德著回貴州巡撫之任

十九日

諭曰阿桂現在前往雲南辦理受降諸事著給與欽差大臣關防

二十九日

諭曰

大行皇太后大事阿桂得信卽星馳來京持服現在滇省
尙無緊要之事且一切事宜前已詳諭圖思德無難遵
辦阿桂旣已來京著過二月初七月初祭後再行馳驛
前往

二月初七日

諭曰前據圖思德奏緬夷現有情願還人納貢之信因令
阿桂前往經理茲阿桂因行至直隸境上聞

大行皇太后大事進京叩謁

梓宮畱住數日今已於初八日出京計算阿桂到滇時得
魯蘊早可款關李侍堯圖思德應遵照前旨將得魯蘊
所辦貢物及來使並送還之楊重英蘇爾相等卽行接
受派委妥員送京不必俟阿桂到彼方接收辦理免使
緬夷等心生疑懼其派員送京時途次迎見阿桂所有
辦理情形并沿途行走事宜阿桂原可在途指示料理
毋庸等候此次阿桂到彼重在辦理開關善後事宜已
詳悉面諭阿桂到滇時與李侍堯相度機宜妥辦務使
一勞永逸以崇體制而重邊防

十四日

諭曰據阿桂奏二月十二日內邱途次遇圖思德四百里驛遞奏摺卽遵旨拆看所奏情節及譯出緬文較上次所奏近實辦理亦無錯悞惟得魯蘊不必令其親自來京與俟阿桂到後再辦開關事宜之諭旨未符已於摺內批諭伊果欲親來亦係好事何必阻止蓋緬夷等心多疑懼伊若不願來京原不必強若如所奏伊現在等候象隻親自帶同官人送還之語則是誠心來京朝見自應准其前來且應格外加恩以示獎勵又阿桂所奏緬文內稱將蘇爾相等十餘人接到阿瓦得魯蘊親自送出而於楊重英未經提及楊重英係必應索取之人

但不便因一人未到將蘇爾相等概不接收仍一面嚴諭索取送出毋任稽遲所奏甚是但此時得魯蘊已可到關計阿桂行程到滇尙須時日著傳諭李侍堯圖思德於得魯蘊到關時如伊情願來京卽令其將貢象并送還官人一齊送京不可稽遲觀望阻其仰慕之誠如得魯蘊不願來京伊尙有貢使陪臣卽可令其護送貢物來京至楊重英如未經送出卽一面傳旨嚴諭伊係最緊要之人自應首先送出如不送出仍不准其開關通市等諭迅速發往至阿桂接到此旨亦卽日加緊趕程前進到滇辦理

三月初六日

諭曰據阿桂奏稱看其情形酌量辦理如不肯前來則竟不必差人往催並不必探聽消息惟嚴飭邊關示以不測所奏甚是緬匪狡猾異常而綻拉機尤爲奸猾從前在老官屯時懜駁卽係聽信綻拉機之言以致肆行無忌昨還人進貢之稟看來係得魯蘊意圖藉此開關今已經約定日期忽又翻改未必非綻拉機之意緬匪如此狡詐惟在嚴飭邊關絲毫不許走漏消息亦不必差人催探致得遂其奸計若伊差人及節蓋到關亦應扣留不遣必致全數將人送出方准開關放還緬日著傳

諭阿桂李侍堯到彼務須悉心會商嚴密妥辦毋庸差人催探以防緬匪等畱住探聽消息並應嚴問其節蓋孟幹等如此反覆究屬何心總之辦理外夷諸凡舉動當示以威嚴不可稍露遷就完事之意阿桂李侍堯均係能辦事之人詳籌妥酌自合機宜

初八日

諭曰滇省銅運前據戶部奏額運京銅開行延緩請將管廠各員並專轄之司道以及從前奏報不實之督撫查明議處當經依議允行並傳旨申飭圖思德令其明白回奏並令李侍堯裴宗錫妥議具奏矣今圖思德復以

瀘店並無底銅另請展限此摺若批交部議該部必按例議駁於籌辦銅務全局不能實有裨益今李侍堯已赴新任阿桂亦在滇省兩人皆能辦事之人著卽傳諭令其會同悉心通盤籌畫將此後如何採辦足額籌備底銅充裕以期趕赴例限不致厥運各員再有短少遲延之處悉心妥議據實具奏

二十六日

諭曰今日據阿桂李侍堯等奏先後行抵雲南省城面商籌辦緬匪事宜內稱圖思德所奏得魯蘊遣孟幹等到關藉詞象隻未到並請差官赴馬脖子與節蓋說話經

提臣等將孟幹暫畱飭令跟役先後前往曉諭節蓋不敢進關迄今尙未據圖思德等知會消息計此時瘴癘盛發目下已無可辦前說似覺荒唐臣等卽起程前赴永昌察看情形面商另奏等語所奏是已於摺內批示矣蓋開關通商一事自圖思德以至滇省文武官民人等無不願爲想因適有得魯蘊遣人來稟遂皆聳聽稟報圖思德輒據以入奏經朕洞灼情僞明晰諭知今果不出朕所料至進貢還人之事係得魯蘊先遣人稟知何以中途反覆藉詞象隻未到又添出與綻拉機商量情節並請差官赴馬脖子與節蓋說話等種種支離謬

妄可惡已極此事係得魯蘊先發其端並非自我而起
今節蓋既不敢進關朕意以爲竟應或用計或用力使
幹弁帶兵一二百至馬脖子將節蓋拏進關內詢以得
魯蘊何故如此說謊其意竟欲何爲訊得實情卽應將
節蓋畱住另遣伊手下明白夷目回緬曉諭得魯蘊等
以此事從前緬匪敢於將蘇爾相等措畱則此時拏獲
節蓋畱住實所應當况此次貢象還人之說由爾等先
行具稟今忽又反覆豈有不拏人究問明白之理如此
傳諭詰問得魯蘊等諒亦無可置辯卽因此復生事端
伊如果敢於侵犯邊境則正可乘此機宜以逸待勞大

加懲劄滇省兵力亦儘可辦理蓋進兵往緬則尙限於地勢氣候恐徒傷病我人故不肯用兵若彼旣離巢遠來至我邊境則剿殺實不爲難朕意定以如此辦理著傳諭阿桂李侍堯悉心籌酌一面辦理一面奏聞自古中國之駕馭外夷自應示之以威令其懾服則可保邊境寧謐若稍存將就姑息之見則是示之以弱未有不因此受害者此理甚明恐啓邊衅乃漢唐宋無能爲之言非我大清國全盛時之言也阿桂李侍堯等皆通達事務之人自應見及於此圖思德常青各有本任事務今緬匪現在旣無可辦之處畱駐於彼亦屬無益自應

各合同任

四月初三日

諭曰前此屢經傳諭阿桂李侍堯令其悉心籌辦得魯蘊等差人進貢並往拏節蓋一事此時諒可陸續接奉相機妥辦矣前因圖思德等奏得魯蘊約定日期貢象還人確鑿有據是以專差阿桂赴滇辦理開關受降等事而善後事宜則非圖思德所能辦因特調李侍堯爲雲貴總督董率文武實心妥辦並令阿桂於受降事後將關隘應行查覈各章程告之李侍堯酌量妥辦阿桂卽可回京昨據阿桂奏緬匪迄今尙無信息目下瘴氣盛

發已無可辦前說似竟荒唐等語則從前圖思德所奏
實被通省文武商民人等聳愚冀圖將就了事露其端
倪致得魯蘊等窺破翻行捏說欺朦而圖思德等復爲
所愚耳至昨降旨令阿桂或用計或用力選派幹弁帶
兵一二百至馬脖子將節蓋拏進關內審問確供在天
朝體制自應如此但節蓋果否實在馬脖子地方殊難
深信且馬脖子距老官屯不遠似無令節蓋在彼獨住
之理不過飾爲此言欲誘內地官員出外復爲羈畱耳
此等情形阿桂自能籌度妥辦如因瘴氣已盛兵弁難
以出關阿桂自亦能悉心酌定若得魯蘊旣無消息而

節蓋之事又難往拏則阿桂在滇亦無可辦之處若駐
畱永昌坐待緬匪納貢誑言更覺不成事體阿桂只須
將交彼會同李侍堯辦理之事告明李侍堯及查辦銅
鹽諸事完畢即可回京至於嚴守關隘設法稽查及每
年無庸多派提督等統兵防邊之處其大綱細目阿桂
自當與李侍堯面爲酌定卽起程來京李侍堯素稱能
事自必實心籌辦且以本省總督在彼專辦則事權歸
一更可期有成效李侍堯諒能善體朕心不負委任也

初九日

公偕李侍堯奏言竊臣阿桂仰蒙

聖諭馳赴滇省辦理緬甸事務星夜兼程前進嗣於途次
屢遇圖思德奏函遵

旨拆閱得悉緬匪狡詐反覆情節極爲可惡因恐該匪所
稱進貢還人等項竟屬荒唐不特事勢驟難完結
且有關前奉明發

諭旨晝夜殫思不能遽得善策及抵雲南省城與臣李侍
堯面晤熟商此事全局彼此所慮正復相同臣等
再四籌畫實未能得有把握就現在情形而論惟
聞緬地四大萬內有渺萬機者係贅角牙之妻父
而孟團係渺萬機之用人遣往馬脖子催探信息

節蓋等卽遣伊同孟幹入關遞稟當被羈留嗣渺
萬機向節蓋索取節蓋頗露情急是以節次遣出
跟隨蘇爾相之兵丁蔡世雄汪有才及通事寸博
學懇求放回孟團臣等現飭羈留不遣於辦理機
宜頗有裨益又昨據緬匪稟內詢及蠻暮木邦土
司現在是否存活其情更屬可惡臣等當代提臣
等擬作檄稿譯出發去大意以蘇爾相揚重英等
在內地本不足重輕並不必欲索回其送還與否
無關緊要以折其居奇之心且計臣等已抵永昌
該匪等必風聞總督業令臣李侍堯調任臣阿桂

又復一同到邊必有用兵征剿之事而檄內轉置不提但辦理愈加嚴正覺與向時所辦忽復一變俾致不能揣測庶幾疑畏交生送還蘇爾相似尙稍有機會俟送出後仍應扣留孟圍等勒送楊重英或可得有端緒目下節蓋等在馬脖子一帶觀望_臣等雖不便前往張鳳街等處致似將此事看成重大日內卽往騰越州以便遇有提鎮不能卽得主見之處就近指示

公又奏言

_臣接奉

諭旨以前次緬稟專係得魯蘊一人此次譯出緬文又有

綻拉機名字明係綻拉機從中作梗齜角牙偏聽其言
若果如此則得魯蘊計議不行必心生疑懼或可乘此
機會設法招致如果得魯蘊帶其所轄木邦人衆前來
投誠亦係好事朕必加恩賞以官職且可得緬匪真實
信息查得魯蘊並非木邦管事之人聞其向居阿瓦管
理自阿瓦至老官屯沿江一帶事務綻拉機亦係
帶兵防守頭目聞伊二人不甚和睦不出

聖明所料但得魯蘊在彼位分頗優家計亦好非至家破
身危不可自存未必卽肯輕受招致若果所辦事
務一切計議不行自必稍生疑懼或可乘機設法

招致亦未可定誠如

聖諭只可如治病偏方

臣

等現在密加訪詢如有可以相

機辦理之處務卽設法辦理均奏入

諭曰據阿桂李侍堯等奏緬匪近日大概情形並現在辦理各緣由頗合機宜已於摺內批示矣緬匪反覆狡詐實爲可惡大約得魯蘊尙欲送人完事而綻拉機阻之圖思德等又露有招致之意致被賊識破遂爾屢變其說果不出朕前旨所料至摺內稱三月初五日緬匪差孟合持緬稟同原隨蘇爾相之兵丁蔡世雄汪有才前來譯出緬稟有問及蠻暮木邦土司之語又三月十五

日綻拉機差碎凍具稟同通事寸博學進關請遣回孟
幹孟團阿桂等將蔡世雄汪有才寸博學等畱住又以
孟團係緬匪任用之人現飭羈畱不遣所辦甚是至緬
稟內忽詢及蠻暮木邦土司現在是否存活顯係不肯
將蘇爾相等卽行送回故問及兩土司下落欲圖彼此
對換其詭惡伎倆尤堪髮指阿桂等擬作檄稟旣直折
其居奇之心且辦理邊務與向時忽復一變俟送到蘇
爾相後卽扣畱孟團等再行勒送楊重英深合制馭賊
匪之道此外亦別無辦法其稟內復請差人至馬脖子
與節蓋說話而節蓋則不肯令其進關明係欲誘內地

官員到彼復行畱住阿桂等自必不爲所惑輕率差人前往至彼差來之人則應拘畱不遣一應書稟概置不理使縱拉機等一切奸詭伎倆無可復施俟其果有悔心竇欲送人納貢再行相機妥辦前令阿桂馳往永昌原因得魯蘊等有進貢還人之語今緬匪卽屢變其說前稟之誑捏顯然阿桂斷無因賊匪欺飾無據之談在邊等候之理現在發去回檄若緬匪翻然畏懼實欲還人完事阿桂察其確切卽酌將此事辦畢再行回京若回檄去後別無信息或仍以空言搪塞阿桂在彼久駐亦不成事體前諭阿桂等派兵一二百往拏節蓋馬脖

子既距關不遠此時雖有瘴氣諒不甚盛阿桂審度節
蓋如果在彼業已派兵往拏則阿桂俟辦完其事再行
回京若其事亦屬難行阿桂酌量在彼並無可辦之事
卽遵前諭將應辦邊隘各事宜與李侍堯面論明晰卽
可起程回京不必速行至孟團旣係緬匪得用之人阿
桂可帶其來京以備訊問其送回隨蘇爾相之兵丁蔡
世雄汪有才及通事寸博學等亦著一併帶來

二十一日

公偕李侍堯奏言緬甸邊務經久未結誠如

聖明所諭終非完局而辦理之法不外招誘征剿兩策招

誘既易致居奇征勦又礙於水土兩策俱驟難得
手本年春間得魯蘊屢次遣人遞稟籲請還人進
貢似屬機事可乘迨臣阿桂奉

命赴滇會同臣李侍堯並辦此事而賊匪又早已更變實
出情理之外臣等現駐邊境雖賊情詭譎非常全
無把握但體察得魯蘊初起情形其欲送出蘇爾
相等似非全假特被夥黨阻撓遂爾狐疑首鼠迄
今尙無就緒然屢將兵丁通事遣送入關又將蘇
爾相送至馬脖子綻拉機節蓋等現住彼處未回
似有難於退回之勢倘有機會可乘或致坐失不

但_臣等赴滇受降奉有明發

諭旨事難結局且_臣等皆身受

主恩至深至厚雖稍涉棘手非至殫竭心力輒諉於時勢
漫不悉意籌畫此中實不能刻安_臣等愚見此時

賊匪正在遲回觀望若遷就招徠固萬萬不可而
相機設法隨時辦理自屬_臣等必應竭盡之心總
以無妨

國體不長賊志爲主奏入

諭曰阿桂等奏籌辦邊務緣由一摺已於摺內批示矣據
稱賊匪正在遲回觀望若遷就招徠固萬萬不可而相

機設法隨時辦理乃臣等必應竭盡之心總以無妨國體不長賊志爲主等語所奏自屬正理阿桂亦只可如此籌辦前已傳諭阿桂如賊匪竟無信息阿桂自不值久駐邊境等候或已發兵往擒節蓋俟其就擒再定行止否則將應辦邊隘事宜面與李侍堯講論交其妥辦阿桂卽可起程回京計阿桂等拜發此摺時尚未奉到前旨阿桂此時如尙有機會可乘自宜悉心籌度若賊匪仍似前此之荒唐狡譎竟不必視以爲事倘賊匪復差人來投文稟卽將來人拘禁或釋其中之無用者一人驅逐歸巢其稟總付之不答並嚴飭邊隘不許內地

附錄卷之二
民人攜貨偷出此外亦更無別法至令阿桂赴滇受降
雖已明發諭旨今賊匪反覆變更前說盡屬誑語其曲
自在賊匪不足重輕阿桂卽遵前旨回京原屬無礙

二十三日

諭曰大學士舒赫德於二十二日病故其員缺自應阿桂
補放但定例大學士缺須俟一月後始行降旨現在滿
大學士無人阿桂卽行起程回京

二十六日

公偕李侍堯奏言查進貢還人之事前經得魯蘊
屢次遣人遞稟懇求旋卽托詞象隻未到繼復請

差官赴馬脖子與節蓋說話前必以反覆實出情理之外臣等初據稟報卽不勝憤懣疾恨聞節蓋等僅帶五六百人在馬脖子原擬酌派兵弁以與之講話爲名臨時脅勒交還稍有支吾卽將節蓋等一併掩捕進關再行計較嗣經探明綻拉機等陸續添帶多人立柵嚴防而該處一線山梁形如馬脖子兩旁陡陂深曲本係該匪巢窟門戶在老官屯外最要隘口臣阿桂向曾經歷其地記憶形勢若輕兵撲取恐不能得手是以再四躊躇商令員弁相機設法試辦於本月初七日奏

附錄卷之三十一
聞在案今接奉

諭旨或用計或用力早蒙

示及_臣等萬里之外籌辦情形

聖明洞鑒真如燭照也伏誦

諭旨自古中國駕馭外夷示之以威令其懾服則可保邊

境寧謐若稍存將就姑息之見則是示之以弱未有不

因此受害者誠制馭外夷至當不易之要領_臣等蒙

皇上教導多年受

恩深厚此等關鍵稍能領會一二况以

國家全盛之力因其水土惡劣蘇爾相羈畱在彼業已

數年我

皇上尙未肯輕於用兵此時若可擒拏節蓋等賊更何所
顧慮惟該匪性雖狡詐情實恇怯所恃者僅氣候
毒癘一端此番賊目送人旣占負嵎之勢又竭力
隄防非單兵可以輕試若果離其巢穴侵犯近邊
則飛速調集各隘分駐之可以打仗兵丁亦尙有
二千內外儘可盡力截殺而以賊平日之畏葸計
之當不敢出此竟可毋庸多慮特其奸狡性成忽
似悔禍忽似激我用兵實堪髮指除俟續有機會
卽遵

旨辦理外合將奉到

諭旨緣由先行

奏覆奏入

諭曰前此賊人懇請開關納貢送人之說屢經反覆固係得魯蘊計圖自利先發其端而綻拉機又別懷自私之見阻撓反悔其曲全在於賊亦由圖思德聽屬員聳恿遷就完事不免粉飾其詞此時俱可毋庸深論而賊匪與禽獸無異更不足與較現在既無一可辦阿桂即可回京

二十七日

諭曰前據圖思德奏稱本年正月內得魯蘊差孟幹孟團
致送禮物並稱欲將蘇爾相等送回隨遣其出口傳令
得魯蘊親來及至二月孟幹孟團復進關稟稱象隻未
到現今節蓋四人在馬脖子等候求差官到彼說話令
將孟幹孟團扣留嗣據阿桂等奏稱孟團係贅角牙妻
父渺萬機之用人遞稟懇求放回現飭拘留不遣各等
情因孟團係緬匪得力之人曾諭令阿桂帶其進京以
備質訊今思得魯蘊忽爾捏詞欺誑嗣後反悔情節甚
爲可惡其中原委孟團必知其詳阿桂等卽應將其嚴
加刑訊詰以緣何反覆之故令其據實供吐勿任狡飾

况從前賊匪既敢將內地差往之蘇爾相擅行鎖鑠此時將孟團嚴行訊鞫庶少解恨而此等么麼匪衆令其多受痛苦又何足惜著傳諭阿桂李侍堯卽將孟團嚴加刑訊取具確切供情先行迅速馳奏仍派委妥幹員弁將孟團鎖鑠解京並飭沿途撥兵護送嚴加管束毋致稍有疎虞

二十九日

公偕李侍堯奏言前在軍營時聞憎駁有母頗知恭順但彭理所云不可違背天朝之語並無憑據今亦不知其存否加恩獎勵之處似可不辦再潞

江等處現派員稽察倘有江楚客商至彼均不許
出口奏入報

聞

五月初五日

公偕李侍堯奏言竊照緬目屢次遣人進關遞稟
前後各情節節經恭摺奏

聞在案

臣等接據提鎮稟報偵知緬匪納貢還人之事雖

有綻拉機從中阻撓而得魯蘊致送鎮州禮物前
後差出緬目緬衆十有餘人遣回內地兵丁通事
三人而綻拉機又與蘇爾相同至馬脖子似猶有

出送之意是以尙思設法試辦茲於本月十五日
續接稟報綻拉機節蓋等已將蘇爾相由馬脖子
退回賊巢蓋詭詐狐疑本屬緬匪習與性成而該
頭目又復各挾私心互相猜忌遂至轉輾支吾終
歸虛謊但該匪等既已退回則已全無可辦若再
行試探致露遷就完事情形恐轉爲賊所輕視尤
於

國體攸關當飭張鳳街一帶各兵卽行撤回以避炎瘴
并嚴諭各邊弁目不可稍露內地端倪亦不可再
與緬匪稍通言語正在辦理適奉

諭旨令

臣

阿桂將邊關一切告知

臣

李侍堯銅鹽諸事會

辦完竣卽行回京查得魯蘊此次遣人納貢之說

上年冬間初據圖思德奏到卽蒙

降旨不可輕信今年正月復據奏報似已近實而我

皇上轉卽將圖思德調撫貴州令

臣

李侍堯調任雲貴

臣

阿桂奉

命赴滇復面承

諭旨緬目如果出於誠心應准其納款如尙詐僞則將交辦諸事料理完竣卽行回京賊中一切詭秘狡詐情事

早蒙

睿照無遺今閱數月終不出

聖明預料實非尋常臆測所能仰窺萬一臣等現提扣雷

之緬目孟幹等到騰越訊供並俟提臣常青海祿
回至騰越將嚴飭關隘稽查出入各事宜及每年
毋庸多派提鎮駐邊諸務再面爲諮詢酌定章程
卽馳回省城會辦銅鹽事竣臣阿桂卽遵

旨起程回京奏入報

聞

十一日

公借李侍堯奏言滇省永昌以外在在與緬匪壤

地毘連自乾隆三十四年以後每年提鎮或四員或五員常領將備弁兵前往隴川蓋達張鳳街三臺山及各關隘地方分路駐劄皆於秋間出防至次年夏初撤出撤後各處仍酌留兵一二十名至數十名不等歲以爲常但各處雖與緬境相近其實么麼小醜恇怯無能數年以來從不敢稍近邊圉實不值多派提鎮分駐防範查提督係全省統轄大員所有通屬考驗武職整飭營伍全資料理若常川駐邊其本任應辦事務不無轉致曠廢卽各鎮總兵亦有專闔之任未便過半派令出防查

提督原有巡閱之責每年秋間應令到邊巡歷一次如有應辦事件卽駐彼辦理如無要事卽回大理駐劄衙門辦事臣李侍堯亦於冬初赴各邊親行巡察以資整飭至滇省總兵共有六員除騰越鎮係本管地方普洱鎮有本境巡邊事務此外尙有四鎮應請每年輪派一員幫同騰越鎮分駐巡查請於本年爲始卽照此辦理現在提臣海祿已回至騰越飭令總兵喀木齊布卽回本任只畱吳萬年一員協同本鎮劉國樑駐劄照料至每年出防兵丁共撥派四千五百名雖皆騰越鎮本標及

所屬永昌龍陵各協營兵丁但爲數旣覺過多而離各兵營汛自數站至十餘站不等歲歲駐邊半年有餘不敷更番輪替難以休息亦應裁減惟近日適有得魯蘊籲請通關之事今年若驟行裁撤恐緬匪聞與向年迥異妄揣竟已忘情於彼亦未妥善酌擬今秋駐兵數目暫照向年辦理乘便審度地勢酌量於南甸現駐眷兵以外氣候較好地方展接營汛安置卡堡俾與張鳳街等處聲勢聯絡將所有分駐之兵漸爲裁減則每年旣無出防名色而各兵亦得輪流休息矣至封關禁市雖不

能制緬匪死命而藉此可杜奸民擺夷潛出邊外
透漏消息則關隘不可不飭

功令不可不嚴查緬匪與內屬擺夷種類相近而內屬
擺夷又與沿邊漢民居處相錯凡夷地所產賤則
魚鹽棉花貴則碧霞璽翡翠玉葱玉夷漢相因出
關私販向所常有前任督臣彰寶欲嚴絕其弊奏
請盤獲各犯卽予重辟乃立法不爲不嚴而弊竇
不能盡絕蓋以沿邊小民只圖覓利未曉刑章而
有等無識官吏又視爲法重情輕難免卡兵得錢
私放官弁含糊開脫臣等酌議嗣後應請量爲區

別凡拏獲私販審訊明確自三人以下者合與流徒自四人以上者外遣若多至一二十人以上爲首者正法從犯外遣倘有因此透漏消息者無論人數多少審實卽

奏明正法關口員弁或有失察故縱情弊查出分別從重治罪如此則犯必懲而法必行庶可杜絕弊端又查外省民人寄居滇境與外夷商販者江西湖南人爲多尤宜嚴爲禁止但滇省幅員遼濶各屬遠距邊境自數百里至二三千不等其間山川迴互道路岐錯在在可以出入沿邊各處雖有七

關八隘之名其實長坡廣岫汗漫綿延稽察殊難
周密惟查永昌有潞江一處順寧有緬寧一處皆
爲各邊總滙之區應特派員弁專司稽察遇有江
楚客民卽驅令北回其向來住居近邊之人由來
已久或耕或販覓利營生若概行驅逐致若輩同
時失業無以餬口亦屬難行應交地方官查明現
在共若干戶男婦共若干口仿照內地保甲之例
編造寄籍冊檔登記年貌互相保結並照向例嚴
禁與附近擺夷結親締姻如有進關回籍等事俱
用互結報明官給印票關口驗明放行回滇時仍

驗票放出若無印票卽屬新來之人概不准以探親覓友等故藉辭出外如各員弁混放偷漏查明叅處至沿邊各處如永昌騰越順寧緬寧南甸龍陵一帶所有本籍民人保甲亦應一體嚴爲稽核毋許混匿江楚客民有則從嚴懲治又緬匪需用之黃絲等貨概不許其販至潞江緬寧隘口該處俱照內地稅關木榜式樣刊刻木牌榜示路口如有私販出關者查出將貨物入官本犯究處以上數條所有嚴飭邊關事宜大綱亦不過如此所謂有治人無治法惟在奉行妥善方有裨益奏入得

旨如所議行

十二日

公奏言現在緬匪之事已無可辦理臣將嚴飭關隘各事宜與常青等商定到省約畱數日俟會辦事竣即將孟幹碎凍親帶回京至通事寸博學兵丁蔡世雄等已於本月初十日解京奏入報

聞

十四日

公偕李侍堯奏言前在騰越商辦邊關事竣於四月二十六日拜發奏摺後即起程回省二十九日

接據提督海祿總兵吳萬年來稟有聞得緬夷又欲送出蘇爾相等之語臣等卽暫畱永昌本日復據該提鎮稟稱緬夷於二十七日差頭目孟美等四人跟役十人伴送蘇爾相等多朝相及兵丁吳志益等五名到虎踞關並持有緬表及象牙檀香緬布嗶嘰等物當派守備李澣前往接收現將緬目暫畱張鳳街派員將蘇爾相於二十八日起身護送前來等語查緬匪雖狡詐殊常難以情理揣度但前蘇爾相等至馬脖子已踰數旬忽爾退回今又突然送還大約前因給回檄內有人貢若不到

關斷不再通言語之諭既而呈送緬稟到關竟擲還不理且前聞臣等到邊並不聲張已生疑慮及伊等退回又置不問轉將駐兵撤去不發一辭竟無端倪不能窺測緣由遂至疑怯兼深始行送出臣等現合提督海祿酌畱應撤駐兵一二起以壯聲勢並將緬稟詳細譯出看其辭意如何乘機勒獻表貢送還楊重英并訊取蘇爾相等供辭以便派員送京奏入

諭曰阿桂等奏緬目送還蘇爾相等現在接收辦理緣由一摺其事甚奇緬匪既反悔前說何以忽行具稟還人

且蘇爾相既經賊匪帶回因何復又送出其故殊不可
解諒不能因此別藏狡譎伎倆必因阿桂等前次擲還
原稟置之不理邊境又並不聲張轉將駐兵撤去絲毫
不露端倪賊匪無從窺測故有此舉抑係得魯蘊於緬
甸齧角牙處訐告綻拉機將其撤回得魯蘊始行其志
無虞掣肘因得復踐前言亦未可定今蘇爾相等既送
至永昌阿桂等可卽向其詢明賊匪此次反覆緣由先
行具奏仍速派人將蘇爾相等卽行送京並諭以伊從
前原係奉差前往被賊羈留本無過失且聞其曾屢次
欲尋自盡情頗可憫到京後尙欲加恩令其不必憂懼

途中並毋庸鎖解卽令伴送之員同其由驛來京至前
曾傳諭阿桂等合將緬匪頭目孟團嚴加刑訊細究賊
匪因何反悔之故原因賊匪屢變前說實堪髮指孟團
係緬匪得力之人自應將其嚴鞫令吐實情並使其多
受痛楚稍可解恨今緬匪旣將蘇爾相送回則孟團卽
可無庸嚴訊卽派委妥員押解來京之處阿桂李侍堯
亦可酌量若無可問處則亦不必解來矣至所稱將緬
稟詳細譯出看其詞意如何乘機勒獻表貢並送還楊
重英等語自應如此辦理緬匪忽將蘇爾相送出其心
必生疑怯此時乘機勒令將楊重英送還諒彼必不敢

違拗若果將楊重英送出並進表納貢原可准其開關
通市完此一事設或提及蠻暮木邦土司之說則竟當
嚴飭看其動作若何再行定奪總之外夷性情若窺見
內地稍存遷就之意卽視爲奇貨可居詭詐百出若內
地付之不理彼無從揣測必惶惑懇求此乃一定不易
之道阿桂李侍堯自能見及於此措置必合機宜也况
前此圖思德常青等一聞得魯蘊之信卽欲將就完局
意存見好轉爲賊匪所窺事多反覆及阿桂李侍堯到
後堅拒不理賊匪忽爾還人或轉可因此完事可見辦
理此等要務惟在準酌得當不可稍設成心而爲公爲

私總不能外乎天理圖思德常青此時能無深悔乎至阿桂現在既有應辦之事自應暫駐永昌與李侍堯會商妥辦若其所約日期尙遠卽又不值在彼久待卽可回京入閣辦事惟在阿桂自行妥酌而行

十五日

公奏言緬匪狡詐可恨正將孟團等鎖押提訊以紓拘禁蘇爾相之恨因蘇爾相已送出現將孟團孟幹碎凍三人羈禁勒取楊重英奏入

諭曰旣送出蘇爾相則此三人扣畱以待勒取楊重英可也

二十三日

諭曰阿桂著補授武英殿大學士管理吏部兼管正紅旗
滿洲都統事務

又

諭曰前據阿桂等奏緬目送回蘇爾相等現在接收辦理
俟蘇爾相到彼後訊取供詞並緬稟詳細譯出看其詞
意如何乘機勒獻表貢及楊重英看其許約日期遠近
再定行止等語所辦甚好已詳悉傳諭矣阿桂等前摺
於五月十四日奏到距今已經十日何以尙未見續奏
張鳳街距永昌不遠蘇爾相等行走需日無多因何尙

未將訊供緣由具奏或係阿桂等卽欲乘此機會向緬
匪勒獻表貢並索取楊重英俟檄諭後再行奏聞然亦
當迅速具摺何故稽遲若此著傳諭阿桂等速將現在
辦理情形迅卽覆奏至緬匪等雖已將蘇爾相多朝相
送回若不奉表悔罪納貢及送還楊重英尙不得謂之
誠心款服未可許其開關通市倘因其已經送還蘇爾
相等遽弛關禁又似中國遷就完事未免爲賊人所輕
阿桂李侍堯俱係歷練有識之人必能相機妥辦也今
日已降旨令阿桂補授大學士管理吏部事務著阿桂
自行酌量如緬匪許約奉表伏罪納貢還人之期較近

阿桂在永昌辦畢此事再行起程若所約之期尙遠自
不值在彼久待一切事務交李侍堯妥辦阿桂卽可起
程回京入閣辦事

二十八日

公奏言據孟美等供送還楊重英及貢象須五十
餘日方有回信其事妥否尙在未定現在邊務無
可辦理俟宣慰等事辦竣卽行回京奏入報

聞

六月初六日

諭曰據顏希深奏湖南吏治情形所稱州縣佐雜調委過

多之處已明降諭旨交顏希深查辦矣至所奏上司既明以姑息市私恩下屬漸以逢迎開捷徑地方之廢弛公事之闕茸未必不由於此等語果爾則湖南吏治幾不可問必當徹底確查以定其言之虛實阿桂由滇回京湖南乃必經之路著於過湖南時嚴密查訪果有廢弛闕茸實蹟卽行據實具奏諒阿桂必不肯稍爲徇隱也

初九日

諭曰阿桂已於五月二十二日自永昌起程與李侍堯沿途商辦銅務此時想已自省城起身所有飭令緬匪送

遷楊重英及奉表納貢各事宜李侍堯自能酌量妥辦
至阿桂李侍堯會奏安插各土夷及仍復車里土司二
摺已批交軍機大臣會議具奏自可照覆其安插之人
有應改徙烏魯木齊等處者李侍堯務須選派妥幹員
弁小心管押並仿照從前押解廣西省偷越安南人犯
之例沿途添派兵役護送勿致稍有疎虞又另摺所奏
自應卽行嚴查妥辦但據稱此皆十三版納夷衆不忘
刁氏情形之語殊未明晰土夷自相刼殺與不忘刁氏
情形何涉著李侍堯卽將其故詳晰覆奏此旨著由五
百里發往並令阿桂知之緬匪如有遣人續稟情形仍

著李侍堯迅速具奏

公偕李侍堯奏言雲南省向有邊外夷人安插各府居住乾隆四十一年十月經調任布政使朱椿奏請預籌生計奉

硃批所奏似有所見待朕徐酌之本年二月又經督臣圖思德奏請改徙江安等省安置奉

硃批待朕徐酌之並非刻不可緩之事臣奉

命赴滇時面奉

諭旨交臣會同李侍堯查明酌量辦理臣等到滇後卽稽

核舊案悉心體訪滇省歷年以來邊外投入內地

土司土目及緣事安插各土夷戶口共有一十九起計男女八百餘名口從前安插地方離邊遠近不等內惟臺彝臺闡安置九龍江係沿邊地方旋有逃竄出境之事其次則臺丙等四戶安置寧洱地方距邊亦近經前署督臣圖思德奏准遷移江西安插在案現在各起夷戶雖距邊較遠可無逃竄之虞但從前內附緣由本有不同目下安置情形亦覺稍異必須量爲分別辦理庶可一勞永逸查有木邦土司線襄團眷屬一百二十餘名口又蠻暮土司瑞團眷屬五十五名口又孟連土目線

管孟及伊子罕凹眷屬七十三名口以上四起夷人原置永昌蒙化漾濞等處居住嗣經奏請移往大理府城安插均經撥給房屋並公用官莊田畝取租以資棲止養贍該處係腹裏地方距邊已幾千里非若臺彝等居住密邇邊陲可比伊等現皆樂業安居不致復萌逃竄之思卽有一二夷匪起意潛逃而地方驚遠夷漢異類挈眷遠行亦必被兵役拏獲且伊等俱係緬甸土司被其侵凌欺侮拋棄土地來歸若令轉輾遷移致同遣徙情形亦殊失

聖主懷遠綏邊之意臣等酌議此四起夷戶應請毋庸移動但其屬下土夷及媿僕丁壯等既久住內地若任其坐食安居終不能與商民無別應令查明如有情願耕種地畝者卽於原給附近大理之官莊內量爲撥給田土學種佃種其有年力精壯情願入伍食糧者卽准其入伍當兵俾得隨營操演管束如此再歷數十年卽可無異土著又有本頭人臺猛高景線頭目邵那賽猛八土目茨管猛等三起眷屬共六十餘名口向因其不可深信移令省城安插居住此兩處夷戶雖各經撥給房屋田租

但恐將來孳生日衆難以經久應請仿照從前自
安南投出之黃公纘家口遷徙之例遵照面奉
訓示改徙烏魯木齊等處安插居住給與地畝佃種俾各
就生計又耿馬土司之姪罕朝璣孟連土司刁派
猷猛郊土舍衍傑等三起家屬共三十餘名口向
來安插省城居住給予養贍但查該夷等均係土
司近族當日因挾嫌爭控適值緬甸有事之時恐
其乘機逃竄特令移入內地安插迄今已歷多年
有本身已故止存妻孥者亦有嫌隙漸消業經和
好者應請行知各該土司令其具結領歸本處團

聚又戶撒夷人黃國賓老乖老夢三起係窩畱夷
匪十餘名口尙在省城安插給與孤寡口糧以免
饑餒但究未完結將來仍須另辦此項人口均係
罪人妻孥應照妻孥犯子孫賞給功臣家爲奴之
例辦理惟人數無多不值送京分賞擬將滇黔督
撫及滇黔兩省曾經出兵之提鎮銜各開單進

呈伏候

皇上點派就近分賞將來各自帶回亦可完案此外尙有
大山頭目族姪阿隴一名原係哈國興帶進關內
居住永昌現在訊據自稱聞伊父母已故無家可

歸永昌娶有妻室不願歸還故土又腊撒海拉夷僧賽亞撒拉及徒弟喇萬二名現在大理府城三塔寺住持管束均係單身夷僧業經安插妥協亦均可毋庸議徙奏入下軍機大臣議行

公偕李侍堯又奏言普洱沿邊十二版納地方從前原隸車里宣慰司管轄嗣因刁維屏父子兄弟被人逼脅棄職潛逃遂行裁汰於茨通改設專管各猛土弁夷人俱歸鈴東臣等伏查茨通地方卽係雍正年間前督臣鄂爾泰所建攸藥營此地瘴氣最盛是以前督臣尹繼善

奏准撤歸思茅以避瘴癘茲自乾隆三十九年前督臣
彰寶請以茨通專設普安營以來都司已瘴故二
員原設兵丁四百餘名每年瘴故者不下百餘人
其餘亦多染病委頓支離以殘瘠官兵孤懸江上
殊不足以制各猛而壯邊威且該營兵丁缺額無
人應募每於隣近各營撥補頂充近年來各營招
募兵丁亦恐移撥普安俱視爲畏途絕少應募而
車里地方周圍四百餘里山箐居多路徑叢雜惟
九龍江實爲控險扼要之門戶十三版納中尙有
猛阿猛籠猛遮三處住居江外緊連外夷野性難

以移易又與江內之各猛聲息相通內地派官實不能檢制於江外日久恐滋事端蓋夷民性雖蠢魯情頗專一非世轄之士司未能遽服其心查車里夷衆爲刁氏管領已歷二十四代夷衆不忘思舊臣等悉心籌議惟有急爲更正撤去普安營汛俾官兵脫免瘴鄉仍復宣慰土司俾夷衆有所統攝查普安營弁兵其自景蒙營移來者仍令回至本營安設惟元江營現有官兵九百五十餘名足資彈壓而思茅營地處極邊距九龍江爲最近應將自元江移往兵弁添設思茅以資控制但思茅

廳城地狹人稠城外尙有寬廠隙地可以設營請將該城稍爲廓葺以便增建衙署兵房爲添移弁丁棲止之所併入思茅遊擊管轄統聽普洱鎮節制其所造普安營署舍卡房旣於必不可久居之地創立專營且未及三年業已朽壞其從前之錯誤草率已可概見應責令承辦之員及各該上司將前項動用銀二萬七千餘兩攤賠追繳卽以爲添建思茅弁兵房署及廓修城垣之用至革土司刁維屏舉家潛逃之後曾委普籐土弁刁應達暫管宣慰司印務一時夷衆俱不肯受其鈐制而刁

氏查無近支可擇惟有乾隆四十年間同刁維屏自行投誠之刁士宛現在羈禁省垣雖係維屏親弟但從前被召猛乃威脅渡江刁士宛曾經投江求死爲匪黨撈救捆縛隨行實非得已嗣又苦勸其父兄投歸內地伏罪覈其行跡尙屬夷類中奉法異罪不敢負恩之人而刁士宛亦頗以此見信於夷衆仰懇

聖恩賞給刁士宛宣慰土司之職專管車里土司地方必能壓伏夷衆以靖內外各猛之心至刁維屏以世襲土司棄職潛逃雖復悔罪投回未便亦予省釋

應仍羈省城所有該宣慰私莊八處向係額徵錢糧嗣改土練爲屯田卽將私莊八處給予屯田以抵口糧今仍給還宣慰召人耕種悉照向例每年與夷民地畝按數徵解秋糧赴思茅同知衙門交納刪去屯兵名目仍作土練歸該宣慰管轄并飭該文武員弁嚴禁兵役騷擾以及往來勾結種種情弊奏入下軍機大臣議行

十一日

公偕李侍堯奏言臣等查滇省每年辦運京銅六百三十餘萬乾隆三十年以前湯丹碌碌等廠凡

乙年應運之銅俱係甲年預先發運分爲四運八起定例本年八月開幫次年二月掃幫其四五六七等月正值川江水發不能開運則趕運陸路銅筋以備開幫立法本爲妥善斷難再議改移而瀘店存貯底銅以備臨時撥運更爲第一要務自乾隆三十一年至三十七年各廠出銅六七百萬至八九百萬不等短數過多所存底銅又節次撥給外省採買并墊發沉失等銅全無存貯而歷年所用之銅不下一千一百餘萬以致移後補前運限遞年遲悞甚至夏月亦報開幫浸失從前立法之

意至三十八年以後產銅漸旺然亦低銅爲多如湯丹大水等廠高銅仍屬撥運前督臣彰寶撫臣諾穆清李湖先後奏請或撥運尖山廠銅以爲瀘店備貯或撥運七新廠柴板大功廠蟹壳以添補京運無非欲補足正運之後餘爲籌貯底銅起見而運限仍未趕復依舊遲逾者總緣前此之虧短本多卽有撥運銅筋實非一兩年內遽能補足正運之限署督臣圖思德咨覆戶部查取三十九年候運職各文內所稱乾隆三十一年起至三十九年止應辦運京等項銅共五千四百二十四萬七

千餘觔實在湯丹等廠發運并各項撥運過銅五千一百一十五萬七千六百餘觔外尙不敷銅三百八萬八千九百餘觔按冊清查數目符合是三十一年之運尙有預支四十年所解之銅更何能籌及底銅而自乙未年起又奉准催解截留掛欠等銅四百餘萬分作五年每歲帶運八十餘萬則銅數加多輓運又需時日此丙申一運之所以更遲也前署督臣圖思德奏請酌展定限原屬實在情形查丙申年額運京銅自上年十月頭運一起開幫後截至今年三月頭運二起二運一起始行

掃幫其第二運二起已報開兌惟三運加運四起
銅筋現值夏令川江水漲未便開行卽設法趕運
亦必須秋杪始能埽數所有本年丁酉年額銅斷
難八月開幫卽將廠運各員從重叅處亦無裨於
實政然如圖思德所奏以丁酉之銅改至戊戌年
正月開幫則爲時太久運限更難趕復且所稱每
年七月埽幫亦於夏月江漲必須避險之處未經
籌及應請將現在丙申年未經開運各起嚴行催
督勒定本年十月全行掃幫其丁酉年京運務限
十一月開幫次年八月底埽幫戊戌年京運限十

月開幫次年八月初埽幫已亥年京運限九月開幫次年三月埽幫庚子年京運趕復八月開幫次年二月埽幫如此分別定限三四年後即可趨歸原限惟是趨催京運固不便遲逾而採辦銅筋又須撥變各廠產銅之少蓋由前揭蟹壳須純用松炭邇年以來近廠松木採燒殆盡須赴數十里至一二百里外購辦陸運抵廠一遇雨雪馱運阻滯每致停爐以致京運不能迅速且恐日久用多遠處松柴亦將採盡斷難久恃伏查各省鼓鑄俱用柴板惟京局內解運蟹壳取其色紅質薄便於椎

鑿傾鎔雍正九年部議沒銅八成以下者不准收
兌其餘俱照賍色估收乾隆三年議定每百觔加
耗銅八觔如不及八成責令原解之員賠補乾隆
二十五六年等年搭解大興廠柴板銅六百餘萬其
後又辦解尖山九渡籌新廠柴板三百餘萬俱經
部准因湯丹大水碌碌茂麓四廠向來辦揭蟹壳
不將柴板運京部局無從驗其高下是以乾隆三
十七年前撫臣李湖奏請改解柴板未經准行茲
臣等提驗該四廠所出柴板挑出鮮亮質薄亦如
蟹壳成色在八四五以上若將此項柴板挑出運

京則湯丹廠可辦蟹壳一百四十餘萬柴板二百
萬碌碌廠可辦蟹壳五十餘萬柴板八十萬大水
茂麓二廠可辦蟹壳三十餘萬柴板三四十萬此
外大功廠現在出礦少薄擇高礦煎揭尙可得蟹
壳四五十萬加以樂馬人老山箭竹塘長發坡永
巖坊紹感溪金沙大屯白凹等小廠向撥京運銅
十一萬有餘通計每年應得蟹壳柴板五百八九
十萬又寧臺廠近年出礦較旺至二百八九十萬
內亦有腥分較高之礦該處松炭尙近可煎揭蟹
壳七十餘萬惟色澤稍次而提溜純淨亦堪撥充

京運統計每年足敷六百三十餘萬之額仍責成各該管道府就近經理查驗於銅元之上鑄明廠分方准撥運如有黑厚板銅率行搪塞及運員含混接收一經部局查出將廠運各員及督辦之道府一併叅處著賠似此通融辦理採辦較易第瀘店底銅若以本年所產銅筋供運本年京局不籌儲備埽幫仍恐逾期滇省現有舊截京銅及補解運員沉失共銅四百二十餘萬除分年帶解外尙未完二百八十餘萬此項銅筋雖係運京正額不過解還歸款旣非鼓鑄急需合無仰懇

皇上天恩俯准暫行緩解卽以此二百八十餘萬運交瀘
店以作底銅數年之後存積有餘卽行照數分年
補解以清舊額至上年裴宗錫圖思德等先後陳
奏以銅價不敷廠力拮据請將從前裁撤之九十
一爐盡行復設并收回一分通商之銅加卯鼓鑄
每年獲息一十六萬餘兩以爲加價之用并查明
各廠油米積欠十七萬八千餘兩卽於加價銀內
分作三年扣收經部議展作六年以紓廠力奉
旨允行在案但查現年所產銅筋實不敷盡開九十一爐
之用是以雖議添爐現在未能一律開鑄則添爐

之息既缺加價之款尙懸况查乾隆三十三年因滇省用兵運脚不無濡滯蒙

恩軫念民力賞加銅價六錢自三十八年奏准通商始行裁減而爐戶獲沾餘利採辦踴躍遞年獲銅均在一千二百四十五萬上下迨上年停止通商官爲收買獲銅轉止一千一百五十二萬有餘盈縮懸殊情形益見是加價不如通商更有明証臣等酌擬於九十一爐內停鑄四十爐及四十一爐之各半卯又省局新加之二十五半卯一併暫停歲可節用銅一百六十餘萬仍以一分通商較爲便利

其畱存添復之五十爐座核算每年所獲鑄息除
去各廠油米及原議分年帶完積欠十七萬八千
餘兩外尙有贏餘暫存司庫遇有應需調劑之處
再行

奏明動用其原議加價概行裁撤奏入下部議行

公偕李侍堯奏言滇省給發兵餉向例銀七錢三
分每兩總以一千二百文爲率嗣因省城錢文
積貯議請加搭二成原爲便兵起見但查滇省年
來錢價遞賤各處市價每兩自一千二三百文至
一千五百文不等若照一千二百文定數搭放則

兵丁轉致吃虧且各標鎮協營離局遠近不同如武定營例赴省城領給普洱各營例赴臨安領給相距較遠該營等遣弁赴局領到錢文必須自雇騾馬馱回本營糜費腳價未免賠折應請嗣後市價每兩換錢一千二百文以內准照向例搭放如在一千二百文以外照數悉給銀兩不准搭放錢文至離局較遠各營概令一併給銀如該本營自願搭給錢文者出具印領仍依一千二百之數照例搭放庶兵丁領餉不致暗中虧折矣况現在酌議減去錢局爐座另摺具

奏則錢文可無壅積之虞兵餉更無庸加搭臣等因查

辦銅筋事宜籌議及此奏入下部議行

公偕李侍堯奏言緬匪幼酋新立又與暹羅等國

連歲搆兵上年聞蕩平金川因商辦還人貢象後

因檄諭嚴正屢次擲還稟詞益知畏懼此決計送

還蘇爾相等之實情也奏入報

聞

二十二日

命調補鑲白旗滿洲都統

七月初二日

公奏言臣於六月十七日行抵湖南首站之芷江縣地方接奉

上諭據顏希深奏湖南吏治情形一摺著傳諭阿桂於過湖南時嚴密訪查竊照本年春間臣奉

命赴滇道經楚省係晝夜兼行不能接見地方官吏一切

竟無由聞悉茲自滇回京初入湖南省站即奉到

諭旨臣

一路留心密加察訪但地方之果否廢弛政務之

是否闕茸惟視刑名審斷錢穀收支其見於外者

僅有文報驛站二項今臣所過湖南地方多係大

路州縣距省甚遠所見官吏亦屬無多刑錢案牘

無從查核其文報一項尙無稽悞惟沿途驛站夫馬不無竭蹶然自乾隆三十三年臣赴滇過楚時情形卽係如此並非始自今日再細訪敦福官聲尙無不好其在任時小心謹慎亦肯辦事惟識見游移才力柔弱間有悞信屬員之處而查其闕茸廢弛却無實跡可據至州縣佐雜調委過多之事誠如

聖諭不獨湖南一省爲然卽如雲貴二省似此調署者亦復不少蓋緣逃兵處分一項州縣到任後扣足一年如有未經緝獲之犯卽行降調離任每年接緝

之員皆復如此上司或因人材起見或因降調太多將屆一年每卽委調他處相循輾轉遂至爲數漸多又衝途州縣遇有差務不無稍費輒以偏僻地方牧令互相委調酌量通融以均苦樂雖與例不合尙係私中之公然衝途如此卽簡僻之缺亦借名互調州縣如此卽佐雜微員亦相因委署其中瞻徇情面亦恐有所不免奏入

諭曰前因顏希深奏湖南州縣佐雜調委過多曾明降諭旨令該撫查辦并諭阿桂於回京時沿途畱心體察茲據阿桂覆奏此事不獨湖南一省爲然卽如雲貴二省

緣逃兵處分一項州縣到任後扣足一年如有未經緝獲之犯卽應降調離任上司或因人材起見或因降調太多卽委調他處相循輾轉遂至爲數漸多等語是各督撫之遞相調署專爲屬員倖免處分卽此可見其事君不以誠矣州縣緝獲逃犯定例四叅限滿降調原准其出具考語送部引見卽云逃兵處分綦重一年屆期未獲例應降調此等尙係公過該督撫等如果以人地實在相需奏請保畱朕亦無不量度情形俯如所請何必因此巧爲設法委調紛繁致蹈欺飾之咎卽如王倫案內之逸犯歸太劉煥通緝數年至今未獲可見各州

縣之不能實心任事然亦未嘗因此罷斥一官則督撫等又何必爲此過慮乎現據阿桂另摺奏稱酌定章程已交部議奏矣嗣後各督撫務須一秉至公毋再輕爲更調倘敢仍蹈前轍致滋流弊必將該督撫從重治罪公又奏言各省州縣佐雜不得調署別缺及輾轉更署如必須將實缺州縣調署者將因何調署緣由並委調若干員按季造冊咨報上季之冊下季到部如有遲延將該督撫藩司照例議處奏入下部議行

十六日

諭曰阿桂係滿洲大學士其行走班次自應居首至漢大學士亦應有在前之人于敏申行走班次著在阿桂之後高晉之前

十七日

命充

玉牒館

國史館

四庫全書館正總裁

二十日

命充文淵閣領閣事

二十三日

諭曰現在纂輯平定兩金川方畧大學士公阿桂著一同
閱辦

二十六日

命充經筵講官

是月回京

八月十九日

諭曰金史世紀著派大學士公阿桂悉心檢覈分條編輯

十月初六日

命調補鑲黃旗滿洲都統

初七日

命管理戶部三庫事務

四十三年戊戌六十二歲

四月十九日

命充殿試讀卷官

閏六月十四日

命管理理藩院事務

七月十三日

命兼署兵部尚書事務

十四日

諭曰大學士公阿桂父阿克敦伊子又名阿迪斯及阿彌
達雖俱係清語究屬三代沿用恐其家遂以阿爲姓因
令自伊孫始名首不必沿用阿字蓋滿洲原有姓氏而
通行乃其名字著交八旗各省將軍都統副都統等通
諭各官兵令各遵奉

二十日

上詣

盛京恭謁

祖陵

命畱京辦事

十月初四日

諭曰國史館恭輯

開國方畧著大學士公阿桂同辦

十一日

命在總請達上行走

是年十月第二孫那彥寶入學

十一月第四孫那彥住生子阿迪斯出



阿文成公年譜卷十九



受業

王昶勘定

盧蔭溥增脩

第三孫那彥成恭纂

乾隆四十四年己亥六十三歲

正月二十日

諭曰大學士公阿桂差往河南查勘辦理善後事宜及賑
卹情形著卽馳驛前往所有隨帶司員俱著一併馳驛

二十一日

諭曰昨據袁守侗等奏籌辦善後事宜一摺恐所辦未必

得寔因差阿桂前往查勘并面諭一切矣今復思伊等所請辦之儀考時和驛楊橋黑堤各堤岸工程俱於二月初一日興工三月初十日以前完竣爲期僅一月有餘而欲辦十二萬餘兩之工縱上緊趕辦亦恐不能如期歲事况水土工程最難考覈其挑挖成河者一經放水卽已無踪可尋至提岸各工合龍後設復遇河水漫溢又誘之異漲難防遂得藉口以肆其浮冒此乃工員長技並恐尙有不止于此者姚立德鄭大進皆有應賠之項爲數不少或工員欲於上司處獻勤藉做工爲名從中侵扣以貼補其賠項則爲弊甚大更不可不徹底

根究朕非欲爲逆詐億不信之事但高樸一案竟出情理之外不得不以此揣度矣昨曾籌度及此未得面諭阿桂因復詳悉諭知著阿桂到豫後密爲訪查如其中果有情弊卽據實具奏

二十四日

公奏言臣於二十二日早間在望都縣途次接奉上諭昨袁守侗等奏籌辦善後事宜一摺爲期僅一月有餘而欲辦十二萬餘兩之工恐不能如期蒞事竊查河工堤岸關係民生

皇上念切痼瘼凡遇應做之工雖用至數百萬帑金從不

稍有惜費且惟恐臣下意存見小屢奉

訓言此

臣

所朝夕敬聆者第工程必期堅固既不應聽其

徒費無裨而借端冒銷寔不肖工員之長技更不
可不爲嚴察今袁守侗等所奏應修儀考等處堤
岸需費十二萬餘兩而爲期僅四十日且桃汛正
屆旣似太遲伏秋二汛尙遠又似太早誠恐不無
藉工冒銷而姚立德鄭大進又俱有應賠之項或
屬員思欲借此爲之貼補獻勤尤不可不切寔訪
究但現在虛實無憑難以懸揣臣因思河工夫價
一名每日約銀數分以十二萬兩之銀分作四十

日計算每日應用夫五六萬名既定於二月初一日動工則目下必已向各處調夫供役並須分派多員經管承辦此共見共聞之事無難查詢且姚立德等辦此大工藩司榮柱係通省大員派官調夫亦不能不令其預聞而榮柱又非不曉事之人現在鄭大進已奉

旨調任藩司與屬員最親其中有無情弊自必知之甚真臣於入河南境後即可向各處畱心密察並於到開封時不必露出端倪只將此事原委及現在辦理情形向榮柱詳加詢問則可以得其大概至臣

行走兩日已抵正定若瘡疾不致發動每日夜總
可行二百里計該處興工之先可望必到屆時卽
親赴工次詳悉履勘更不敢稍有掩飾如果察有
可疑而又不能得其實在情節再行密詢袁守侗
令將何人主意因何伊亦列銜會奏之處實告知
以憑奏

聞辦理奏入報

聞

二月初三日

公奏言臣於途次接准二十二日欽奉

上諭此時設或尙未葺工或臨時復有更變袁守侗等且不必勉強支持俟阿桂到工商酌多一人心思庶不致有舛誤伏念臣素未諳習河務凡於沙水堤岸形勢不能洞悉原委卽一切做工下埽之法亦尙未目覩試驗固不敢強不知以爲知但豫省漫口合龍久稽時日以致上煩

宵旰臣心每切不寧今臣旣赴工次自必一體訪求以期早得葺事臣昨於途次接袁守侗信方以此次形勢頗順可冀早晚竣工不意二十八日臣未到工次之先於本日寅刻東西兩壩俱復有衝去之事

因卽馳往閱看新做之工共衝去四十餘丈缺口
寔深八丈且全河水面不過四十丈而大溜已占
寬八丈有餘緊靠南岸由漫口直走看來此處施
工殊爲費力臣反覆推原其故因正河河底本屬
北高於南以致溜勢自上游而來卽順南岸之堤
直逼堤根而所開引河引溝又俱在漫口之下水
已先由漫口旁溢則引河卽不能掣溜詢之姚立
德及南河工員因附近河灘別無可開引河之處
是以不得已如此辦理但此處旣屢築屢衝卽再
用力施工終屬毫無把握自不如在上游另尋減

水之法庶此處始可著力臣雖不能諳悉形勢當竭盡心思詳加討論上緊圖一可望有成之策以冀無悞要俟一二日內卽公同商酌另行迅速奏

聞奏入

諭曰袁守侗等奏二十八日寅刻東壩門埽忽又壑塌直衝西首正壩水勢愈猛至黎明時逐段鬆動共塌開口門四十八丈等語此亦無可如何並據阿桂奏二十八日午刻已抵工次一二日內卽公同商酌一可望有成之策再行迅速奏聞等語阿桂此行竟似朕有先見者大工屢辦未就多一人心思於事自屬有益看來此次

所辦工程既用兜袖之法理應穩固何以復有螻場之處或兩壩雖如法兜做而所下之埽本不甚寬壩身不能厚寔雖層層壓土而不能逐個幫鑲在急溜中勢仍單薄易於搖動故不得力或當於下埽時設法幫厚不知其事可行否試詢之南河諸工將備悉心講求之至朕連日所疑者總在順堤北之攔黃壩似大溜至此不能下注激迴溜勢趨逼南岸口門甚足爲患其受病自在於此業已兩次傳諭令伊等妥酌而行阿桂可卽勘度情形並與袁守侗等詳細講求如應從急則治標之法切勿憚於改絃著卽速妥議具奏至該處屢次施工

未就總由口門之水太深下埽猝難到底且新開壩根沙性浮活水每從根搜汕翻花不可不思變計乃於急溜洶湧之中屢屬菱礎與水爭勢徒費工作而不能收功實爲失算蓋漫口之下業經大溜跌落刷深勢不能冀其復淺而水過沙浮日久愈甚亦不能使之堅實是在彼處施工終屬無益朕意或於口門外距隄稍遠擇水勢平緩處所另行接隄築壩較之在漫口下埽難易若何可熟酌爲之若可行當於口門收小時或用兜袖之法必應兩壩較今壩加寬培厚雖所費不免過多但多費而工可速成較之徒費而事無把握者其得失利

害曉然可見現在又諭戶部撥庫帑一百萬兩解往豫省備用無虞工費不足阿桂可卽與袁守侗等確勘熟籌若應如此辦理卽一面興工一面奏聞至阿桂所奏漫口之下水已先由漫口旁溢引河卽不能掣溜自不如在上游另尋減水之法等語其言甚屬有理朕於上年十二月間閱高晉等進到圖樣覺現挑引河處距漫口太近且不得勢必係伊等止顧惜費未能將河形大勢通盤籌覈因於圖內用硃筆標示傳諭伊等第因引河旣已辦定止可爲成事不說今阿桂此奏與朕前此指示處似覺相合著卽將硃批原圖仍行發往令阿桂

與袁守侗等詳細體勘講究將應作何施工可望有成之處切實具奏如果必應更張似不當仍爲守株之見阿桂辦事必不孟浪袁守侗等現今皆茫無主意亦不慮其迴護也

公又奏言

臣奉

命赴豫查勘河工堤岸善後事宜自正月二十三日在正定發摺後一路迅速僱行於二十五日入河南境沿途畱心訪問皆以南岸堤工素多卑矮殘缺爲言卽並不經管河務之員亦俱云聞說險工甚多並有高晉在南河帶來之縣丞田文隴等沿途迎

見臣因詳加詢問據云上年九月內高晉曾將各堤壩遍行履勘其原估應做之處尙多後復再三商酌將可緩處刪減并有歸入歲搶修項下者始將楊橋黑堤及儀考各廳緊要各工程估計銀十二萬三千餘兩其所擬摺稿高晉於正月初四日當卽親自繕改送交袁守侗等閱看數日內卽欲拜發後因高晉身故是以袁守侗等又連隔數日始行具奏等語二十八日午刻臣行抵儀封工次面見袁守侗姚立德及藩司榮柱等所言亦係如此至原奏四十日完工之限實不免於太速且桃

汛已屆何能做工臣復詢之該縣丞等據稱南河
春工定限自二月初一日起至三月初十日止是
以高晉病中諄諄言之其實不能如期辦竣卽藩
司榮柱亦稱若勒限完工必多草率等語臣又遍
詢豫省向年做工多有在桃汛之內並無妨害卽
袁守侗等亦已改稱不能依限並稱二十五日所
發奏摺內業經聲明不敢復拘原限務使層礮如
法堅築以期一律穩固等情是豫省南岸堤工之
多有塌卸不堪亟應修補實屬衆所共知而四十
日之不能完工亦果如

聖明洞照至衆人所言雖均屬相同然必臣親赴各處逐一察看目擊之下方爲核實但目下漫口埽工又復衝去情形較爲緊要應俟施工大局已定再往上下游詳悉閱看據實奏

聞至袁守侗等原奏已經趕做之八堡新莊兩處工程當一併順路覆勘奏入報

聞

初六日

公偕袁守侗姚立德陳輝祖奏言查該處一帶河形大溜順堤南注直逼壩根已成入袖之勢前因

北岸附近漲灘別無可開引河是以就漫口斜下對岸之舊有溝槽處所開挖引河以期速達但引河既在漫口下游大溜先經缺口卽已旁趨則引河自不能資分洩之利以致埽工仍受湍激屢築屢衝目下若仍於此處施工不但溜急頂衝而河底舊存柴樛衝刷未淨下埽必不能到底終屬毫無把握只可於上游地面另挖引河冀其得勢臣姚立德因思上游之十堡地方河形向北坐灣遙與舊引河之尾斜對若於該處對岸開挖引河使大溜自西來注卽先趨引河則自不致復逼南岸

漫口壩工方易蕝事上年十二月內接奉

發回圖內卽蒙

硃筆標示及此彼時因十六堡引河業將挑竣是以止就

已成形勢辦理而臣袁守侗等所奏善後事宜摺

內請挖分水引溝一道卽係前次

皇上標示之處臣阿桂因卽同臣袁守侗等親赴十堡履

勘所有應挑引河地方較之現辦情形實為得力

並詢之南河員弁亦羣稱捨此更無可辦之法臣

等伏查現做壩工既屢經衝塌統計所費已屬不

貲而再行仍舊堵築究恐終歸無濟回思從前

硃筆所定處所洵屬

聖明洞照於千數百里之外形勢如在目前且伏讀前此

欽奉

諭旨若初時卽就其處挑挖引河雖工大費多而事或可
早蕝乃專就地近工小起見所費雖覺稍省今前工盡
成虛擲恐其費更不止於此仰見

睿算精詳彌深欽佩今臣等復公同商酌卽擬於十堡對

岸郭家莊另行挑挖引河二千六百餘丈而於引

河頭之下大河內築攔黃壩一道南壩直接十堡

舊壩根北壩灘面挑槽下枕盤築壩臺兩面進埽

逼溜直注引河如將來竟能掣回全溜攔壩迤東之大河即可斷流則缺口止須填土補還原堤爲力甚易卽以攔黃壩工臨時口窄溜緊合龍亦覺費手而河底俱係乾淨溜勢亦屬平直較之現在回頭大溜直逼堤根者施工似屬較易雖現在估計新挖引河及攔黃壩工共約需銀二十七萬餘兩爲費較鉅但核計合龍後數次復被衝決各壩雖均係應賠之工其數已屬甚多而引河工費尙不在內若仍循故轍復有變更其爲虛擲更不可計是銀數已足相抵而得失更屬瞭然臣等仰體

皇上愼重河務念切痼瘼斷不敢復存惜費之見至現存口門且無庸遽行鑲築應俟新工將竣時再行相機辦理惟此次另籌辦法施工甚大而往後水勢漸長辦理亦稍覺費力計期至速亦須兩月方能蕙事但惟此法可望有成是以臣等再三籌度不得不計出於此也奏入

諭曰昨據阿桂等奏另籌引河壩工一摺自應如此迅速辦理已於摺內批示發往現在所挑引河既不得引溜之益自不可不改弦更張今阿桂等酌擬新挑引河卽係朕前此硃筆標示之處經伊等親往覆勘而定自必

確有所見諒非迎合朕旨應卽上緊興工但旣已擇地另挑非寬深不能得力必須開挑極寬庶可掣動大溜其河底尤須挑挖深通使成建瓴之勢方爲有益至所築之攔黃壩更當培築寬厚由西南向東北令挑溜逼向引河不可復似從前之單薄致有閃挫卽所費浮於原估之數亦不靳惜阿桂等自不復存省費之見總之此次施工果能一舉集事所費歸於實濟雖多亦不爲過若如高晉等原辦之引河屢引不就徒成虛擲豈非因欲省費而轉成妄費乎阿桂等當善體朕意爰速籌辦以慰懸注袁守侗現無專辦之事著卽速馳驛來京

俟其到京任數日後再令前往朕既得面爲講論卽袁
守侗亦更得安心辦事矣

初七日

諭曰阿桂等覆奏順隄河攔黃壩情形一摺已於摺內批
示今引河旣移向十堡施工其順隄舊有之攔黃壩原
可毋庸置議至現在新挑引河實爲全河關鍵必須挑
挖極寬極深方能得引溜之益據奏已於二月初一日
興工計共十二段派員分頭趕辦等語自可期迅速籌
辦新壩亦據奏現已挖槽填壓柴土盤做兩岸壩臺陸
續接築等語自應上緊趕辦閱昨日進到圖樣此次所

辦之攔黃壩各爲築壩其實卽係移堵口之工於此仍須進埽合龍工程最爲著重所有壩身務須幫鑲寬厚以次接築堅固方能得力至口門收小時溜勢必緊自不能不仍用兜袖之法其兩袖頭尤須較壩身更加寬厚始能抵禦急溜不虞衝激庶可藉迴溜收功但必須俟引河挑成先放引河掣動大溜然後將壩工合龍方爲萬全之策仍著將新築壩工詳晰繪圖貼說並將現辦壩身丈尺較舊寬厚若干及兩袖頭擬加厚若干一併開明具奏

恭錄

御製詩

大學士阿桂等奏另籌引河攔壩工程詩以誌事

昨秋河決豫時和儀封二時和幸合龍復開者再至十一

月杪始儀封功未遂將成每致變因為袖壩勢儀封漫口

未合龍時已先堵閉及時和之功甫竣而儀封復潰且其

口門水深七八丈湍勢甚急工埽難施因籌兜袖之法合

兩壩頭一展一收外層包過內層數丈俾成回溜之勢或

可於兩袖相距間乘勢合龍因寄諭相商司事者皆以為

禦急衝以故工仍不就袖壩惜復薄刷抵衝波潰去歲

呈圖時硃筆曾標記引河宜取直不應為惜費而時工已

與漫口下開暨埽乃受波激屢激屢衝廢進到河圖以所

開引河之地不得形勢曾於其上游用硃筆標識并諭以

若初時即就此處挑挖引河雖工大費多而事或可早歲

乃專就地近工小起見所費雖覺稍省今前高晉稱知河

工盡成虛擲恐其費更不止於此已而果然

以此慙恚致高晉素諳河工特命攜南河熟於工作者赴

因而慙恚成疾遂致不起為嗟哉喪良臣究亦無濟事熟

思事體大任此資忠智守伺袁及立德姚恐或無定志因

令阿桂往鎮靜集眾思高晉既沒在工更無可恃之人袁

定見因命阿桂馳往令守伺本未習河防姚立德亦鮮有

其集思廣益以冀成事正值河復決因議改絃治引河移

就上硃筆曾標記阿桂閱視工所以現開引河在決口之

河方可得勢因親往履勘議於十堡施工另挑使大溜自

西來注即先趨引河自不致復逼南岸漫口方易歲事其

地即去冬於圖內慮因遵旨為然實無別計其費雖倍昔

硃筆標識處也

惟期事有濟較屢塌所失其省亦不啻為期與以寬余以舊工

既屢築不就不可不改絃更張悉如阿桂所議行仍以引
河宜挑挖寬深壩上宜幫培堅潤其兜袖壩頭尤宜加厚
使可抵急溜而致回瀾雖多費亦所不惜且
予以兩月期限庶得實力妥爲一舉集事
南望縉遙心永言識吾愧
前鑒莫輕試

十三日

公偕袁守侗姚立德陳輝祖奏言查漫口處所急
溜洶湧衝刷愈深原不如於口門外稍遠之地擇
水勢平緩者接築堤壩施工較易然必引河暢達
缺口之水不致十分頂衝難禦方可如此辦理今
儀封漫口本屬兜灣迎溜已成入袖之勢而引河
又在下游不能得力以致大溜全力趨注缺口洶

猛異常即使另就水勢平緩處所接堤築壩而全河之水別無分引仍須專注口門堵築終須費手雖將壩身再行加寬培厚恐亦不能保其穩固是以再四熟籌惟有遵照從前

皇上標示之處於十堡對岸開挖引河而於正河內築攔黃壩俟壩口漸次收緊溜勢湧激之時即開放引河以掣全溜使正河水勢平緩便可上緊堵合今蒙

發下

硃筆原圖令詳細體勘講究實屬

至聖至明確不可易至臣阿桂雖未諳悉河務而奉
命來豫查勘工程正值漫口復被衝塌之際益仰我
皇上睿照如神先機已燭自當恪遵

訓諭勉力籌酌以冀有成至現在新挑引河壩工約共用
夫六萬數千名雖夫役尙未到齊現就舊有之夫
及已到者分段挑挖引河並趕做南北兩壩輒鑲
陸續接出俟至深處再行進埽臣等惟有加緊督
催不使稍有怠緩草率奏入

諭曰覽奏俱悉勉力爲之

十三日

諭曰阿桂等覆奏開挑引河寬深丈尺及大壩寬厚計共二十丈並擬於東岸添築子埝一道以防旁溢及引河脣鑲築草壩逼溜直趨各事宜一摺所辦俱合機宜惟當董率實力妥辦以期迅速集事又閱原圖內有草壩一道係因舊引河至其處歸入正河築以攔禦倒漾之水今既改從上游另挑引河則河身內不宜復有草壩攔阻自應亟速拆去俾得引溜暢達至壩外正河身現在寬深若何較新開引河尾深淺尺寸若何能否得建甌之勢抑或正河身亦須挑挖以期暢順之處並宜詳悉測量豫爲妥辦使臨時得以應手方爲萬全

二十一日

諭曰昨袁守侗在京面詢河務事宜據奏南岸隄工有應行修補者業已具奏覈辦其北岸堤工亦多有殘缺之處高晉在時以其尙屬可緩未經議及等語朕意北岸堤工就現在而論雖似不關緊要但黃河溜勢無常設溜或趨北則北岸又爲著重若不豫行培補堅實何以禦盛漲而保安瀾是北岸堤工亦不宜視爲末務卽或所費較多而先事豫防較之事後堵築其費帑多寡奚啻霄壤又不可不就全局覈計也但北岸之隄甚長其應補情形非大臣親行履勘不能覈實曾面諭袁守侗

到工後卽同阿桂姚立德前往逐段細勘據實覆估具奏上緊興工第袁守侗甫于今日起程其到豫計須旬日目下正當桃汛而今年伏汛亦較往年爲早旣爲未雨綢繆之計則愈早愈佳現在挑挖引河已有藩司榮柱承辦而開放引河之事尙早此時毋庸阿桂在工坐督阿桂接奉此旨可卽會同姚立德親赴北岸將應修補隄工通行詳悉查勘據實確估一面奏聞一面擇日興工倘現發之帑尙不敷用卽按應用之數再請續發亦無不可

三月初七日

公偕袁守侗姚立德陳輝祖奏言查南北兩壩數日內又接築輓廂二十餘丈其餘埽夾土壩亦俱陸續接做而測量水勢深淺仍可照舊輓廂計兩岸壩工做至本月初十間已屆應畱口門分際但其時若不卽開放引河則水勢衝激壩工恐不免過於著重而現在引河工程雖通計已有六分但承辦之州縣才質旣優絀不齊到工亦先後不等是以尙有數段工程較欠者現擬將先行完工處所夫役撥往幫辦趕緊督催挑挖而兩壩轉令緩緩進工一面整理普面加土等事俟酌量引河辦

竣可以定期開放時卽將壩工計期趕辦庶於相
機啟閉機宜倍爲慎重妥協至引河形勢若較低
於迤下之舊正河卽不能暢流無阻是以臣等前
此酌令新引河尾較低於新引河頭其接入舊引
河處又較低於新引河尾而舊正河之河身又較
低於舊引河似此由上而下方無阻遏且大河水
面現較引河頭之河底已高四尺將來壩口收小
水勢再逼高數尺方行開放則奔騰暢達卽可刷
深斷不致復有淤阻至南北壩工自應欽遵

聖諭俟開引河掣動大溜後再行合龍以期穩固萬全

公偕袁守侗陳輝祖又奏言竊臣袁守侗此次在

京面奉

諭旨以漫口下游自河南至安徽一帶黃水經由各河道

必有淤墊之處俟合龍後令臣阿桂臣袁守侗等

會勘籌辦臣袁守侗馳抵工次當卽告知臣阿桂

等查上年冬間高晉在工欽奉

上諭令將賈魯等河何處受淤酌量疏濬隨經高晉將查勘大段情形覆奏並請照業食佃力之例歸於歲修水利案內辦理復經奉有

恩旨以災後貧黎不宜復滋派累於合龍事竣令高晉會

同各該撫沿途確勘核實估計奏聞發帑興工今
臣等復將漫口下游各河道情形大畧詢問查上
年豫省黃河決口其時和驛漫溢之水由祥符縣
境入惠濟河卽從前高晉所奏之賈魯新河又歷
陳畱杞縣睢州柘城境內之橫河康家河南沙河
老黃河均歸入惠濟河下達安徽亳州之渦河查
時和驛合龍迄今已屆數月漫流之水已就乾涸
其間淤墊之處自可設法疏濬現擬卽派員查勘
至儀封十六堡漫溢之水大率由考城之北沙河
商邱之鄧濱口寧陵之馬三河分流均入歸德之

陳兩沙河同注亳州之渦河但上年高晉派員查勘時因自儀封至歸德一帶均係黃水漫浸河與民田相連一片無從區別委員等前往各該處水陸皆不能通一日之間舟車數易往返紆迴雖大段得有情形終未能詳細明確現在漫口尙未合龍水勢實與上年無二第其中恐有迫不可緩者現已飭令委員先往察看俟其稟覆到日再行酌定奏

聞至祥符儀封兩處漫口之水均係歸入安省之渦河雖據曾任通判張愛鼎等稟稱漫水在豫省境內蕩

漾二三百里至彼已就澄清並無淤墊但恐其言
尙未確實臣等現在移咨安徽撫臣閔鶚元查詢
該處有無淤墊確實情形俟其移覆到日一併商
酌辦理均奏入

諭曰所辦俱合機宜但不知引河工程通計何日可以全
竣開放引河當在何日其新壩工口門趕緊收小合龍
應在何時並著阿桂等卽約計日期先行奏聞以慰塵
念至阿桂辦理合龍及善後事宜完畢尙須會勘應行
修補兩岸隄工覈議定局交總河巡撫遵照辦理並須
查看漫水下注至渦河一帶情形估勘確實交河南安

徽兩省巡撫妥辦阿桂方可起身回京若合龍期早查勘諸事亦得早竣阿桂自可於朕詣熱河啟鑿前到京若各項勘估稍需時日阿桂轉不必過於趕急以致不能周到也

十四日

公偕袁守侗姚立德陳輝祖奏言查十堡新築壩工除初三日以前已辦得一百二十餘丈外自初四日以後因引河尙在趕辦兩壩仍須緩緩進工是以令將已做之工一律加土務使高出水面一丈餘尺而加土兩三日後仍展築輦廂共又做得

二十餘丈現存口門已不過五十餘丈又須照前
緩進至引河工程數日內上緊催儻除已經報先
各州縣卽將夫役分派幫辦上下各段外其現在
未完者亦俱有七分八分不等約計數日內大段
已可粗完再令自頭至尾詳細收拾亦不過二十
二三日卽可全行辦竣其時察看河流如水勢不
大再行酌量進逼以期蓄水增高庶開放引河始
得暢流無阻如溜已湍激約可積高數尺卽當開
放引河使之掣動大溜一面趕緊接做壩工以期
堵合約計開放引河總不出二十三日以外而

合龍之期總在四月初可冀全行告竣至善後事宜現已籌定大局其一切應行查估興修之事亦已委員分頭履勘奏入

諭曰佇俟合龍喜信之至

四月初二日

公偕袁守侗姚立德陳輝祖奏言茲於二十四日至二十八日兩壩又續進埽六個每埽俱加廂騎馬層層追壓到底工程極爲穩實現存口門已止十丈而測量口門內外水深四丈六七尺不等至上游正河水面較引河底積高五尺有餘若再爲

逼蓄恐口門愈窄溜勢愈緊河底過於刷深壩工不無著重且此次引河係在兩壩上流其勢本順而日內大溜自西而來又先分趨北岸由引河口經過始行東注更有鼓盪進口之勢自當乘機啟放臣等因共同商酌遵照先開引河再爲合龍之諭旨於本月二十九日寅刻卽將引河開放水頭初進時卽奔騰下注隨亦源源不絕並有二三分溜勢分入揣探下游水頭已過引河引溝之尾六十里外三家莊以東直入舊河順流而下此時兩壩口門之水已畧減二三寸施工更爲放心自應趕進壩

工俾口門逾逼則大溜卽可全行掣入引河雖現
在水勢尙深下埽未能卽時到底而兩壩同時並
進約於四月初七八日以內卽可合龍奏入

諭曰以手加額覽之佇待合龍喜信

初七日

諭曰前據阿桂等奏於三月二十九日開放引河水勢暢
達計算四月初七八日以內可以合龍等語日內諒可
如期合龍盼望喜音甚切昨又傳諭詢問矣至合龍工
竣該處一切善後事宜尙須阿桂在彼妥爲籌畫爲時
約需四五日並有南北兩岸應否修補及自賈魯河至

渦河一帶河身沙土停淤之處作何勘估疏挑曾經諭令阿桂等於合龍事畢親往會同履勘籌辦以期妥善似未必能尅日蒞事著傳諭阿桂自行酌量如儀封合龍後能將應行勘查諸務妥速辦竣於朕啟鑾前到京固屬甚善如工多路遠不能趕緊辦竣又不可因趨辦致有草率

初八日

諭曰據農起奏查勘渦河水勢情形因黃水倏長倏消尙難遍勘確估俟豫省漫口合龍黃水全消始得勘估準確等語自應如此辦理又據稱渦河水勢湍急建瓴而

下河道深寬現在水流通暢毫無阻滯間有新舊沙淤
坍塌缺係在河岸兩旁無碍水道等語則將來勘估疏挑
更易爲力著將農起原摺抄寄阿桂等閱看俟合龍事
畢前往各該處會同履勘時查核該藩司所奏情形是
否確實一併核辦

初十日

公偕袁守侗姚立德陳輝祖奏言此次所挑引河
係由西南以至東北其地形自上而下本爲得勢
是以開放之初卽能暢達雖自前月二十九日起
連遇東北大風四五日處處迎頂水頭而水流並

無阻礙惟因兩壩口門之水本已刷深大溜奔騰
東瀉引河雖分有二三分溜勢而一時尙未能掣
動全溜現於引河脣之東岸添築兜水壩一道以
冀回溜北趨又令舡隻在引河內往來上下以資
鼓盪日內風勢較順河水源源下注自可期就深
通至引河固以水深爲有濟而壩工又以水深而
有著重今口門之水深至五丈以外益覺湍激異
常所做相近口門時有低勢必須趕緊搶護卽已
經到底者尙恐其根基鬆軟是以每下一埽竟須
遲至三四日始能著地堅實方敢更進一埽雖約

計不過再進四五埽即可合龍而以一壩進兩箇一壩或進三個計之亦尙須八九日當此工程喫緊之際斷不可畏難而稍失事機亦不得不慎重以圖蒞事奏入

諭曰連日盼望合龍喜音晝夜懸切茲據阿桂等奏口門之水深至五丈以外每下一埽須遲至三四日始能著地堅實現在儘力趕做約計十五日前後方可合龍等語盼望雖殷亦實無法已於摺內批示矣又據稱引河雖有二三分溜勢尙未能掣動全溜等語自係新挑引河仍未寬深之故然業已放水又難再施挑濬之工所

稱東岸添築兜水壩一道以冀回溜北趨亦屬幫助之一法至稱每進一埽須加廂培厚著地堅實方敢更進一埽當此工程喫緊之際不得不慎重以圖蕝事等語自應如此辦理此次工程總以穩固爲要斷不可欲速而稍涉草率據稱日內風勢較順河水源源下注自可期就深通朕惟默籲

天佑神助以冀及早成功耳至上年十二月內高晉等曾奏請於十六堡捐建

河神廟一座朕閱圖內十六堡原有

大王廟自當向現有之廟誠心乞懇望其効靈何必有一

新工卽建一新廟是以未經先行今思現築攔黃壩進
埽之處其地在十二堡距原漫之口門較遠如果
河神靈應速助工成原可於合龍後卽在該處建廟以答
神貺著阿桂等一併妥酌行之

十二日

公奏言臣於河工事宜本屬毫無經歷今年正月
以豫省漫口屢築屢衝迄無成事奉

命馳赴工次查勘卽會同督辦要工臣抵工後與在事諸
臣悉心講論並道府叅備以下文武各員無不向
其諮訪情形因從前辦有十二堡攔黃壩引河之

事所做工程僅係本省捐辦力量甚薄尙能合龍則其事可望有成隨據姚立德所指十堡地方與袁守侗等公同商酌趕辦新工兩月以來頗爲平順卽自前月二十九日開放引河之後水勢甚暢察探下游水頭已於初五日過河南山東境是引河形勢非不源源下注而總不能掣動大溜且兩壩口門水勢仍復刷深湍激洶湧異常臣已爲之寢食不寧至本月初間漸有掣動之端其時審度形勢雖於初七八合龍之期不能依限而大局尙屬無妨恐轉煩

聖心焦慮是以未經

奏及乃于初七日酉刻以後暴風大作波浪狂湧頃刻之間北岸壩工竟衝塌至二十丈殊出意料之外此事實毫無把握但又無束手不辦之理是以現在另商趕辦不過儘此一月之內晝夜催僱以僥倖成功若一月之後卽屆伏汛大水有長無落施工更難且現用他省協撥之料雖此時尙足敷用若一月之後猶未完事而舊料亦已不敷新料無可籌辦非深秋後不能措手然以伏秋大汛盛漲由漫口下注不特豫省下游淹浸愈多而江南淮

安高寶一帶更不能知作何光景臣思念及此實

不禁晝夜傍徨寢食俱廢伏念臣受

恩至深至重且蒙

皇上以河防關係緊要久而未成委令來此董辦雖臣之

不諳河務久在

聖明洞鑒之中卽現在新工亦係詢謀僉同公商會辦臣

並未敢自作聰明但以如此大事不能稍分

宵旰殷憂實覺焦急慚愧無地自容此時臣并不敢照例

奏請議處以冀仰邀革職畱任之寬典若將來復

有更變以致汎水長發不能施工卽自行嚴切議

罪以安臣分奏入

諭曰據阿桂等奏四月初七日未刻水勢洶湧北壩工首
一帶邊埽塌去七丈酉刻以後風暴大作全河之水狂
湧口門又將舊做各埽連輓廂一併塌去共計衝去二
十丈有餘等語此亦無可如何之事祇能竭盡人力上
緊妥辦以冀

天佑神助已於各摺內批示矣據稱引河迤西一帶俱已
淤淺現將引河口門暫時堵閉自應如此至所稱擬於
引河之西百餘丈外坐灣水深處所復開引溜溝一道
接入新引河之第二段約長三百餘丈等語閱圖內形

勢其地正當兜灣迎溜於引溜似更得力且據稱河流至此尙未跌深期可掣動大溜等語於勢尤順自當上緊施工但所擬新挑之引溜溝其河頭必須較現在引河分外加寬其河身亦應加深方可期掣動大溜又不可復圖省費致河仍淺窄不能資掣動之益也至圖內於北壩上首邊埽幫寬培厚作爲壩臺並據稱兩壩但由外越進埽期易堵合自是正理但看圖似進埽處距口門太近尙恐將大溜逼緊復致刷深或可就新做北壩臺處斜向西南進埽以期挑逼猶伊等所做兜水壩之意似於堵築施工較爲得濟因於圖內用硃筆標識

著將原圖發與阿桂等閱看可否如此辦理卽速悉心
妥酌據實覆奏

十三日

公偕袁守侗姚立德陳輝祖奏言本月初九日接
奉

上諭合龍工竣該處一切事宜尙須阿桂在彼妥爲籌畫

伏查豫省新工應辦善後各事宜臣阿桂已與臣

袁守侗等公同籌酌業經定有章程因須俟合龍

後再辦是以現今未卽具奏至南北兩岸堤工其

南岸最關緊要者已經臣袁守侗臣姚立德於籌

辦十六堡善後事宜摺內奏明估辦陸續興築臣

阿桂覆查十八萬八千七百餘兩俱係必不可緩

之工至其次應修者臣姚立德亦俱估入本年歲

修項下辦理而臣阿桂於前此接奉工竣查勘堤

岸

諭旨後又先派委誠幹之員分頭履勘亦尚有應行培補

者現已約估定數止須銀三萬三千七百餘兩此

等俱係土工無須物料只在夯礮堅實而其土方

丈尺按數可稽勢必不能浮冒且係加高培厚之

計非目前迫不可待臣至於漫口下游各河臣阿桂

於接奉

諭旨後亦先委員履勘惟時和騾_呼决口所衝一帶漫地現
在已經涸出其經由之甫_呼濟河水已歸槽內止兩
段畧有淤墊應加疏濬已據勘明止須銀一萬二
千兩此外均屬深通無阻其儀封十六堡决口漫
下之處現在汪洋一片難以履勘將來合龍後又
卽屆大雨時行之際必俟深秋方可查辦而其情
形亦與惠濟河相仿均屬各處瀝水所積並無來
源其有另衝新河者舊河淤墊處所俱成沃壤自
當順勢利導不必處處全復舊河至安省湯河現

據閔鶚元咨稱派委司道勘稟目下黃河水由湯河滿槽下注較前倍覺寬深更不致稍有淤淺其安豫交界之武家河懷家溜等處有應行勘辦者並據閔鶚元咨稱亦須俟深秋令勘方能確實以上各情形臣阿桂在工七十餘日詳加詢訪雖未經親身遍往而已歷歷如在目前並與臣袁守侗等朝夕講論大概亦皆洞悉惟現在堵築之事實屬關係至要當此時屆垂成不意復有變動所有一切情形已專摺馳

奏自必仰邀

指示雖在工大小諸臣亦無真知確見出臣阿桂意想之

外而臣阿桂亦無高出衆人確乎可信之處但以

如此大事臣阿桂受

恩至重理應身任艱鉅今未得就緒實無顏卽行回京復

命是以現在日夜籌辦爲開挖引溜溝之策若挑成開放

果掣動大溜則壩工自可必成卽臣阿桂先行回

京臣袁守侗等亦能辦理若仍不能掣溜則雖臣

阿桂在工亦屬無濟是其能成與否四月底總可

定局奏入

諭曰阿桂等覆奏現在籌辦河工及將來查勘應辦各情

形一摺已於摺內批示矣前因阿桂等原奏四月初可望合龍是以諭詢阿桂或於合龍後將善後事宜擇其要者辦定章程阿桂卽先行回京令袁守侗在彼仿照妥辦乃就前此垂成之局而言今北壩復衝塌二十丈有餘現在另籌挑挖引溜溝及設法進埽此時應辦之事關係重大阿桂自當在彼督辦冀速葺工俟合龍堅固後再行起程爲是不必因有前日詢問之旨急於回京至新挑引河務須極寬極深方可期掣動大溜不得存惜費之見當以從前之淺窄作後致不能得力爲戒壩工進埽照圖內硃筆標識自宜初做壩臺起斜向西南進

埽俾挑大溜由東北趨注引河庶開放掣溜更爲順利
至進埽合龍亦照硃筆標識處施工仍不離前此所指
兜袖之法自當有益阿桂等務卽悉心妥籌一面辦理
一面覆奏其現擬另挑之引河通計不過三百餘丈易
於趨辦阿桂等務須董飭承辦各員弁趨集人夫上緊
趕辦以期速竣其壩工進埽必須較前寬厚逐步培壓
堅實方可得濟總之此次辦理堵築事宜引河必比舊
寬深進埽必加意堅固以期速收實效現今河流平緩
上緊趕辦自可速期蒞事此時惟當以尅期趕辦爲言
使在工人員共知奮勉斷不可爲萬一不能卽完之說

致衆心懈弛各懷觀望或致因循遲緩不可不慎亦猶軍營進兵務爲必勝之說使將士咸皆用命不論地之險易並得成功所謂事在人爲阿桂尤所深知也至於本年節候雖早然初伏亦在六月初八日伏汛距今尙有兩月此時上緊趨辦斷無至伏汛時尙未能蕝功之理著阿桂等詳悉覈計若果如法施工諸事應手約計何時可以合龍先行覆奏再儀封工次四月初七日東北風暴以致塌動壩工是日京師下午亦有東北風可見百里不同風之說亦不盡確前日下午此間西南風甚大豫省諒亦相同或將大溜逼向引河可期暢注該

處情形虛員在如何並著阿桂等據實覆奏朕於豫省河
工一事晝夜焦勞而軫念災黎尤爲懸切以

上蒼仁愛民生無日不誠心默禱仰祈

垂佑昨又降旨令阿桂等俟合龍後於現在施工處所興
建

河神廟以答神貺速得工成今復思古有沉璧禮河之事
因擇白玉璧一件並撰擬祭文一道由驛發往著阿桂
等於接奉後卽詣現做壩工河岸虔誠致祭或可冀
河神祐助速得歲工至於現在儀封堵築事宜惟在阿桂
等實力妥辦不可畏難亦不宜欲速以冀

天佑神助及早成功此外亦更無他法但缺口漫下之工
由賈魯河至渦河入淮河歸於洪澤湖計洪湖不能容
納則下河被災必重此則不可不先事綢繆者昨已諭
薩載先將清口兩壩及早展拓不必拘定六十丈之誌
卽拆至八十丈以外亦無不可但東壩難於多拆自應
將西壩展數十丈使清水暢注庶爲有益至所開淮河
以下洪湖以上有高家灣之地可以分洩淮水仍入黃
河已令薩載迅速前往履勘如果施工有益卽速估計
覆奏及早辦理

十五日

公偕袁守侗奏言本月十二日接奉

上諭現就攔黃壩堵築合龍施工較易其南岸口門只須俟合龍後補還原堤查豫省河堤上年漫缺之由臣阿

桂等在工確加體訪實係伏秋盛漲過大爲近年

所未有前經臣阿桂詢問江南解料來工之府廳

等俱稱上年七月間徐州一帶水已平堤居民俱

經躲避上山後因豫省先有決口下游始得保全

薩載所以有化險爲平之奏惟是河工事宜全在

平日畱心查勘未雨綢繆今豫省河身寬廣每因

漫灘之水衝有溝槽姚立德未能處處堵塞以致

水漲時串近堤根是以高晉上年亦有議其溝槽不能全堵之病欲於工竣時奏明辦理且豫省河形近年漸已趨逼南岸姚立德非不見及於此但卽當據實陳明妥辦卽銀數不敷亦應請

旨動帑加工自必邀

聖明鑒允乃於前歲冬間在十二堡築壩挑河僅與徐績等扣廉捐辦力量旣屬單薄防範亦未周密以致上年秋汛漫灘搜後復被衝去此則姚立德等所不能辭咎者至於順堤河形逼靠堤根原所最忌現在十六堡決口以全河之水循堤下注目下口

門甚寬尙復時有蟄塌若伏秋大汛之水直走一綫單堤更不免在在可慮此其必不可辦之情形實爲豫省官員所知是以姚立德於上年七月十六堡初決時卽奏請在十三堡地面築壩施工候高晉到工酌定辦理其時臣袁守侗因不諳河務初到工次得失本屬茫然而高晉素稱知河因彼時十三堡係屬嫩灘難辦是以卽就漫口堵築由今思之使高晉尙在亦不能不另圖變計今十堡新工再三揆度形勢實爲較勝惟因二月初一日開工之期已不早且所派挑挖引河州縣夫役距

工遠近參差至二月望後始得到齊以致目下
有變動時候更緊卽趕緊催辦而轉瞬端陽節後
水勢漸長一接伏汛更難著力臣等所以晝夜焦
急憂心如焚惟有儘此可以趕辦之時儼倖迅速
蕝事倘尙不能成則做法或另有籌酌而形勢總
不出此一帶將來辦成之後一切隄岸善後事宜

自當遵

旨切實辦理至姚立德在任承辦歲搶工程臣阿桂等畱
心密訪尙未聞有侵冒情弊其每年所用銀數及
何煇管河務時每歲用銀若干除總河衙門之外

惟撫藩兩處亦當有案可稽但一經予查恐其轉相傳述姚立德卽已知覺該總河自此次復被衝埽後神色倍覺驚慌此時正當趕辦要工若稍露痕跡不但伊心緒更紊其所屬河員尤不免愈生觀望辦理殊多不便臣等因思何焯與徐績姚立德先後所辦歲搶修銀數俱題報工部核銷有案應請

飭交工部按年查明開單具奏卽可得其實數奏入上是之

十九日

公偕袁守侗姚立德陳輝祖奏言臣等奉到

御製祭文一道白玉璧一件仰見我

皇上念切痼瘼至誠祈禱之至意查本月十三日奉到合
龍後卽在十堡建廟

諭旨係於初十日

頒發臣等迴思工次亦於初十日以後河流稍平風勢漸

轉仰惟

誠敬所孚早通冥漠因卽恭叙

綸言撰文致祭今復欽承

明詔令於河干沉璧祭告且伏讀

御製文內撫躬一聯益仰

聖懷若谷愷切抒詞不惟祇格

明祇直見誠通

蒼昊凡在工官民人等無不交相感動歡慶難名臣等現
擬敬謹膾黃蠲吉於十九日賁詣河岸虔誠讀祭
並將玉璧捧沉上流河底從此

河神感應自可速助成工上紓

宵旰奏入報

聞

二十一日

諭曰阿桂等何時可以開放引河朕心懸念甚切該處另挑之引溜溝計三百丈尙不甚難卽加濬之引河口數段亦不甚費事自可尅日蒞功但伊等於引河挑成後諒必俟西南風順相機開放以期得力昨日此間東北風甚大恐豫省亦復相同於放溜甚有關碍今日已轉西南風惟願豫省風信相同冀逼溜趨注東北庶引河開放勢極暢順可以及早合龍用慰廑注著再傳諭阿桂等將現挑之引溜溝及疏濬引河何日可以告竣定於何日開放連日該處風色如何是否須乘西南風之勢再行放溜詳悉查明迅速據實覆奏以慰懸盼

二十四日

諭曰據阿桂等奏十七八兩日連遇大風北壩漸有隙裂至十九日午刻所做新舊輒鑲復衝去八丈其臨水輒鑲工段尙有九丈餘均已裂縫恐亦未能站住等語覽之倍切軫念然亦無可如何據稱十堡形勢南高於北是以此就施工使大溜漸歸北注但溜近於北則北壩實爲著重現旣屢次衝埽更恐愈進愈難惟舊南壩多做逼向北首如挑水壩之式逼溜北入引河尙爲得勢現在專由南壩進埽使大溜愈近北岸等語所見甚是祇可如此辦理但伊等前此奏稱黃河之水非一綫單

走乃係全溜奔赴壩根迎溜一面已有搜根之險惟是兩壩勢均力敵尙可望速令直趨等語是南北壩工雖經改做而挑溜情形易地皆然由北壩進埽斜逼卽慮大溜專趨南岸則由南壩多做逼向北首獨不慮溜勢專逼北岸乎雖引河引溝俱在北岸然各處堤岸俱不甚堅固亦不可不加意豫防至南岸所進之埽必須倍加寬厚下椿穩實使溜勢不能動搖方爲妥善又據稱現挑之引溜溝並收拾之正引河務令加倍寬深以期暢達約計二十四五日完工等語今日正係二十四日若引溝挑成風勢甚順自可卽行開放抑或尙俟南壩

進埽稍長方議開放著阿桂等卽速奏聞以慰塵念

二十七日

公偕袁守侗姚立德陳輝祖奏言

臣

等先於二十

日將北壩復被平場現擬專由南壩進埽並將新
開引河溜溝移向西首水深近灣處挑挖等因具
奏在案數日以來南壩復下二埽慎重鑲壓均屬穩固
一俟新埽追壓到底卽行往前再進北壩衝場輒
廂後本尙有臨水工段九丈餘均已鬆裂日內先
將外面裂縫多處連根拆去數丈其餘祇係拉鬆
頂土根脚尙屬堅牢因將上層刨開另行趕壓厚

土計已搶住六丈有餘現就該處原有邊埽之下
刨淨埽底上緊鑲築俾與正壩頭一律平實將來
進埽時擬將下水頭讓去數丈其上首卽將邊埽
併入正壩往前進築使有斜向西南之勢而於邊
埽外另廂邊埽以資裹護此時惟專由南壩多進
埽個使大溜逼注北岸俟引河開放後如口門水
勢尙可施工北壩亦仍下埽俾兩邊對築以冀於
汛水長大之先口門早行收窄相機堵合至引河
脣東岸現有之兜水壩原欲使水勢至此逼向北
行往前初放引河時頗資其迴溜之力但此壩係

兜溜著重惟恐未能直入大溜是以祇做成二十丈今南壩漸次進埽溜勢日就北趨而北首再將兜水壩展長相逼自更有益臣等現在督率酌量加展至引河內頭二段淤墊之處業經挑竣二十一二日間卽擬開放因二十一日東北風甚大此後或東南或正南風勢總無一定惟二十三日果忽轉西南風頗大已齊集夫役趕緊於引河頭拆壩門未及數刻風勢又復微小恐引水仍未能得力是以暫停啟放至引溜溝晝夜加緊挑挖於二十五日卽可一律告竣此一二日間若得西南大

風卽先開引河以資分洩否則定於二十六日將引河引溜溝一併啟放現在水勢日漸加長未便再遲致口門愈爲著重如開後卽能掣動大溜則兩壩埽工自可尅期蒞事奏入

諭曰阿桂等覆奏引工壩工情形一摺已於摺內批示矣據奏引溜溝晝夜加緊挑挖於二十五日卽可一律告竣此一二日間若得西南大風卽先開引河以資分洩否則定於二十六日將引河引溝一併啟放等語阿桂等所擬啟放引河引溝之期卽係昨日昨自香山迴蹕圓明園早間尙係東北風辰時以後卽轉西北竟日未

息風亦頗大今日仍係西北風西北雖不及西南但西南風吹溜東注或尙逼溜趨入引河自較勝於東北而吹溜向東南轉慮其衝逼溜壩不勝隱憂不知豫省昨日風信如何開放引河時卽能掣動大溜否朕懸念甚切惟有默籲

天佑神助冀早合龍此外更無可指示而盼望之心益殷於前矣至開放引河後口門如何收窄以待相機堵合之處卽著迅速具圖貼說呈閱

二十八日

諭曰昨據阿桂等奏定於二十八日可以開放引河引溝

計今日已經三日京師連日西北風甚大雖亦可吹漚
東注較之西北風稍勝然究不如西南風可以吹逼全
漚直注引河不知儀封工次日來風信如何引河引漚
於二十六日何時開啟能否掣動大漚其水勢是否暢
流下注朕晝夜懸念無時或釋著傳諭阿桂等卽將二
十六日開放引河情形速由驛加緊覆奏以慰塵懷

阿文成公年譜卷二十

受業 王昶勘定

盧蔭溥增脩

第三孫那彥成恭纂

乾隆四十四年

五月初二日

諭曰連日盼望開引河之信甚切今據阿桂等奏二十六日一時先將引溜溝開放初入卽奔騰下達所有大河內北股之溜約已歸入三分其東趨七分之溜亦有側注漸近之勢午間已轉西南風尙不甚大而壩頭已落水

五寸等語覽之稍慰至所稱正引河頭逼近壩頭蓄水不過三尺有餘恐開放時進水無多反虞淤淺俟正引河頭積水漸高再得西南風卽行拆壩啓放庶兩處匯成一流吸川下注更爲有益等語開放引河自不得不相機慎重未知近日引河頭積水增至若干尺昨日此間已轉西南風未知儀封工次連日西南風曾否稍大約計何日可以開放引河朕心晝夜懸切著阿桂等將何日開放引河及能否掣動全溜情形迅速覆奏又據稱現在口門二十一丈除酌留四丈合龍外尙有十七丈須下埽十二個以每日下一埽計之爲期須至月餘

恐不能於大汛未至之前趕竣等語此事甚有關係壩工所下之埽自當令其著底堅實若太速恐致草率貽誤但太遲又不能於大汛前趕完未免前功盡棄實爲可惜據稱近隄兩邊壩根數十丈俱已露有泥灘此是極好機會若開放引河後掣動大溜則口門汕刷之勢必減兩壩自更易於施工或必兩邊一同進埽或就一邊獨進惟在阿桂等酌量實在情形妥協辦理務於汛前趕辦全完方爲妥善

初五日

公偕袁守侗陳輝祖奏言本月初一日接奉

上諭阿桂等所擬啓放引河引溝之期卽係昨日昨朕自香山迴蹕圓明園早間尙係東北風辰巳以後卽轉西北竟日未息又於初二日接奉

上諭京師竟日西北風甚大雖亦可吹溜東注較之東北風稍勝然究不若西南風之可以吹逼全溜直注引河

臣等先於二十七日將二十六日子時開放引溜溝水勢暢注已分溜十分之三其正引河頭積水漸高再得西南風卽行開放壘南壩下埽後北壩亦開占輒鑲如竟可做出則仍當對下埽箇各等

因恭摺具

奏在案查

臣

等於二十六日初開引溜溝之時本係西

風因溝外水勢由西南斜下直達引溝是以西風亦爲得力是日午刻卽轉西南風但不甚大至二十七日夜復轉西北而二十八九至初一日又轉東北風其勢頗烈幸引溜溝來源得勢仍復源源入口其溝尾出水之處亦極奔騰下注釜差探下游水頭已抵江南之礪山縣境

臣

等因思引溜溝地勢以西南風爲最利南風次之東南風亦無所碍其至不順者係東北風其次則係北風西北風今此三日內雖風力不順而水勢仍屬暢流但不

能掣動大溜初一日陣雨後晚間風勢稍定至初二日巳刻以後始轉東南風甚微而溝外水勢入口愈急所有大河內南首七分之溜漸向北趨逼近引溝之頭日內如得大西南風則風水俱順其勢尤不可遏必能將大溜掣動漸入引溝至正引河專俟西南風大作卽行拆壩啓放以洩近口一帶之水壩頭自不虞著重至現在口門水勢數日以來已覺稍平南壩復下二埽追壓甚爲平穩北壩頭前因溜勢漸減試令開占輒鑲亦頗穩實因卽於二十九日下埽一箇慎重鑲壓業已將次到

底現在兩壩情形南壩已做成一百二十餘丈係由東南斜向西北北壩現有五十餘丈係由東北斜向西南其中間口門現存十七丈有餘除酌畱四丈合龍外尙有十三丈餘須下埽九箇如果諸事順序則兩邊對下埽箇月望以後可以相機堵

合奏入

諭曰據阿桂等奏二十六日開引濶溝以後勢甚暢順水頭已抵江南之礪山境初二日始轉東南風溝外水勢入口愈急所有大河內南首七分之濶漸向北趨逼近引溝之頭日內如得大西南風則風水俱順必能將大

溜掣動即可拆壩啓放引河以洩近口一帶之水等語
已於摺內批示初三初四兩日此間西南風頗大未知
工次如何阿桂等此摺於初三日發何以未經提及或
初三日已轉西南風此摺於初二日繕就初三日早填
寫拜發遂未及叙入亦未可定朕心晝夜懸切著阿桂
等即將連日風勢如何及能否掣動全溜情形迅速覆
奏又據奏稱口門現存十七丈有餘除酌畱四丈合龍
外尙有十三丈須下埽九箇如果諸事順序則兩邊對
下埽箇月望以後可以相機堵合等語佇待佳音之至

恭錄

御製詩

西南風

適日西南風惜其勢畧小然究勝東北弗遑下雨兆

叶東北

風多致雨近今雨暘時若非望澤時而河工正當引濇向東北時恐風逆不能掣濇也

足見情無定

惟視一時好

叶

引濇今急務欲順歸故道助以西南風事

半功倍早諸臣竭力為切待風信好

據阿桂等儀封工次引濇溝已放勢頗暢

達其引河則俟西南風順然後啓放庶可掣動大濇現亦上緊籌辦適日雖轉西南風而勢弗大益切籲祝

之佑我亦焦在茲遙望虔心禱慚愧聽於神惟祈萬民保助也

初六日

公偕袁守侗陳輝祖奏言

臣

等先於初三日將開

放引溜溝後風勢不定至初二日始轉東南風甚微至正引河專候西南風大作卽行啓放壺現在兩壩口門情形繕摺繪圖具

奏嗣後大河風勢或正南或東南一日之內頃刻轉移總無一定亦間有西南風起之時其力甚微而其時又甚暫是以引溜溝啓放後雖已有北首三分之溜入口且南首數十丈外之大溜一股亦已逼趨北岸而總以風力未大溜勢緊靠溝外直往東行尙未能遽行掣入至正引河頭壩外之水較之壩內河底僅高三尺餘必得俟水頭再積高一二

尺或遇西南風大作則拆壩時始能奔騰下注然風與水皆難預定惟在一遇有可乘之機卽刻迅速辦理設數日後風與水尙須有待而壩工口門已窄未免過於著重亦卽當將引河啓放以資減洩再查向來大河內每清明日驗看誌椿上底水以定此後長水之數本年自清明以至四月河水漸長祇在四尺上下臣等復徧詢工次員弁及多年之船戶土人等俱稟稱五月內汎水長發不過再多二三尺許及六月大汎至時水勢始驟長數尺或丈許不等是五月內水勢尙不至甚大兩壩

儘可施工惟總須於大汛未至以前趕竣乃不至前功盡棄現在南壩做成一百二十餘丈雖覺太長幸壩臺甚寬且有邊埽夾壩兩旁跟做是以屢次進埽追壓頗爲平穩至北壩亦經下埽然必壓至三四日以後方能到底且大溜漸逼壩頭實爲著重每至進埽時不得不詳慎斟酌此時壩工情形不獨在工員弁均已氣餒卽臣等當此中心亦不免於惴惴惟是再四籌畫與其專辦南壩而曠日終難於集事不如兼辦北壩或擔險以倖得成功卽北壩不能與南壩一例進築而審度形勢北

壩一堵到底則南壩便可少做兩堵而堵合之期
卽已趕早七八日似此相機斟酌緩進雖不敢謂
計出萬全而通計大汛將臨時日實不得不出於
此若半月之內風水再得順利自可於大汛之前
趕辦完竣奏入報

聞

十一日

諭曰連日盼望開放引河及壩工合龍之信甚切茲據阿
桂等奏四月初七日西北風竟日不止河水驟長三尺
有餘溜勢洶湧將北壩頭及上下邊堵衝塌十五丈正

引河頭之土埧亦被衝開仍未能掣動口門之溜等語
覽之深爲煩悶此次儀封之工屢隳於垂成實亦無可
如何之專據稱新開引河之西王家莊地方有大兜灣
一處大河溜勢於上游南岸埽灣而來頂至此處若於
此開挖引河一道歸入正河所謂順水之性因勢利導
現已勘估開大引河一道長九百餘丈接入原開正引
河之第五段較現在引河引溝更加寬深一俟盛漲卽
行啓放等語並據繪圖呈覽已於圖摺內批示看來此
處形勢甚順若早於此開挖引河卽可掣動大溜惜未
能早計及此也此時自當以此爲正務阿桂等應卽董

率承辦各員上緊挑挖迅速辦成以便相機啓放至所稱北壩不敢冒險再做南壩一百二十餘丈尙爲平穩等語朕意若於南壩向北接續進埽或可直接北壩以期合龍卽不然亦可逼溜趨注引河爲得尺則尺之計此亦無聊之極思代伊等籌及未識可如此辦否著阿桂等悉心籌度酌量辦理又據奏新開引河一事尙可於大汛至時驗其得失阿桂俟六月中開放王家莊引河後再行回京等語阿桂當在彼始終其事俟合龍後將兩岸隄工所有應行培繕以禦大汛之處阿桂當與袁守侗帶同姚立德親往履勘如有卽應速辦者上緊

趕修其可緩辦之工仍畱交袁守伺辦理至漫水下游
各河至安徽之渦河一帶應行疏槽之處亟當會同各
該撫詳悉勘明妥協辦理

恭錄

御製詩

阿桂等奏河工形勢詩以誌事

南壩幸保固北壩每衝決

阿桂等奏五月初七日西北風竟日不止溜勢洶湧將北壩頭

衝場十五丈南壩已做成

一百二十餘丈保護尙爲風勢

既阻選引溜成虛說欲移王家莊詳陳具圖閱看直受頂

衝糜可大溜掣

又據奏新開引溝之西王家莊大兜灣一處擬於此開引河一道達入正河庶可掣

動大溜云云并閱所呈之圖形勢甚順惜未早見及此耳惜早未籌及事或有時節轉眼伏秋臨繁憂增鬱結哀哉儀封民無能救机隍惟冀此工成南望日焦切

十九日

公偕袁守侗陳輝祖奏言臣等現辦之王家莊引

河兜灣迎溜形勢自爲極順但目下水勢尙小大溜仍繞赴東趨必俟伏汛長發水至半槽時則溜往上提始能直衝其處現在雖已辦有四五分工程而將來挑竣後尙須以河待水並非以水待河所以初辦正引河引溜溝之時雖曾履勘而未辦

至南壩已做成一百二十餘丈頗爲穩實自可尙
進數埽然若再往前進卽已及從前北壩沖塌之
處彼時溜勢愈急壩頭未免著重恐或有意外之
虞且築壩先以積料爲要務現在通盤籌算所餘
稽料已屬無多雖經上緊購辦或數千斤或數萬
斤不過零星儻湊祇預備引河掣溜後堵合之用
尙恐不敷未敢於此時冒險多做或稍有虛擲反
至臨時束手况民間每歲所收稽料不過爲炊爨
及苫蓋房屋等用過夏卽俱朽爛故雖無事之年
至夏月卽所存已少况豫省自上年興工以來所

有儀封十六堡及時和驛八堡等處費用料物至
二十千萬餘斤已屬搜括殆盡而隣近之山東直
隸江南等省除連次購運外其精夥亦復如是卽
如蘇麻一項本係產自本省卽江南等處向來尙
俱赴豫採買茲因工次所貯業已用完而本省無
從再購因在山東省照依市價買取一百萬斤以
爲接濟鑲埽之用可知稽料一項尤不能再爲酌
辦至現在二次用過之稽係於歲修料內借用四
千萬斤原擬於汛前撥還而此時購辦維難其先
已運交各險工存貯者恐盛漲至時尙不敷搶修

急用亦豈能再行分濟大工是以臣擬於伏汛盛漲開放新引河後如果溜勢全歸故道雖有分流之水不至甚大尙可施工卽用現在約計預修之料將壩工僱堵合龍萬一稍有不能則必俟秋汛以後新料登場再行購買應用以期竣事至南北兩岸應辦事宜除近漫口一帶堤岸因料車往來未能趕辦外其餘均已完工所有估入歲修各工亦俱陸續辦竣大汛至時尙能抵禦其續添兩岸工段祇係爲加高培厚之計卽遲至秋後及明春辦理亦屬無妨奏入報

聞

二十八日

公偕袁守侗陳輝祖奏言查王家莊引河頭原估口門本寬六十丈今又展寬至九十丈以冀迎溜得勢自來開挖引河從未有如此之寬廣者至河底之深祇須挑至一丈八尺者總以引河尾與正河身相較使有就下之勢而止現在引河頭老厓離大河水面僅高一尺以引河底深一丈八尺計之較大河水面已低八尺若河水再長一尺則引河底更深一尺由此遞長遞深將來開放時自有

建甌跌注之勢惟河尾面俱較河頭倍窄原係欲
初放時束水有力之舊制然過窄必須俟其兩岸
塌厓方能暢注此次引河爲現在第一要務於原
定丈尺刨挖如數後若尙須待水不卽開放自應
仰遵

訓示將引河尾再爲儘力開寬至引河工程現已挑有七
分約計月底月初方可完工奏入

諭曰阿桂等奏開挑引河情形一摺已於摺內批示矣此
次王家莊所挑引河較常倍加寬深且在初伏以前可
以竣工俟大汛到時自可乘勢引溜以期暢注果能掣

動大溜則壩工合龍自較省力第引溜既歸正河以後所經河南山東至入江南境河路尙長其經行河底未識能否一律深通暢達無淤淺之虞兩岸隄工是否一律堅固完好無鬆薄之患不可不豫行籌度爲未雨綢繆之計今王家莊開挑引河之事現有阿桂在彼督辦袁守侗此時竟當卽往下游一帶查勘兩岸隄工并察看河底情形如有應急需辦理者卽札商阿桂一面奏聞一面迅速籌辦務於開放引河以前勘辦全完方爲妥善

恭錄

御製詩

西南風

昨盼西南風為吹送河溜盼之而未獲北壩復坍透因而
 為改絃王家莊津逗地勢當頂衝或可全川受竭力疏引
 河醜之故道就然尚須時日阿桂昨奏於王家莊另開引
 河一道約計月內或下月初
 完工俟汛水上灘實有欲進之勢即行啟放俾大溜掣入
 引河直達故道如果大溜全掣則壩頭水勢大減施工自
 易云云是該處工程尚需時日今日此間西南風頗大豫
 省工次即或相同而引河未成風力亦無可藉益切塵懷
 且弗資風候茲乃西南風無藉功難售徒為爽涼披那賴
 昏墊救未感增予慚仍祈籲神佑

六月初六日

公偕袁守侗陳輝祖奏言臣等挑挖王家莊引河業於上月二十四日將工程挑有七分初伏前期完竣嗣自二十五日以後連遇風雨每次爲勢大而且久正河之水比較清明誌椿已長至七尺有餘并已有漫上臨河低窪灘地者幸南壩工程加意防護雖疊經風浪仍屬穩固至所挑新河前月杪本可全行告竣因大雨之時不能施工而止後又須先將積水戽盡再行挑挖不無畧逾時日今已於初一日一律全竣現在河水比引河底已高一丈有餘溜勢亦挨近引河口之土堰再察看

大河水勢俟溜頭更加撞逼時卽當相機開放務期一開卽掣溜全歸故道則此後諸事俱不至棘手矣奏入

諭曰佇待大溜順歸故道卽聞佳信

十六日

諭曰據袁守侗等奏沁水漲發民埵漫口一摺沁水應滙入黃河則黃水自應長發乃摺內又稱日來天色晴朗河水甚平未能卽放引河殊不可解著傳諭阿桂將現在儀封工次黃水情形若何沁水滙入後黃水會否長發因何尙未開放引河約計何時可以開放之處迅速

覆奏以慰靡念

二十四日

公僭陳輝祖奏言查此次沁丹盆漲雖因水勢驟長至一丈有餘以致衝漫民埝十餘處但其退尙速是以不數日內口門窄狹者已淤卽較寬者亦間有露灘之處堵築自易爲力所有應集物料及調派兵弁夫役之事俱經陳輝祖會同袁守侗在彼逐一經理盆又飛調府廳等官前往會辦現在上緊施工竭力催僱使漫口卽可刻期堵合以慰

聖懷其漫水所經之處高阜地面水消甚速惟低窪之處
尚有積水民舍田廬不無稍損已派委誠幹之員
分路履勘加意撫綏至沁丹二河所出之水由北
趨而歸入衛河者已居其半其由南面漫出固係
仍歸入黃河但在引河上游荆隱工一帶又已漫
入黃河兩岸灘地及至儀封一帶正河水勢已減
然其時比較新引河尺寸本儘可開放緣臣阿桂
等先經詢問南河做工之遊擊封捷及已革叅將
李永吉據稱此次王家莊引河形勢固爲極順但
開放後必得三四日汎水不落庶能將河口衝刷

深通方不至汎水落後又有淤阻伏汎內水勢雖
可大長第恐有消落太速之慮不如秋汎之水可
以多停數日且伏汎之水十分內帶沙七分若驟
消後每易更淤亦不如秋水之沙較少臣阿桂初
時尙未深信其言及至此次沁丹盆漲除上游漫
灘之外儀封十堡水勢亦曾驟長正思開放引河
不一日水卽驟落嗣又長水一次其陡長陡落情
形亦與初次汎水無異且大河內流緩之處淤沙
甚厚始知該備等所言竟爲確實是以引河尙未
開放伏思此次所挑王家莊引河係斟酌再三惟

恃此以望有成不得不益加慎重現在派令道將
等坐守引河口朝夕察探水勢如伏汛內長水時
看其光景似可停蓄三四日卽當相機啟放否則
距立秋已近秋汛之水接踵而至其時水落較緩
挾沙亦少似於開放引河更爲有益奏入

諭曰所見甚是自當持重若放而復淤前功盡棄雖日夜
盼望佳音亦無可如何也

三十日

諭曰袁守侗前往儀封下游一帶查勘隄岸河身情形一
摺極爲詳晰周妥所有查估應行鑲培之處均應照所

奏辦理阿桂自可無庸復往履勘其南河各工亦經薩載等查勘籌辦奏聞在案亦無庸阿桂復往會查現在王家莊引河已經挑成只待秋汛一盛即可開放阿桂於開放引河時看其果否掣動大溜暢注直下歸入正河岔看漫口處曾否掛淤則大局已定阿桂奉差之事即爲告竣可起程先至行在覆命候朕面詢一切再行回程畱京辦事

七月初十日

公偕袁守侗陳輝祖奏言此次挑挖王家莊引河工竣臣等本擬俟大河汛水長發即當相機開放

乃自中伏以後水勢愈加增雖其力量甚猛而丈尺則轉見消減竟與尋常歸槽時無異凡屬在工員弁及做工人等皆以爲年來罕見是以朝夕探量守候未敢卽開引河至引河形勢溜頭趨赴北岸實屬至順將來設板後自能掣動大溜奔騰直瀉而工葺之後尤不可不籌度萬全庶免後累查此處大河河底本係南高北下而自此以東十六堡漫口刷深已久又屬西高東下水勢順流東注業成熟路不得不預防其向東旁瀉因公同詳酌擬於開放引河後再由南岸添築挑水壩一道

以逼東溜勢向北不合日後又有分趨並恐十堡
單壩合龍尙未能萬穩擬於挑水壩之東十堡大
壩之西作順黃壩一道爲重門保障先由北岸做
起則既有挑水壩以東之使北又有順黃河壩以
逼之注南再轉而向東水勢曲折回環更不慮其
不注引河而順黃壩以下即可望其日漸掛淤十
堡合龍自爲易易此意與兜袖之法相同但用之
口門太窄時恐其前後汕刷著重今挑水壩與順
黃壩相去尙遠更可無虞臣等本意原係如此近
因伏汎內水未加長不能開放而核計舊存物料

之外若再稍爲購辦卽可敷挑水壩之用因令姚立德及道將等上月十八日先將挑水壩趕築業經做有一百二十餘丈溜勢已逼往北岸現在仍行接築使之愈遠愈近則秋汛內卽長水無多而大溜提起撞逼引河亦卽可開放若日內更得汛水加增數尺卽不拘時刻亦不必俟壩工做完迅速啟放奏入

諭曰覽奏俱悉盡心妥協可也

二十七日

公偕袁守侗陳輝祖奏言此次王家莊引河挑竣

後因中伏以來河水總未加長未敢即開引河而
臣阿桂已先經慮及工程關係緊要若水勢竟不
加長斷無株守以待之理是以於六月十八日起
即先將挑水壩開工趕築逼溜北趨並擬於開河
後在挑水壩之東十堡大壩之西作順黃壩一道
使水勢益得全注引河嗣以河水仍未見長復上
緊進築挑水壩現已做成二百丈並將擬築之順
黃壩亦先行興工北岸連壩臺現已做有四十餘
丈此即係就河水恐不長大情形設法籌辦必期
有成今南岸因挑水壩挑溜北趨壩後一帶淤灘

甚長因亦創槽向北鑲做目下察看大河情形大
溜卽已奔趨北岸而順黃北壩之西復刷有回溜
西注所有引河頭外淤灘已漸汕刷窄薄情形日
見順利且引河河底低於大河水面數尺此時若
卽開槽引放已無不可但現在水勢尙小恐開河
後總未能奔騰暢注是以尙在遲待今本月二十
日夜得雨至二十二日早方晴河水漸有增長之
勢且雨勢寬廣計上游一帶亦必有水下注是以
擬再稍停一二日俟開河後卽行奏

聞今奉到

聖諭仰見

聖心廑念河防勤勞宵旰查此次引河地勢本順又加以挑水壩之逼溜順黃壩之兜溜辦法更屬不遺餘力就引河之地勢與現在情形而論卽水竟不大長順黃壩日逐加展再做至數十丈以兜蓄水勢逼溜直入引河亦斷無不成不至再有經年累月之計若日內河水更加長發則又當卽放引河更無庸俟順黃壩之再行展做數十丈矣至

臣阿桂

前次雖接奉

諭旨令於開河掣溜後先行起程但念

皇上委辦重務若未屆人人以為必成之時先行回京竟似以艱鉅貽人間心何以自安擬於開河後察看形勢若須多任數日即親自督辦順黃壩工今開河之期較前既又稍遲計算

聖駕未往木蘭之先已不能趕赴熱河而順黃壩工臣阿桂現在親自督辦計算合龍之期總不出八月之內一經合龍即當馳赴

行在覆

命奏入

諭曰據阿桂等奏本月二十日得雨至二十二日早方晴

河水漸有增長之勢擬再停一二日即可開放引河等語覽奏稍慰已於摺內批示此次引河地勢本順又加以挑水壩之逼溜順黃壩之兜溜阿桂等所辦已極慎重周詳現亦無可指示之處俟引河開放後應詳悉繪圖隨摺呈覽此時惟佇俟佳音耳

八月初三日

公偕袁守侗陳輝祖奏言大河水勢漸次加長至三尺餘察看引河頭外溜勢頗順而節氣已近白露恐以後水勢并不能如目前光景未免失此機會因於二十六日辰時即將引河上唇啟放三四

十丈初開時河水奔騰直注勢甚洶湧大濶竟似
吸動口門跌有深塘迤下正引河內俱有丈餘及
六七尺不等不特臣等心生喜幸卽在工員弁人
人目覩無不以爲大順及至午刻河水漸落引河
頭流勢遂緩不能如前至夜所有長水又已頓落
臣等隨察探下游水頭於是日下午卽過大河身
之榮華寺并抵三家莊地方惟因河頭進水已緩
下游流勢更平不免稍有淤墊且查前此郭家莊
引濶溝開放後旋值上游漫灘之水下注亦不免
有停淤曾經竭力挑挖此時若不卽將引河頭堵

台恐全河俱復受淤因卽將上脣仍行疊築土堰
所有引河頭掛淤之處挑挖尙易而正引河以下
至舊河身現派誠實可信之大員乘坐小船一路
探量一面飛調員弁夫役分段抽挖至榮華寺以
下舊河雖並無淤墊但其通身形勢本不免稍高
且直達江南境內道里綿延固不能會行疏濬若
其中或有必應抽挑之處亦令委員詳加履勘酌
量辦理至於籌辦形勢究以何處爲得宜臣等復
集詢在工之南河東河文武員弁據稱上游旣別
無可辦地面而十六堡漫口又斷不可以施工惟

有現做順黃壩河面卽水落歸槽而引河總以王家莊最爲得勢葢工尙有可望惟現須勘查引河所有兩處工程雖仍逐日進築第無庸過於迅速俟引河疏淤將次完竣之時再行計算時日儼緊堵辦合龍

公又奏言查王家莊引河挑竣因中伏後汎水總不見長隨趕辦挑水壩及順黃壩工原係慮及河水若竟不長則惟有築束兩壩以爲蓄水開放之計是以於前奏內聲明約計八月內完工昨因河水長有三尺餘大溜逼近引河口門因卽將上唇

啟放初時頗極順暢乃不及一晝夜間河水頓落
看來通工之人所云秋汛長水可停數日之說竟
爲不確而現在辦工各員仍主一面疏濬引河一
面築壩擠水之法臣與袁守侗等亦卽如此商辦
者實因引河形勢無如此處之順而蓄水之說春
間原曾經過約蓄至三四尺高尙於壩工無碍且
蓄高之水較長發之水爲可恃不至有陡落無繼
之虞臣雖不諳河務不能確有主見而事事體驗
似河工事宜亦竟無十分應手之策惟揆之於理
較勝者可就此籌辦以望其有成但現在引河復

須探量挑濬計其時日又不免稍遲臣心倍加焦急而捨此實更別無辦法均奏入

諭曰據阿桂等奏二十六辰時引河上層已啟放三四十丈大溜竟似吸動午後流勢漸緩至夜長水又已頓落等語實屬可惜已於摺內批示矣據稱現在一面疏濬引河之淤一面築壩擠水俟引河疏淤將次完竣再行計算時日趕緊堵辦合龍亦祇可如此籌辦引河開放既不能得勢惟有蓄水逼溜以期堵築合龍惟在阿桂等悉心妥速爲之朕亦無可指示也看來該處情形蕩事尙須時日計此旨到彼已近萬壽阿桂正不必以趨

赴行在為急務須上緊籌度擇萬安之計趨辦合龍以

副朕懷

恭錄

御製詩

阿桂奏王家莊引河情形詩以誌悶

十六堡知功難就因之籌及王家莊引河深濬可吸溜則

亦從之令慎詳

十六堡漫工屢築不就阿桂等議移上游七堡之王家莊開引河勢順且直因如所

請諭令妥慎為之

自夏徂秋逮兩月不加督率厯南望邈緣水長

三尺餘况近白露候已涼恐失機會因啟放初時奔注誠

汪洋而何半日勢遂緩下流不免仍淤塘

先是阿桂奏開放引河須俟汛

水大長相機妥辦是以數月來雖日夕塵懷從未督促今據奏河水近長三尺餘且時屆白露不宜再遲因於七月二十六日辰刻開放引河初時勢甚暢順過午漸緩至夜河水頓落口門又復停淤現在竭力疏挑並趕築順黃壩以為通濶計只可無已復為蓄水法接築長壩圖順黃河聽其妥速籌辦矣

決吾亦經之屢江南河南黃河漫口所經已多堵築合龍遲者或三四月或百日速者不過一兩月從無似此次之未如此次為時長嗟哉豫民受昏墊愧心年餘未成者

蒿目徒茫茫秦省近經報得雨今年豫省伏秋兩汛總未大長由上游秦省夏雨短少之故今日署陝撫富綱奏西安於七月二十日甘霖大沛雨勢甚廣此後河水或可冀加長足為開放引河之助未識能如雨優水足應倍長源漲委必益浩瀚庶幾因是所望否

功堪償吁嗟行水慚無術七言識事增徊徨

初四日

諭曰昨據阿桂等奏開放王家莊引河初甚暢順半日以
後河水頓落引河口門一帶仍復停淤深爲可惜阿桂
等現在一面挑濬引河之淤一面趕築壩工逼溜亦只
可如此辦理舍此更無良法已諭阿桂等悉心熟籌迅
速妥辦矣黃河漫口之事所經已多速或一兩月遲亦
不過三四月無不堵築合龍從無似此次之經年未成
者朕因此煩懣異常懸念無時或釋今開放引河又成
虛望覽奏徬徨竟夕不能成寐因思汎水未經加長大
溜自必稍平旣不能助勢暢達引河則十六堡漫口之
水應亦不似從前洶湧今引河旣不足恃自仍以堵築

漫口爲急但十六堡口門跌有深坎難以施工自應卽就現做壩工之處速爲堵築前據阿桂等奏挑水壩已做成二百丈北岸之順黃壩亦做有四十丈卽係恐河水不能甚長設法預辦以期有成等語所籌甚當若卽將順黃壩迅速接築加長步步鑲培厚實俟與南岸之挑水壩相離不遠卽可相機設法合龍目今新料已收足供應用計無有出於此者未識阿桂等主見如何與朕意相合否著傳諭詢問令其卽速妥酌奏覆

十二日

公偕袁守侗陳輝祖奏言竊以豫省黃河漫口久

稽堵合不特河南儀考等處及安徽蒙亳一帶小
民未獲寧居而以全河滙注於淮其所係尤爲至
大臣阿桂在京時每日親見

皇上縈懷此事無時稍釋今復稽延數月尙未葺工

聖主倍切憂勞實由臣等不諳河務愚昧無能所致不勝
寢食靡寧今接奉

諭旨以開放引河又成虛望覽奏徊徨竟夕不能成寐臣
等跪讀之下益覺愧懼汗浹無地自容查儀封十
六堡漫口堵築半年迄難成事其地實斷不可施
工卽十堡攔黃壩堵工屢被衝失河底不淨跌塘

亦深辦理亦復費事是以相度形勢惟王家莊引河最爲得勢初時原欲俟水大長開放掣溜則壩工堵合甚易乃自伏前漫灘一次之後長水總不甚大因卽趕辦挑水壩又續做順黃壩以爲竟不長水束壩逼溜之策及至前月下旬河水長有三尺餘因卽啟放引河亦冀先得掣溜不意引河一開長水卽日頓落而順黃壩興工未久口門尙寬不能得兜蓄之益以致未獲卽成然臣等仍定於此處趕築者實以在工員弁無不以爲必應如此籌辦且羣稱開河時大溜本已吸動則其得勢可

知伊等衆口如一固非有心迎合臣等而臣等體察情形亦以爲如此籌辦可望有成並非稍有遷就冀掩目前也今恭讀

聖諭以應就現做壩工之處速爲堵築實爲至當不易惟挑水壩本爲逼溜趨入引河而設偏著西首去順黃北壩有一百四五十丈若欲就此聯接則中間河浚甚長難以著力而順黃壩工北壩已做出五十丈南壩亦幾及有一百五十丈所餘河面不滿百丈亦爲較近是以臣等現就順黃壩南北兩壩並行進堵堵築合就亦與

聖明指示相符現仍一面挑挖引河淤淺一面進築壩工
俟口門收窄時河水自必蓄高卽相機啟放日夜
趕辦堵合以期此次必成冀得仰紓

宵旰稍安臣子之心奏入

諭曰祇可如此盡力爲之以俟

天佑神助耳

二十四日

公偕袁守侗陳輝祖奏言臣等於本月初七八日

兩次覆奏趕辦順黃壩工及挑挖引河淤淺以圖

蓄水啟放等情俱已仰蒙

聖鑒其前摺內所奏趕緊辦理以期此次必成旬旁奉

硃批是勉力爲之約於何時可放引河合龍具圖貼說奏

來籍查現在壩工之遲速惟視水勢之深淺緩急爲斷

水淺而溜緩則做工丈尺易多水深而溜急則進

埽必須慎重此次所做之順黃北壩其地適當大

溜趨注初開工時卽已水深著重是以輒鑿十數

丈後卽行進埽每下一埽必兩晝夜方能到底而

自八月初河水旋長旋落之後初十外又漸長如

上次試放引河之時埽外水深五丈餘尺溜勢甚

緊埽箇到底較遲臣等惟恐所做之埽稍有蟄動

關係非小是以督令加倍鑲壓晝夜不停並趕做邊埽以爲外護工程幸得平穩日內河水漸覺消落卽又進埽趕辦其順黃南埽因長有淤灘可以輒鑲工程較速現在連前做有一百七十餘丈並一面趕做邊埽至水勢雖較前漸深然尙可接做輒鑲俟進至溜中不能鑲做方擬下埽目下口門剩有七十餘丈河面尙寬將來南北兩壩進埽漸多口門漸窄約計九月初旬不過餘存二三十丈水勢自可蓄高而引河挑淤之事彼時亦可一律完竣計期總在初旬可以相機啟放屆霜降力

編之時施工較易然以口門二三十丈計之亦須
搶做十餘日約九月二十後可望合龍此時不特
臣等盼望甚迫即在工員弁亦無不思迅速蒞事
奏入報

聞

二十六日

諭曰昨據阿桂等奏現在趕做順黃南北兩壩口門祇剩
七十餘丈將來進埽漸多口門漸窄約計九月初旬不
過餘存二三十丈水勢自可蓄高引河挑淤之事彼時
亦當一律完竣總在九月初旬可以相機啟放掣動大

潤其時正屆霜降施工較易堵築二三十丈之口門須
搶做十餘日約九月二十後可望合龍等語伊等現俱
實力速辦無俟朕再爲督促惟冀如期蒞事以慰塵念
至閱上次進到之圖順黃壩尙距大隄不遠將來補接
自易其北壩則竟齊河身做起並無隄岸倚靠今兩壩
中間堵合而北之壩頭似未靠實地未爲妥善因復思
圖內十堡北岸尙有圈堰一道由十八堡上舊攔黃壩
起至十堡對岸而止前所做北壩卽接圈堰做就較爲
合法今亦應將此堰接長使現做壩工得有所接不致
落空方妥因用硃筆標識起止阿桂等卽速爲籌辦其

堰壩等工務須鑲築堅實以期鞏固至順黃壩合龍後
並須將十六堡漫口仍行補築完好俾資重門保障尤
堪經久無患

九月初五日

公偕袁守侗奏言臣等趕築順黃壩工自前月二
十一日起北壩仍逐漸進埽現已進至第十箇俱
係加鑲騎馬層柴追壓到底而埽外仍水深五丈
餘濶勢如前湍激是以每下埽必鑲壓兩三日視
其實在穩實方可再進其南壩仍用輓鑲又經接
展二十餘丈日內埽外水勢已四丈有餘亦不能

復用輓鑲現在趕築壩台一兩日後亦卽下埽其
兩壩所築邊埽逐漸隨進並又加添土戩以爲內
外裹護工程更期平穩至引河挑淤之事目下亦
經完竣惟因兩壩雖共做有二百數十丈而口門
尙寬四十餘丈河水未能蓄高不便卽行啟放現
經飭令於未開河之先日逐詳加收拾約計南北
兩壩再加進築口門收至二十丈外則大河水勢
必可蓄高數尺自應相機卽行啟放而其時正值
霜降節候水力已綿自當晝夜趕辦壩工以期及
時堵合奏入

諭曰佇候佳音仍當慎重

公偕袁守侗陳輝祖又奏言臣等於八月三十日

接奉

硃筆標識原圖臣等恭閱之下仰見

皇上至聖至明指示機宜確當不易查前此所辦十堡攔黃壩工因恐夏秋漫灘之水由此洩入致貽搜後之虞是以先行添築圈堰一道接至十六堡東舊攔黃壩俟工竣時再行奏明培築成隄今順黃北壩係從郭家莊河身內靠厓盤做壩台以次接築壩後形勢實於十堡相仿誠如

聖諭應將此隄接長使現做壩工更得有所倚護方爲妥善臣等查大河水勢現在漸已歸槽擬於壩工合龍後將此一帶入於善後事宜一律接做圈隄與大隄相等則壩工更相靠實而壩後亦免汕刷自順黃北壩起至十六堡迤東止俱得重門保障更可冀經久無虞其南壩本距大隄相近並亦補築直接隄根至十六堡漫口雖築成圈隄後已可包裹在內但該處本係老隄不便任其空缺自應並遵

聖諭仍行補築完好卽十堡攔黃壩亦預與新工合龍斷

聞
流後一併填合口門以爲重隄固護奏入報

十四日

公偕袁守侗陳輝祖奏言

臣

等趕辦順黃壩工業

將引河挑淤已竣因口門尙剩四十餘丈水未蓄
高兩壩再加進築嗣自初二日至初九日北壩又
進埽三箇南壩亦進埽三箇鑲壓並皆穩實所做
邊埽等項亦俱陸續隨進目下口門剩有三十餘
丈引河頭一帶大河之水畧已蓄高且自挑水壩
做長二百丈後溜勢更逼往北趨臣等因見河面

尙寬恐其爲力尙小又接做三十餘丈此時引河頭外卽已著溜近岸鼓盪現擬再加接展挑水壩使之愈逼愈近而引河內挑淤完竣之後合鏟去逐土格將積存清水盡行放出業俱下注無存是其順下之勢更爲可驗此時若卽行開放已無不可惟是現在水勢力量已綿兩壩埽工又皆平穩若再進埽數箇使上游水勢更得蓄高則開放後更爲得力且開河後埽數仍須按數進築是趕築未開河之先前後總屬無殊而於蓄水機宜倍爲有益再查本年白露以後河水疊次長發總不甚

大而上南廳屬之楊橋裴昌廟十八堡下南廳屬
之黑隄下北廳屬之銅瓦廟等工中秋前後處處
著險溜勢上隄下坐堆注埽根較夏間盛漲之時
來時去隨時戡修者實有不同以致隨鑲隨墊并
潰及隄根當經臣分委南北二道赴各工督催搶
辦幸保平穩近日溜勢稍定尙未補鑲完竣本年
預辦歲料不敷經撫臣陳輝祖撥截大工料物接
濟竟與去秋情形相仿臣初任河防只恐水大工
險而看現在上游之溜勢又全以水之大小爲憑
雖與河員向云水大走灘水小走灣坐灣則生險

之說相符而細詢老年兵目土人僉稱向年白露以後水力日綿從未有如年來之險總緣黃河水勢難定實無別故惟有加意修防而已奏入報

聞

十八日

公偕袁守侗陳輝祖奏言臣等前因順黃壩工尙存口門三十餘丈水勢平穩可以多進數埽及接展挑水壩使河水更得蓄高再行啟放引河之處業於本月初十日專摺具

奏嗣自十一至十四日南北兩壩又共進埽五箇鑿壓

俱極平穩所存口門不過二十餘丈水勢既較前蓄高而挑水壩復接做十餘丈大河之溜更逼近引河頭動盪拍注其勢甚順隨於十五日子時將引河開放初開之時河流卽見奔赴下注亦甚湍駛河頭一帶當卽衝深六七尺不等察看下游已於本日卯刻過六十里外之三家莊並於午刻又過與山東連界之和好地方均屬黃流趨瀉迅激無阻看得大河溜勢已經分掣吸入引河口門水力亦減現在一面趕辦順黃壩工並擬再接做挑水壩使大流更得迅速全注引河則壩口水力愈

輕尤易尅期堵合奏入

諭曰欣慰覽之佇候合龍喜信

二十四日

諭曰本月十八日據阿桂等奏於十五日開放王家莊引河勢甚暢順一摺欣慰之餘盼望喜音益切雖今又經七日未見續奏時切營懷開放引河以後不卽具摺郵遞自係河流順適形勢並無變動無可入告之事奏報稍稀無足爲異但朕宵旰廛念計日而待不能不急望耳前奏稱十五日子時開放引河卽奔赴下注本日卯刻過六十里外之三家莊午刻又過山東連界之和好

地方是黃流趨瀉甚駛毫無阻滯大溜業經掣動按日而計似河頭應早抵江南境若已過徐州地面則是黃河已歸故道全局大定可無他慮惟當將順黃壩上緊接築及早合龍阿桂即可起程回京其十六堡漫口補還隄工及一切善後事宜交與袁守侗陳輝祖辦理亦自能妥協也

十月初四日

諭曰工部議駁袁守侗等覆奏豫省黃河報銷歲搶修工程銀數一摺所駁各條俱甚得理卽問之姚立德自亦無可置辯况既經漫口之後上游因何復有險工需費

國朝文獻通考卷之二
三
轉多於往歲更屬情理之不可解者但恐該省去年多
費果有不得已之實情並非屬員浮冒則又不可不核
實辦理今阿桂現駐河干督辦壩工無難就近查核著
傳諭阿桂卽會同袁守侗秉公確查或係浮冒應賠抑
係實用應銷卽行分晰據實具奏再降諭旨

二十八日

公偕袁守侗奏言接奉

上諭工部駁袁守侗覆奏豫省黃河報銷歲搶修工程銀
兩一摺著阿桂卽會同袁守侗秉公確查據實具奏查
豫省黃河兩岸乾隆四十三年分歲搶修等工共

用銀二十三萬三千九百二十六兩零內加高土
工銀四萬兩係前河臣姚立德奏明借動藩庫銀
兩辦理作兩年扣還之項應遵照原奏另案具題
不得列入歲搶修案內牽混報銷外查該省歲搶
修最多之年不過十四萬餘兩本年用銀十九萬
餘兩多銀五萬餘兩該省隄工四十三年分旣因
水勢稍大奏請銀兩預爲加鑲各工自應均屬穩
固何至時和儀封一帶屢行漫溢况漫口之後下
游正河已經斷流兩岸隄工何至受險卽上游河
水業已旁洩正河流勢自無壅塞卽須鑲壓亦當

與上年無異何得轉溢用銀五萬餘兩之多卽姚立德咨部展限原因駐宿河干堵築漫口不克分身查辦歲搶修冊籍並未聲明冬令後水勢猶險尙費搶鑲不能止工之語殊屬捏飾又稱揚橋等處屢墊屢鑲因額料不敷截畱趕赴大工物料濟用之處亦未據報部有案無憑稽查等語查河工歲搶修報銷關係工程帑項不容稍事浮混如果有冒銷捏飾情弊自當據實查辦今姚立德任內所辦乾隆四十三年歲搶修等工共銀二十三萬三千九百二十六兩零內除奏明借撥之四萬兩

應分年扣還外其餘比較工程最多之年尙多銀五萬餘兩在部臣以漫口之後下游正河斷流隄工何至受險卽上游河水業已旁洩正河流勢暢注不應復有險工似屬情理之不可解不得不加駁減但就臣等之目見耳聞畱心訪察又有實在情節應詳細陳明者緣黃河形勢本大而上年伏秋盛漲本屬異常是以惟儀封漫口以下正河業已斷流並無險工至其迤上一帶則仍處處報險在在有工况如祥符時和驛先已漫溢其下游不應復有受衝乃儀封十六堡續有漫決之後上游

亦宜減勢而緊接時和驛之八堡復有奪溜之事
皆衆所共知其見可見水勢往來衝突變遷靡定
是以凡有舊時險工之處仍多迎溜頂衝至上年
白露以後直至冬令搶築未停臣袁守侗在工知
之本悉卽如今年秋汎水勢較上年爲小而儀封
漫口未塞形勢又與上年無二乃白露以後南岸
之楊橋裴昌廟十八堡黑隄北岸之銅瓦廟等處
復塌隄蟄埽危險堪虞截料撥夫分頭搶護現在
尙有未停工作者此尤臣袁守侗之專責而臣阿
桂駐工日久雖未遍歷各處其情形皆得聞知則

上年之尙無捏飾更爲可信今復詳核工程案卷
併密行確切訪查俱係共聞其知無從弊混是此
項工程銀兩似爲理之所無而實屬事之所有誠
如

聖諭該省去年多費果有不得已之實情則又不可不核
實辦理所有臣等秉公確查上年歲搶修銀兩並
無浮冒奏入下部議行

十一月二十日

諭曰前據阿桂等奏順黃壩工口門未施工者止有七丈
餘現在上緊趕鑲計日可相機堵合連日盼望甚切茲

據阿桂等奏自下大埽後口門止餘四丈有零正在督令趨勢搶壓冀可合龍乃十一日早水勢猛湧異常陡將南壩蟄塌二十餘丈懷慚無地詢之徐建功等再上又無可移辦之處惟有上緊接做輦鑲雖有埽底仍屬無碍計工段亦不致過遲等語覽之深爲焦急然亦實無別法已於摺內批示矣因思向來衝蟄俱係北壩此則係南壩其壩身尙非頂流不致與水急爭今鑲壓補築似較北壩施工稍易或可期迅速蕲事亦惟有全力赴之一切皆臻妥善以待

天佑

神助耳至阿桂等懇請議罪議罰之處俱可不必伊等在工俱實心任事百計經營似此次之工虧一簣信非人力所能施意計所能及並非怠玩悞工不但阿桂不必引以爲已咎卽袁守侗陳輝祖有河工地方之責者亦不必各請議罪若如所見朕先當引過自訟然朕自昨秋豫省河工漫口以來軫念民艱日久縈望前後發帑數百萬以濟工賑之需復截漕糧十萬以爲賑濟之用而且蠲緩頻施凡有關於民瘼者無不籌辦實政止不過如此朕心不可不謂盡豈有因此而卽飾詞下責躬之詔乎近因史館進書偶閱元史河渠志見賈魯於

合龍時所設之法甚多行之果有速效或史冊過於溢美或今昔情形異宜自未足盡信其各法或有現已做用者或有難以施行者亦不可不知但史志既有此言寧可信其有著將此志節錄一段寄阿桂等閱看詳詢徐建功李永吉等或其中有可節取之處可做而行之如皆不可行不必因此過於拘泥俗諺所云有病亂投醫亦無可如何之一法也至十二月二十日爲皇孫綿億成婚吉期阿桂若能將合龍之事辦竣彼時能兼程到京固善但所指係阿桂孫女非必須阿桂一人專辦况現有伊子在京辦理一切阿桂卽不能趕回亦屬無

碍轉不必因此著急也

二十五日

諭曰前據阿桂等奏本月十一日南壩忽有蟄塌二十餘丈之事深爲厯念惟因向來衝蟄俱係北壩此次則南壩其壩身尙非頂流較北壩施工似應稍易隨卽馳諭詢問茲據覆奏現在南壩已輒鑿得七丈餘北壩亦輒鑿得二丈餘金門又祇剩十丈餘日內已做之工加倍填壓務合益得穩實俟兩壩再進兩埽卽可爲相機堵合之計等語就現在情形而論大有可望惟在阿桂等實力董辦以冀速竣日夕盼合龍喜音矣至所稱南壩

日逐鑲壓取用物料甚多而壩身終覺鬆軟不知其初因何受病等語自係填壓未能堅實之故向來下埽惟憑土壓所用之土似不過浮加未能令其到底著實朕意以爲如壓土加以夯礮自應堅固得力不知河工下埽曾如此辦過否若從未辦及不妨以此法試行之著傳諭阿桂等卽以朕此旨與徐建功等諳練之人詳細妥商而行

十二月十一日

公奏言

臣

子阿彌達於本月初七日到工面傳

旨諭令不必著急若因此飯食減少身體瘦弱轉不能

辦事如何使得况河務非如兵之全仗人力者可比伊
尙係有主見之人祇須立定主意愛惜身體竭力籌辦
何必過於焦慮臣跪聆之下不勝感激涕零伏念臣受
恩至深至重而以壩工屢築不就未能稍分

宵旰焦勞繼又值前次合龍後復被衝塌心神驚悸不覺
一時昏憤叙入覆奏摺內上煩

聖懷

優加體恤令臣子來工看視并荷

慰問再三臣心愈覺悚惕難安日內胸膈已畧覺寬舒雖
飲食仍未能加亦並不覺精神短弱臣自問血氣

尙好必無妨碍自當愛惜身體以冀竭力報効不

至再塵

宸衷至臣子阿彌達現令多住一日看視工程大概卽於

初九日令其起程回京覆

命奏入報

聞

十五日

諭曰據阿桂等奏德成於初八日夜間抵工將面奉諭旨
及硃批指示河圖形勢傳諭到工其南北兩壩一面遵
照諭旨由南壩向北輒鑿俟合龍時始兩壩並進至挑

水壩可否接注倒扎洪之處今擬於挑水壩下水斜向東北再接再做三四十丈如魚鱗埽或可得挑溜之益又硃筆所點諭令用船動盪令流勢趨入引河法實至善自當遵照辦理惟引河上唇一帶擬再開寬十九丈以迎溜勢等語均祇可如此做去看若有益更向前進亦可已於摺內批示矣此次河工合龍辦理實屬非易昨會德成前往亦因其畧曉工程且因伊曾堵築永定河漫口是以遣令前往原係無聊之極思亦於另摺內批諭德成到彼甫兩三日卽使在南北兩壩引河各處詳細查看其於河務情形亦豈能如阿桂等三人經年累

月駐工目擊之親切其所稱將倒扎洪之東另開河口寬二十丈長三百餘丈接入舊引河不必俟現挑引河完竣卽行合龍等語袁守侗因其言甚迫切商令止將倒扎洪再向東開寬十餘丈仍俟引河開完再行合龍不必另開一道亦係將就了事之見看來德成於河務全未諳悉而高興不經事其素性原係如此與其信彼莫若信阿桂等三人亦於摺內批示德成卽著回京不必仍畱工次阿桂等卽將原奏辦理各工督率員弁竭力上緊趕辦迅速奏功昨阿彌達回京奏稱挑挖引河須俟正月底完工計其時總在桃汛以前尙不爲遲惟

日夜企祝

天佑

神助早得蕝功耳

十九日

諭曰朕此次巡幸浙江於明春正月十二日啟鑾著大學士阿桂畱京辦事阿桂現在河南督辦河工其未到京之前畱京事務著大學士程景伊暫行辦理俟阿桂回京後卽毋庸同辦

是年第三孫那彥成入學

--	--	--	--	--	--	--	--	--	--

阿文成公年譜卷二十一



受業

王 昶 勘定

盧蔭溥增脩

第三孫那彥成恭纂

乾隆四十五年庚子六十四歲

正月初十日

公偕陳輝祖榮柱奏言引河工程日逐催趲新正以來夫役到工者更多所挑土方通計已有四分且開凍土鬆挑挖較前亦易其引河頭上層展寬十九丈者計長七十餘丈而于原估挑深丈尺之

外又續估挑深一尺五寸自上至下一律相等至挑水壩頭之冰凌立春後已漸化解現在開工接做人夫物料亦俱應手飭令晝夜不停以次進築並於北岸引河頭豎立標竿使之對准斜向東北不稍舛錯以收逼溜之益而順黃南北兩壩亦仍接做邊掃土戩俟引河工程過半再令南壩向北鑲築則口門收窄時引河亦可竣工不致有彼此等候及壩工著重之慮奏入

諭曰所辦均合機宜此時自應如此辦理惟望

天佑

神助於凌汛桃汛前迅速完工集事也此事昨袁守侗來
京時屢經召令與軍機大臣并德成同見朕再三指示
分晰是非并令袁守侗德成繪圖貼說進呈據德成所
擬於倒扎洪之東開引河寬二十丈長三百丈接入引
河爲接溜溝直達舊河順黃壩卽得合龍等語所言未
爲不可袁守侗以爲逼近北壩恐北壩受害則亦不可
行然尙近情理至所擬於十六堡漫口西隄隨水築順
水壩一道將溜勢逼過口門數十丈歸入舊引河則斷
不可行十六堡自前歲堵築五次未能合龍阿桂等始
不得已商移上游施工今德成乃欲於屢經決裂處所

做工鑲壩并欲將現辦垂成之工棄而不用是其執謬不通實出情理之外袁守侗德成所進圖說著另繪一分寄與阿桂等閱看至此事土方已經辦有四分惟冀人夫工料迅速蕙功以邀

天貺仍將現在添辦各工情形迅速覆奏

恭錄

御製詩

祈穀齋居

今歲齋居異昨年春屏仙木列粘駢峙庭雙栝雪倍澤遷

坐三朝樂徹懸幸罷希膏切畿輔京畿元旦新正連得瑞雪至今尚未消盡較之

往年齋居望澤
實深慶幸也
仍殷補漏繼河堧深寬加倍鳩夫役昨阿
王家莊引河頭之長三百丈者已開有七十餘丈又上下
一律加深一尺五寸現在鳩集夫役晝夜督辦其南北兩
壩亦仍一面接做邊掃土餞俾口門收窄時引河挑挖亦
可同時竣工不致有彼此等候及壩工著重之慮云云所
奏引河壩工同時併辦之處頗合機宜惟盼喜音速至迅奏合龍成功耳冀即成功奏喜箋

十五日

諭曰前據阿桂等奏引河工程業經挑有四分且現在係
開凍土鬆挑挖較易等語計阿桂拜發此摺已及一旬
未據續有奏報朕因南巡經過雄縣一帶途次積雪未
消於行程雖覺和美而天氣甚寒東北風亦大因念豫
省距此不遠氣候風色或大畧相同該處是否不致冰

凍挑挖施工尙不費力否朕心深爲廛念堵築漫口已閱一載有餘此次引河工程務於二月內告蕝俾大溜歸槽漫口合龍方爲妥協

公偕陳輝祖榮柱奏言自初七日後引河人夫因新年已過時值空閒俱欲趨工謀食遠近趨赴愈多挑挖日有起色統計現在已有六分月內必可一律完竣至大河冰凌業已全化挑水壩亦以次接做計舊做工段之外又斜向東北接展十餘丈緊對引河上脣看其形勢甚順自當更往前進愈長愈好使大溜不能不直走北崖則開放引河倍

爲得力其順黃南北兩壩邊埽業已鑲與正壩相
齊厚土填壓甚屬堅實所澆土餞亦有過半工程
開河之先儘可辦竣此時金門所剩丈尺雖屬無
多而約計尙須展做七八丈河水方能蓄高目下
若預行前進則可多爲填壓壩工益得穩固是以
現在卽緩緩接做輒鑲俟水勢湍激不能輒鑲時
再行下埽臣等惟有竭力趕辦於桃汛未屆以前
堵合竣事奏入報

聞

公奏言竊查德成所奏倒扎洪之東另開引河一

道及十六堡漫口西堤築順水壩之處業經

聖明洞鑒一是一非無庸臣再爲贅及至德成在工所言

止有倒扎洪之東另開引河一說彼時臣曾詢以

如有所見不妨盡言據云捨此再無別說是以臣

前奏內稱其他并不能指出不合之故其十六堡西

堤施工一層德成在工並未言及且伊與臣相見

數次俱有袁守侗陳輝祖姚立德一全在坐並無

與臣獨自會面之時其曾否與臣說過袁守侗現

在隨

駕可以就近

飭詢而知至德成到工後臣自揣雖並無矜傲失禮而其
在

皇上前奏對光景尙係如此更不待臣之陳辯但臣督辦

要工一年未竣久煩

宵旰問心已刻不能安復以不能令德成心服更致上煩

睿慮臣實慚悚彌深而因事

訓諭不使臣不知不覺自蹈愆尤尤足感我

皇上成全期望之大德臣每竊念受

恩愈重則此心愈不可放是以前次臣六十歲時蒙

賜詩內有不說保全勗黽勉之句臣朝夕銘刻在心惟冀

多邀一番

訓誨即可多增一番警醒臣深望我

皇上時加

訓誡提撕庶有則改之無則加勉以冀稍免愆尤斷不敢
絲毫存自恃矜傲之念奏入報

聞

二十一日

公偕陳輝祖榮柱奏言王家莊引河工程因新正
以後人夫雲集日逐見功實挑有六分以上雖本
月十三日以後連朝風雪土復結凍而夫役計工

謀食不肯就閑雪止卽出力作且此次分段派員較多各知催儻設法挑挖卽挑水壩接做十餘丈後因大河復有冰凌展築較難然亦敲鑿施工並未株守坐待臣等竊計引河工程此時卽耽延數日而大局總可於月內完竣目下天氣已晴尙覺寒冷夜間仍復結凍巳午以後方見和解然引河仍可竟日挑挖其大河復聚之冰凌雖未全解而春令融化較速是以挑水壩頭一二日內亦卽可展做計期不出正月引河可大段完竣再行詳加收拾并俟挑水壩多做數十丈時卽可開放引河

至順黃兩壩所餘口門本屬無多日前所做輒鑲業已到底現厚土填壓俟引河將成時再相機進築臣等惟有竭力趕辦務期於桃汛未屆以前全行蕙事奏入

諭曰覽奏俱悉邇日復東北風作雪甚寒遙念彼處實切憂勞也

公又奏言臣奉

命督辦豫工已逾一載今挑挖王家莊引河工程將屆完竣其挑水順黃各壩亦俱陸續進築看其形勢頗順仰賴

天神庇佑大工一經告蕝所有善後事宜即可照平日公

同酌議章程奏明交河臣陳輝祖撫臣榮柱以次

辦理臣自當遵照前奉

諭旨無須在工督辦惟念臣未覲

天顏爲時已久實不勝犬馬戀

主之忱且前數次

聖駕南巡臣俱以奉差塞外未獲扈從臣出差所至地

方甚多而蘇杭等處則從未一到今恭逢

鑾輅時巡寸衷倍切歡欣鼓舞而留京大臣又有程景伊

英廉且現在亦無應辦緊要事件臣不揣冒昧仰

懇

皇上天恩准令於壩工合龍後卽趨赴

行在稍展依戀之私併得一瞻

盛典奏入

諭曰自當來却不必畱而扈駕至於來時必俟工程甚安
十餘日後方可起程

二十七日

公偕陳輝祖榮柱奏言自二十日以後天色晴明
惟早晚尙覺寒冷日出後始漸覺化凍然於挑挖
之工並無妨礙日內氣候亦漸溫和通計引河工

程已有八分并間有數處大段已完者臣等卽先
往查驗復令詳細收拾此外亦俱上緊催趲自可
不致遲延至挑水壩頭之冰凌竭力敲鑿至二十
二日始得開動施工又經接做十餘丈并已添做
魚鱗邊埽連前共有二十餘丈現由壩頭斜向東
北量至引河頭標竿處所尙有百丈以內自當再
趕做數十丈使大溜直向北趨更爲有益其順黃
壩所澆土餞已將次完竣現擬加高并鑲防風以
爲外護至金門丈尺所剩本屬無多日內上游河
水較增溜勢稍緊若於引河完事之先遽行進築

恐口門太窄壩工不無著重是以現將已做之工日逐廂壓堅實俟引河尅日全完再一面相機進築則河水一經蓄高即可開放引河以爲堵合之計奏入

諭曰自二十五日此間西南風方幸可以放溜摺中並未提及又係二十六日所發摺自然尙未成功殊深厯念也

諭曰據阿桂等奏自正月二十日以後天氣晴明日出後化凍挑挖即可施工通計引河工程已有八分并有數處大段已完者此外亦俱催儻緊急至挑水壩以次接

做自當再趕做數十丈使大溜直向北趨其順黃壩所
澆土餞現擬加高並廂防風以爲外護俟河水一經蓄
高卽可開放引河以爲堵合之計等語自應如此趕辦
查此間距開封數百里昨二十五日西南風甚大方幸
可以放溜今二十六日所發之摺何以並未提及近日
風信甚爲厲念據摺內稱引河工程已有八分計所差
不過一二分兩三日內料可完竣此時諒已辦完何日
可以放溜盼望之至

二月初十日

公偕陳輝祖榮柱奏言查此項挑水壩續行進築

以來大溜專走北崖又自初四日南壩進埽以後
大河水勢漸長至初六日晚間比較引河底高至
七尺有餘全溜直撞引河頭土堰頻頻衝刷有怒
不可蓄之勢因卽開放引河奔騰下注聲壯勢猛
大溜頓見掣動至初七日卯刻已過百餘里外之
和好地方水色渾黃流甚湍急且初開時兩壩金
門頓落水一尺次日又落水四寸壩工更爲穩固
因將北壩應接之門埽卽於初七日早間趕進現
在層層鑲壓雖金門之水本深七尺有餘又已收
窄水勢不能不滿洶而其力量則比未開時已見

輕減臣等連日察看引河光景實已掣溜六七分
金門現寬已不滿六丈俟南壩再進一埽即可相
機堵合奏入

諭曰今日渡黃陶莊

神祠默致虔禱卽聞此信實切欣慰然必俟金門合龍
大河順歸故道方釋此懷耳

恭錄

御製詩

阿桂等奏報引河已放溜詩以誌事

陶莊顛

神佑即日得佳音

陶莊引河初成即勅建河神廟以答嘉貺茲初十日渡黃瞻禮神祠默

致虔禱即於未刻得阿桂等馳奏稱初六日晚間開放引

河掣動大溜奔騰下注至初七日卯刻已過百里外之和

好地方且初開時金門頓落水一尺次日又落四寸察看

引河實已掣溜六七分現在相機堵合等語是甫瓣香申

悃百里外即荷神佑引溜就新速歸川赴舊深翕然庶

垂貺更期迅速合龍耳

無變

垂貺倍昭謚必俟合龍後吾方敢慰心

十八日

公偕陳輝祖榮柱奏言引河日見暢達又連值順

風大溜分掣至八分以上兩岸並見場崖因於初

九日南壩又進門埽一箇金門止寬三丈有零惟

水深十餘丈勢尙湍激臣等本欲俟引河多流數日上下暢順再行合龍不意十一日午刻兩壩卽先自攏合隨上緊填壓未逾數刻金門立見斷流祇因上游本有雨雪融化春水已至而金門斷流之後河水又驟然湧高增長至一丈七尺以致兩壩腰漏掛簾之處甚多詢據李永吉等俱稱歷來合龍後必有之事臣等親身住宿壩頭率同文武各員分頭搶築竭四晝夜搶壓不遺餘力現在尙有一二處腰漏其南壩後之餞壩亦因從迴流汕空水定後漸漸塌散而正壩仍然屹立如故現在

儘力加倍廂壓並趕添邊埽以爲外護且大流已於十一日全入新河壩前俱係停水而長水亦已漸消退歸槽自可益望穩固奏入

諭曰儀封此次漫口堵塞一年有餘至今始得斷流雖據奏尙有腰漏之處但徐州一帶已歸故道再能加倍鑲壓趕添邊埽外護自可合龍閉氣佇待喜信速至

恭錄

御製詩

阿桂奏報將合龍形勢詩以誌事

未敢稱工就先期達喜音金門潤已斷竹箭落猶深

阿桂奏儀

封决口於本月十一日午刻兩壩擁合隨上緊填壓未逾數刻金門立見斷流大溜全注引河但尙有一二腰漏處未屆十分放心不敢卽馳報合龍然十一日金門業已斷流大溜全入新河壩脚俱係停水而長水亦已消退等語腰漏誠無礙脚停亦漸沈黃流將到浦薩載奏黃水已長已據稟報黃水已到桃源境內至九尺餘十六日距清黃交滙處不過百餘里 葺事庶幾今

二十三日

公偕陳輝祖李奉翰榮柱奏言自本月初六日開放引河後日見暢達又連值順風全河溜勢掣動八分因於十一日趁機堵合未逾數刻金門立見斷流大河全入新河其有腰漏掛簾之處率同帶往司員馮應樞舒濂并司道知府等分頭督催竭

數晝夜之力金門一帶俱已閉氣從前水深至十
一丈者均已停淤止剩四丈餘所有腰漏等處亦
俱填壓堅實從此黃流順軌永慶安瀾奏入

諭曰昨據薩載奏徐城誌椿長水一丈一尺餘雲梯關長
水四尺九寸溜勢湍急全黃已復故道直達歸海此次
儀封決口辦理幾閱兩載特命重臣前往經理發帑五
百餘萬兩近復將引河大展寬深接做挑水壩逼溜北
趨始將溜歸正道荷蒙

天佑

神助幸得成功朕感謝之餘益深虔敬向來河工漫口

合龍例得邀恩議叙但亦應計時日久暫如三十九年
老壩口隄工漫溢二十日之內卽報合龍在事大臣自
應加恩議叙至此則幾閱二年之久方克蕝事朕惟
感謝

天恩

神佑而於朕心方深愧歉卽在事大臣如阿桂等休戚
相關誼均一體亦不肯仰叨

天功更邀議叙至分頭督催之司員馮應樞舒濂司道江
蘭王啟緒朱岐張有年沈啟震康基田等晝夜催儻分
力宣勞非大臣可比著仍交部照例議叙

又

諭曰據阿桂等奏報引河放溜金門合龍一摺已於摺內批示并另行頒發諭旨阿桂等俱卽遵照辦理此次漫口屢成復毀至今始得葺工河歸故道朕心旣以爲慰亦以爲慙阿桂等皆當共體此意現今工已合龍漫口老隄最爲緊要阿桂務將老壩隄口督催堵築堅實以資鞏固方可起身再漫口雖堵閉其壩內所存餘水務令設法除去使其涸見河底再行填築實土方足以資保護此時朕已駐蹕蘇州不日卽可回鑾將來阿桂卽於江南途次迎謁或竟至山東路上亦不爲遲總以河

工善後堵築老壩隄工堅實及壩內積水盡涸爲要不
必急急前來也

恭錄

御製詩

阿桂等奏報儀封合龍工成詩以誌事

决隄雖幸築時和四十二年秋間儀封與時和驛先後决

一月杪始得合龍而儀封新工復有蟄陷遂至濡滯年餘工滯儀封一歲過治水江南

宣手熟儀封漫口後即命大學士高晉率諳習樁屬薪山

左運肩摩儀封堵築漫口所需稽料較多恐本省採買不

購買稽料幾成復變誠胡謂復議移於七堡築順黃壩又

運往應用

於王家莊展開西掣東穿竟若何幸以開寬引大溜上年

引河以掣溜勢將引河大加開展寬深又接作挑水乃

壩逼溜北趨黃水始掣入引河復歸故道金門合龍

能翁受復原河文埋徒憶酸棗叙式作應同瓠子歌慰以

為慚功奚有祇覺賠例廣恩波此次漫口幾閱兩載始獲

為慚即在事大臣如阿桂等自亦不肯仰叨天功更邀

甄叙惟司員及司道知府等官非大臣可比仍令交部議

叙至漫口糜費銀兩照例亦應著賠但此番辦理情形實

非比前數次阿桂等悉心經理亦不遺餘力所有用過工

料銀兩悉准奏銷毋庸議賠惟決口究由平時防護不愼

所致因傳諭阿桂查明河臣姚立德撫臣徐績任內所辦

聽言

聽言豈易哉能聽貴能斷昨以築河隄踰年工未辦而每

宣示中外令知辦理庶務一秉大公云

敗垂成洪流益汗漫因命德成往上年十二月初儀封漫

未葺工德成尙畧曉工程作法召見指示機宜令賣圖前

往詢阿桂等并賜花翎原望其竭力贊襄成事豈意其因

與阿桂不合挾私自用一到庶幾竭力贊一到即欲速欲

即欲見長翻案因即名回

見長翻案名迴息其事面陳仍巧辯德成回京面奏復肆

漫口築順水壩一道逼溜過口門數十丈歸入舊引河等

語彼時以十六堡自高晉袁守侗等堵築五次未能合龍

阿桂等始不得已酌移上游乃德成復欲於决口施工其

執謬斷不可行况德成辦事遠不及阿桂并亦不如袁守

侗陳輝祖其到工時日久暫又甚懸殊豈肯因伊一人巧

辯輕議更張遂决意不從其請草去前賜花翎并令軍機

大臣存記候阿桂引阿桂與德成二人優劣判守侗袁

輝祖陳亦過彼謂德以半况三者閱久豈遜一人算大工及

成

已逮成更張益增亂决意斥其言拒諫吾弗憚然彼究因

可文戊公手曾 卷二十一 七

公寬之待功奠即今河已復缺隄亦完繕挺險敗事徒吏

議詎宜道

阿桂奏二月十一日金門斷流二十日鑲壓堅實河工告成是前此幸斥德成浮議得以成功

合龍德成之挾私噤瀆挺險敗事罪實應得究以事出因公僅交部議處蓋欲以廣進言之路而聽言者亦良難矣

為君實難乎一端識非漫

二十八日

公奏言 臣前奉

諭旨將豫省南北堤工應行修補者復加詳細勘估奏聞

興工查此項堤工上年俱陸續辦竣惟南岸料車

經行及貧民棚棲處所尙未全行葺工然所餘亦

復無幾今大工業已告成所有未完各段自應令

河臣李奉翰上緊趕辦於大汛未屆之先一律全竣又臣前奉

諭旨以漫口下游各河至安徽之渦河一帶應酌加疏濬之處亦詳悉勘明妥協辦理等因所有祥符時和驛決口下游之惠濟河應行疏挑兩段約需銀一萬二千餘兩其儀封十六堡漫口下游須俟工竣水涸勘辦而大段俱屬深暢亦經臣會同詳悉奏聞并奉有

諭旨以南河各工亦經薩載等勘辦毋庸阿桂復往會查欽遵在案今大工業已告成所有時和驛下游惠濟河

聞
雖前已勘估興工尙未查驗應令撫臣榮柱再行
派員查勘如有未能一律暢順之處卽照估實力
疏濬其儀封十六堡漫口下游渦河等處衝刷日
久仍屬寬深惟水勢散漫之處其旁入支河兩岸
不免間有淤淺自應一併疏濬以備夏秋潦水有
所歸注應請交撫臣榮柱派委誠實大員履勘疏
濬所費亦屬無多奏入報

二十九日

公偕陳輝祖李奉翰榮柱奏言順黃壩工業已合

龍穩固所有善後各事宜先經臣阿桂等大畧酌
籌今復與臣李奉翰詳悉同商議查順黃壩身
本已寬厚堅實且自合龍後晝夜填壓已經半月
現仍日逐培壓工程自益鞏固但係臨黃新工不
可不慎重保護臣等擬將壩身加高外廂邊埽防
風並於貼近戩壩後再澆裏戩一道約需銀五萬
七千一百六十二兩零其挑水壩一併加高幫廂
並接至南堤約用銀六千九百九十四兩零并豫
備順黃挑水兩壩防守夫料銀一萬四千兩至上
年九月內臣阿桂等欽遵

諭旨奏明俟順黃壩合龍後並將十堡十六堡一併補築完好今擬補完壩工並於積水處廂做防風並將已做工段一律加高接與圈堤相平計需銀九千八百六十兩零其十六堡漫口從前水勢甚深自上年停工不辦伏秋汛內口門場寬至二百六十五丈而以場寬之後河水平流轉見淤淺現在止二三尺之水並無跌塘今擬估廂防風並補堤工計需銀一萬七千兩零至自順黃南壩起接至南岸老堤止計長一百零七丈現於擬澆裏截時一律接築與堤相平其自順黃北壩起至十六堡漫

口迤東止上年亦已遵奉

諭旨並

硃筆標示之圖通行接築圈堤以防搜後之虞今春臣陳

輝祖因大工合龍在卽隨一面派員趕辦共長二

千二百九十三丈現已得有八分工程臣李奉翰

仍當上緊令趕築共計需銀一萬四千七百三兩

零又臣李奉翰看得此次新工係逼溜改向北趨

直走中臨以免十六堡以下幾及二百里順堤河

之險關係實爲至要應於順黃壩之東相去一百

餘丈外再加築二壩一道南接老堤北接圈堤以

為重重固護臣阿桂等再三商酌亦應如此辦理計長二百九十四丈底寬十六丈六尺頂寬四丈高與大堤相平約需銀二萬零七百零九兩零又儀封十六堡並考城汛內隄工因連年料車經行貧民又搭棚棲住是以內有一段單薄殘缺今擬加壩幫寬計銀一萬二千五百三十九兩零以上善後各工通共需銀十五萬二千九百七十七兩零再查潘家厰引溝係上年秋汛時始露有頂衝形勢因卽酌量開挑每遇長水必能進溜但現在新河旣已暢行轉不必令其分勢目下擬將引溝

河頭築壩堵截俟伏秋大汛時臣李奉翰察看形勢酌量辦理倘潘家厰果得冲塌成河則自挑水壩至順黃壩一帶俱可淤成陸地壩工俱可省修防以上各條臣等公同酌定意見相同卽一面督飭趕辦定限於三月內完竣此外南北兩岸或尙有應辦事宜容臣李奉翰遍行履勘後遵照面奉

諭旨再行酌量奏明辦理并繪圖貼說恭呈

御覽再查合龍已經半月晝夜廂壓堅實現在尙未停工
河臣李奉翰亦稱實已鞏固而新河引溜與伏秋

汎水無異大河水勢又已漸消至金門以上原水深十餘丈者日就停淤現止四丈有零金門以下間斷現灘十堡壩工水深處寬不過十餘丈且係止水其餘均屬淤灘至十六堡漫口則全係淺水不過二三尺兩處補築壩堤爲力甚易其善後事宜又經會同李奉翰等悉心酌定次第興築統計三月內必可全竣臣阿桂在工實無可辦之事因於二十五日遵

旨起程馳赴

行在復

命奏入報

聞

三月初三日

公奏言本月二十六日酉刻臣行抵虞城縣接奉

上諭現今工已合龍漫口老堤最爲緊要阿桂等務將老壩堤工督催堵築堅實以資鞏固方可起身又奉

上諭內此項漫工若照向例糜費工銀應著落在事大小官員賠補但此番辦理情形實非從前漫決可比阿桂等悉心經理亦不遺餘力所有用過工料銀兩俱著准其開銷毋庸議賠惟決口究係平日防護不慎所致從

前河臣姚立德撫臣徐績實難辭咎鄭大進到任不久不必議著阿桂查明伊二人任內所辦堤工歲修等項分別著落賠補以示懲儆竊照順黃壩工合龍之後廂厰晝夜不停業已半月實已堅實而善後事宜內所籌辦之二壩又兩頭對做已經合口其圈堤工程更辦有八分是現在新工已得重門保障至十六堡漫口止存定水二三尺尙日就乾涸並無跌塘十堡南壩頭水深二丈餘者不過十餘丈之寬亦係定水其餘更屬淺灘此二處補完之工爲力甚易業經前摺公同奏

聞至金門跌塘歷來壩工所必有就臣所見舊時衝決之處有十餘年及百餘年尙未乾涸者無從設法疏濬且亦並無妨礙而順黃壩金門以外深十餘丈者現已淤剩四丈零將來必可現灘卽靠近壩前剩有停水據李奉翰稱伏汎長水一二次卽可停沙填滿現在亦無疏濬之法此時新工儘可放心是以撫臣榮柱擬卽回省辦事臣李奉翰亦俟各處興工監看指示遵辦後卽擬往上游南北兩岸遍行履勘再回至工次督催驗收臣阿桂在彼實無可辦之事向於工程做法又遠不如李奉翰因

遵照前奉

硃批於十餘日後起程現在似毋庸趕回至大工所用銀兩前已將大畧數目奏

聞向例黃河衝決所用辦工銀兩應銷六賠四無論歲工久近俱著落在任時衝決之總河督撫道府廳汛員弁等按股分賠今新莊八堡所用銀兩業經姚立德鄭大進奏明自認全賠外其時和驛十六堡十堡順黃壩挑水壩等處所用銀兩姚立德鄭大進俱例應分賠現在姚立德應賠銀兩約共有二十三萬八千餘兩鄭大進應賠銀兩約共有十一

萬九千餘兩河臣陳輝祖等現復確核細數再行
詳悉奏

聞今奉

諭旨此次漫工所有用過工料銀兩俱著准其奏銷毋庸
議賠惟姚立德徐績任內所辦堤工歲修等項分別著
落賠補臣竊查此等工程銀兩其自四十三年以前俱
已題銷有案可以按冊而計臣現已寄信陳輝祖
等令其查明具奏奏入報

聞

初八日

諭曰據阿桂奏稱自豫來浙復命經過淮徐一帶查看陶莊引河兩頭已寬至九十丈其中段僅寬六十餘丈河身雖已刷深但水勢被束不能大暢且將來伏秋大汛水來猛驟恐一時宣洩不及若將河身通行開寬四丈俾一律深通汛水便可暢注等語所奏自屬應行辦理之事現在已令阿桂前往該處會同薩載查勘後阿桂卽行回京據實面奏

初九日

上以儀封河工合龍

命建碑於陶莊

河神廟

御製記文曰河之復也以堤合龍隄之合龍也以

天佑

神助然

天之佑廣大精微不可以一二事舉亦不可以一二日期神之助則有可以顯示昭靈事舉日期者此義已見於丁酉陶莊河神廟之文而今復有顯示昭靈聲應底績之貺是不可以不記儀封決口之築移金門開引河歷以年餘迄未成功亦無別法於舊冬仍爲大開引河圖掣溜歸壑之爲及今春二月阿桂等始有十一日兩壩

自行合龍隨填壓菱土不逾數刻金門立見斷流俟十分穩固卽馳報合龍之奏未數日而合龍之奏果至然所謂自行合龍之語不解何謂茲阿桂以善後大局已定來行在復命細問之乃稱二月十一日儀封漫口未合龍以前金門尙濶三丈水深十丈餘至午時忽報順黃南壩沈墜驚往勘視則南壩埽根全勢向北移走陡與北壩接連時金門水面深至一二丈爾時見機可乘隨將合龍稽料趕緊填壓不三四刻已見斷流而埽底亦無翻花過溜若非南壩向北沉墜移走則三丈口門下埽合龍非三兩日不能完今機緣巧合因敗爲功以

兩載之勤劬收功片刻實由至誠感召

天和

河神默相非人力所能到更非在事諸臣所敢望云云
自前歲河決後予無日不叩

天祐

神冀速合龍以佑蒼生昨初十日渡黃於香棚及陶莊
河神廟更益竭誠默籲而十一日遂有兩壩自行合龍
黃流順歸故道之事此豈非

天祐

神助前記所謂適逢其時者歟予非敢自詡誠之能感

若謂能感則自前歲至今二月初十以前豈誠之未至耶而

神之顯示昭靈實不可以不誌或謂陶莊在江南儀封在河南云一則不可兩處各有廟云二則此未能及彼夫一佛而千百億化身姑不必論卽蘇東坡論韓昌黎所謂如水之在地中無往不在昌黎不過文宗尙能如是而福國佑民之

正神顧當論其在此在彼是一是二耶旣蒙庇蔭合答麻社予惟虔鞏孜孜日甚一日永祈安瀾之錫儀封合龍處已命建

廟答貺當別記而此陶莊實予竭誠蒙

佑之所因命樹碑紀實親書泐石一如前建

廟之例時庚子歲暮春上澣之吉也

十三日

京察奉

旨交部議叙

十五日

公偕兩江總督薩載奏言臣阿桂於初九日自浙

起程路過蘇州傳

旨令吳壇隨往勘辦於十六日行抵清江卽與臣薩載藩

司吳壇同至陶莊將該河頭尾中段逐一相度勘量自順黃壩起工處至壩尾裏頭處計長一千零六十丈內外不等中泓水深二丈餘至三丈不等此河自新開至今數年以來漸次衝刷雖較初挑之始業已寬深而北岸土性膠結現在河身寬至六十丈內外今黃流復故若於此岸展寬四十丈使河身通寬百丈將來汎水偶遇盛漲之時用資宣洩自屬大有裨益惟臣等詳加履勘河頭北岸迤東原挑積土之外臨河縷隄雖河身水面只有三十丈該處河面寬六十五丈若加寬三十五丈

以符百丈之數則應挑至此隄之外另築新隄此時似不必破隄辦理臣等就現在情勢公同再三斟酌擬於此處隄內畱土十五丈挑土十五丈連有水河身共寬八十丈將河身現寬六十餘丈者挑展十餘丈不足六十丈者挑展二十餘丈則河勢已屬通身開展卽偶有盛漲可冀無虞臣等逐加確估牽折計算共須挑土十一萬七千餘方估需銀一萬二千八百餘兩派員集夫上緊趕辦務期四月內竣工聖駕經臨之時約有四五分工程再臣等查新河頭迤上北岸舊有灘嘴前奉

硃批標記臣薩載遵照挑挖引渠一道原擬放水通溜後

使之自行刷去因溜走南岸該處仍屬淤灘今臣

等察其形勢細加商確擬於南岸第三架木龍以

上改建挑水壩一座長三十丈寬八丈將大溜挑

逼灘嘴則北岸嫩灘自可日益刷去南岸順黃壩

一帶可望漸次停淤以資外護似於新河更爲有

益連築壩臺估需料土夫工銀二萬一千五百餘

兩臣阿桂與藩司吳壇相度形勢自應如此辦理

奏入奉

諭曰如所議行

旨好如所議行

二十二日

公偕薩載奏言臣等遵

旨前往雲榜關以外將黃河尾間入海情形會同遍處履
勘測量查得二套三套近年漫口由北潮河入海
之處近捷而水深其現在經行河道海口紆遠而
水淺均與臣阿桂前次面

奏情形無異臣

阿桂臣

薩載因與藩司臣

吳壇往返詳

細商酌如果黃河現在經由之四澆以下海口大
有淤墊之勢尾間不能暢達必須另籌入海道路

則取捷從下舍北潮河別無他途但現在河流暢軌其通洋海口落潮水定時雖比口內較淺而雲梯關以外水面比北岸尙低丈許海口外灘比現在水面又低數尺寬至三百六十餘丈是河水歸槽之時安流東注尙無壅遏之虞自毋庸亟籌更易海口之舉但或遇海口盛漲洪流湍駛一時不及暢洩則從前連次漫口處所不能保無復溢若將漫口堤外現在衝出河形處畧爲通其淤滯俾漫溢之水自然尋途入海則盛漲可資疏消於上游各處河工不爲無補至已堵漫口旣難保無復

溢可否仿照王營減壩之意添建閘壩以資啟閉
宣洩臣薩載再行細勘隄下土頭游沙深淺俟新
任河臣陳輝祖會同熟籌奏明妥辦臣等謹繪圖
詳細貼說恭呈

御覽又查二套堤外從前漫水之東直至海邊均係阜寧
安東海州等處減則灘地及葦蕩營產蘆蕩地間
有淤沙溝槽形迹並無防護隄堰漫水之西淤沙
較厚舊有之南潮河上段業已淤平又西則係已
涸之馬港河有夾河殘缺舊隄兩道隄之南均
與黃河北隄相接其東隄長六里有零西隄長二十

九里迤下無隄空檔長十六里零下接北潮河西岸民堰此隄之西俱係安東海州等處民田臣等再四商確馬港西舊隄雖在雲梯關外十數里但其上游卽係腹裏民田每遇盛漲漫溢時卽倒漾至雲梯關以上且該處只有木牌樓一座鐫刻古雲梯關四字並無內外界限若將此隄殘缺處所修復並將無隄十六里一律補足下接北潮河西岸民堰則自雲梯關北隄下逮通海潮隄堰連爲一縷既可保護安海等處上游民田偶遇盛漲時溢出之水不及漫漫俾濱臨河海民人得享樂利

之麻並可作爲雲梯關內外界址其隄東之海灘
減則地畝悉遵照二十九年

諭旨不必與水爭地聽民隨宜耕種以收自然之利似於
民生河防均屬稍有裨益奏入

諭曰所奏修復馬港河西隄殘缺之處及接築無隄處所
聯至北潮河西岸民堰以禦倒漾自應如此辦理其二
套以下由北潮河入海之處旣係地捷勢順設遇漫溢
正可分洩盛漲俾尾閘益可暢達轉可不必添建閘壩
雲梯關以外原不必與水爭地今二套以下旣爲分洩
盛漲之區則馬港河隄東灘地卽不能保無漫溢其應

徵減則地畝錢糧著交薩載等查明奏請加恩豁免

四月初九日奉

旨兼管翰林院掌院學士兼教習庶吉士

二十八日奉

旨以原銜充日講起居注官

五月回京

初九日奉

旨充

殿試讀卷官

二十一日

上幸避暑山莊

命留京辦事

六月十四日奉

旨仍教習庶吉士

又奉

旨署鑲白旗漢軍都統

十月初九日

公奏請酌改舊例事宜一盜案疏防舊例處分定例該督撫題叅到部臣部將各員停其陞轉俟兵部核明武職具題日照例議處以免參差查核計

彙題必須相隔數月應議各員反得藉緩時日請
嗣後按月彙題毋庸轉候兵部一命盜等案委審
限期定例原問官審斷未當必應改委卽將改委
改限聲明咨部恐輾轉相承竟有藉爲寬限之地
者請嗣後改委各員照例扣半給限原限兩月者
一月三月者一月半逾限叅處一議叙議處向例
行查時輾轉時日自應明立限期請嗣後除當畫
小稿及繕本各限仍照舊例外其行文查核各事
宜限以三十日辦竣繕本具題一命盜失物承緝
處分例載地方命案除毫無失物者仍照舊例辦

理外倘有疎失情形無論多寡卽照盜案扣限題
叅查舊例有盜田野穀麥無人看守之物至拒捕
傷人致死照命案例按限叅處者恐外省率行援
引易滋避重就輕之弊請將舊例刪除以歸畫一
一衙役滋事例載捕役叅竊分贓及草捕窩匪不
法地方官降二級調用查卓快保甲鄉約等役均
屬在官遇有滋事自應明立科條請嗣後有前項
犯案者將該管官降一級調用已革之役該管官
罰俸一年奏入

諭曰各省辦理地方公事向多推諉遲延而官官相護積

習已深輒思代爲避重就輕自應明定例限以隨時整飭此次吏部所奏酌議盜案疏防等處分不得謂有意從嚴也俱著依議行

二十八日

諭曰諾穆親奏綿億之太監帶領羊隻進城不肯納稅反將書吏等毆打撕破告示阿桂差人說情私行完結等語當經降旨令阿桂回奏茲據奏稱差人說情之處實有其事殊屬非是伊係綿億福晉之祖父何可如此瞻徇著罰公俸十年並不必在總諳達上行走

十一月初九日

諭曰纂辦

開國方畧著添派尙書梁國治與大學士公阿桂同辦

十二月二十三日

諭曰浙江海寧改建石塘以王亶望曾爲浙撫且肯擔當其事因命在工督辦但伊在服中不令與地方之務此朕不得已之苦心屢經降旨中外共知近因王亶望與李質穎有意見不合之處茲李質穎來京召對時奏及改建石塘後柴塘土塘仍須歲修以資保護等語朕從前親閱塘工老鹽倉一帶難以下樁素所深悉但思難以下樁處所其長不過數里非數十里之柴塘皆不可

下椿改石也其餘可以下椿處所若一律改石塘豈不
爲一勞永逸之計乃李質頴今有是奏此事關係重大
朕亦不能懸斷著大學士阿桂同李質頴馳驛前往會
同富勒渾將李質頴王亶望所見不同之處秉公確勘
據實覆奏

阿文成公年譜卷二十二

受業

王 昶 勘定

盧蔭溥增脩

第三孫那彥成恭纂

乾隆四十六年辛丑六十五歲

正月十三日

諭曰據富勒渾覆奏稱石塘之外必須另築坦水若卽以柴塘作坦水每年必須歲修等語前以李質穎面奏改築石塘後柴塘仍須歲修是以降旨莫若卽以柴塘作坦水更爲得力今據富勒渾所言是石塘外必須另築

坦水將來柴塘可以不必歲修與李質穎前奏互異殊
不可解著傳諭阿桂等於到工時卽公同詳悉履勘將
富勒渾李質穎所言孰是孰非確按情形妥慎籌畫據
實具奏

十五日

諭曰據富勒渾奏報銷辦差經費錢糧實用十九萬八千
七百餘兩均係實用實銷並無浮冒等語此事前據李
質穎在京面奏上年辦差經費俱王燧在總局支銷王
直望惟言是聽其中並有借名浮開物件價值差竣後
各自分用譬如銅火盆一項所費無幾竟開銷至數百

兩可知冒開者正復不少但不便以南巡辦差之事將承辦各員叅劾俟查明通融辦理等語朕彼時以李質頴口說無憑應查明再行辦理今李質頴在浙半年有餘尙未查辦清楚富勒渾到杭未久卽將此案造冊報銷若非李質頴從前辦理遲延卽係富勒渾有意周旋王直望乘李質頴尙未到任之先急將此案辦出二者必居其一且其間恐竟係富勒渾希圖速結之意爲多著傳諭阿桂於查勘海塘時就近將差費報銷之事確實查覈卽李質頴所奏通融辦理亦不過含混之詞其實在如何辦理之處阿桂務須秉公查辦並將差費確

數覈實奏銷

又

諭曰本日據富勒渾等覆奏採運本省石料以濟要工一摺內稱借項添造運船五十隻協濟等語此項船隻前據李質穎在京奏稱王亶望欲令商人造辦船隻裝運石料有商捐銀二十萬兩聽候動支等語則一應成造運石船隻俱應動支此項銀兩何以又稱借項添造著傳諭阿桂等查明此項船隻是否動用別項公帑成造抑或卽以此項商捐稱爲公項動用之處卽速查明據實覆奏

二十六日

諭曰據富勒渾奏搶修石塘工段暨現在沙水情形一摺
內稱范家埠塘外陰沙一塊中衝水溝大溜逼近塘根
因於頂衝處所添築柴工盤頭一座隨接築護沙埽牛
三十丈並添築挑水壩察看潮勢仍逼近章家菴一帶
遶行至新建盤頭挑水壩處所大溜挑開老河藉以無
坍隨復擬於萬嘉廟塘外添築盤頭一座俾上下幫助
以挑來迴大溜使之回向南趨餘俟阿桂等到工再行
公同履勘情形籌議具奏等語已於摺內批示矣至詳
閱圖內所築上下盤頭二座其頂衝形勢較之章家菴

尙爲稍減該處施工築做盤頭似未十分得力朕意莫若竟於天字號章家菴處所趕築盤頭一座使溜勢向外挑開不致復逼塘根已於圖內用硃筆圈識著發交阿桂等閱看將是否應如此辦理之處公同察看情形詳酌妥議具奏

二十九日

公奏言臣等將李質穎所奏王直望欲將畱工人員委署地方印務一節傳

旨詢問王直望以地方官各有專責若以在工人員委署地方一人不能兼顧勢必貽誤塘工若畱工所又

豈能辦理地方事務所見甚爲紕繆自必係聽信
工員營求尙有何辯據稱王直望在工督辦見畱
工効力之同知縣丞典史等官十六員往來督催
俱係自備資斧効力並無胥役夫匠呼應不靈曾
向李質頴說過令其委署丞倅佐雜事務並未欲
將該員等委署地方正印至該員等卽委署佐雜
所得廉俸每年不過數十金王直望卽心存不肖
亦斷不致想伊等饋謝但佐雜究有應辦事件不
能在工分理我從前所見實屬錯謬又將李質頴
奏王直望欲令商人造辦海船裝運石料各商以

造船之事素所不諳呈懇官造一節詢之王直望
據稱王直望於三月二十一日起身回籍五月內
前督臣三寶飭將滷船裝運石料六月內有竈戶
施遵等具呈巡撫衙門求令商人造船經撫臣李
質穎批委鹽道會同杭嘉湖道速議王直望六月
二十二日到浙竈戶施遵等於六月十六日具呈
俱有成案可查茲非王直望欲令商人造辦船隻
是實臣等檢查藩司及鹽道兩處案卷造船一事
原係王直望未到浙省之先竈戶施遵等呈請求
令商人造辦經李質穎批飭鹽道等會議嗣因商

人不諳造船情願捐銀二十萬兩以佐塘費鹽道
陳淮等曾經稟知王直望臣等復查王直望兩次
所批之稟帖九月內批有造船一百隻祇須銀二
萬六千兩並不需銀二十萬兩之多從前辦有成
案不難遵照十月內批有造船係久經飭議之案
延至半載並不早爲籌辦惟有嚴催辦石各縣上
緊趕運等語是王直望兩次所批並無必欲令商
人造船之語而李質穎所言亦不過稱其意欲派
商人承辦並不能指出實據看來此事皆係伊二
人意見齟齬所致王直望於中尙無情弊奏入報

聞

公又奏言外省現任官員於所屬地方置買房屋
產業牟利營私糞肥已橐均干例禁杭嘉湖道王
燧恣意貪縱未任杭州府時在省城奎垣巷地方
置有住房一所迨該員調任杭州後倚恃知府聲
勢陸續添買民人楊有林等房間漸次開拓寬濶
建造花園屋宇甚多臨街一帶房屋俱租給民人
開張鋪面收取租息又因巷內街道窄狹將隣居
民房地基買去折毀改建寬濶訊據原業戶等雖
無短價強佔情事然非情願出售俱因畏懼王燧

係本管知府聲勢勉強賣給其爲勒買已無疑義
又自恃積有厚貲在西湖西泠橋及海塘潮神廟
建蓋房屋又價買部民之女爲妾並出銀數萬兩
與民人何永利在省城開張銀號牟利種種劣蹟
訪查確實查該道蒙

恩用至監司大員理宜奉公守法乃驕奢放縱價買部民
之女已屬有玷官箴復敢於本管地方建造私宅
拆毀民居添蓋花園屋宇以致民怨沸騰况現在
潮勢北趨章家菴一帶塘工在在危急該員身任
海防道並不實力督辦尙於潮神廟及海寧州衙

陞少府監言卷二十一
署興工建蓋屋宇尤爲全無人心甚至以監司大員與市井小民夥開銀號並私買房產取租希圖牟利似此貪縱不職之劣員斷難一日姑容請

旨草職拏問將此外有無不法款蹟嚴審定擬具奏奏入諭曰據阿桂等叅奏杭嘉湖道王燧貪縱不職各款現已明降諭旨交阿桂嚴審定擬具奏矣王燧由王亶望保薦擢用道員乃不思潔已奉公驕縱不法種種款蹟行同市儈實出情理之外非尋常有玷官箴者可比三寶前後歷任有年卽富勒渾李質穎到任亦俱逾月伊等豈一無見聞並未具摺叅奏卽去年冬間李質穎在京

召對數次亦並無一字提及督撫糾察屬吏是其專責似此貪縱不職之劣員尙屬曲爲姑容非此次阿桂等前赴海塘勘工將伊款蹟訪查確實專摺奏聞則朕何由得洞悉富勒渾等平日所司何事耶若論失察之咎將來定案時該督撫等自當量予處分然亦不過草職畱任而止伊等亦未必畏懼除大學士三寶就近令軍機大臣等傳詢外著傳諭富勒渾李質穎令其捫心自問應得何罪卽行具奏

公又偕富勒渾李質穎奏言

臣奉

命查勘海塘於上年十二月二十八日由京起程本年正

月十二日行抵江南之清江浦會同陳輝祖由水道前進十六日抵浙江嘉興府計算李質穎行程尙隔兩三站未能同時趕到臣等卽由石門取道長安壩至海寧州十九日卽自海寧州城外循塘而西至老鹽倉翁家埠閱看臣富勒渾亦自省城前至隨由寒字號至天字號迤西公同詳悉履勘近日水勢減落范家埠對面水底陰沙漸濶大溜日逐移西由天字號以上數十丈刷成兜灣逼塘而下所有添築柴塘業已數十丈臨水自天字號至寒字號沿塘溜勢俱屬湍激現在趕築之搶險

條塊石塘五百丈所謂急則治標之計實爲緊要
關鍵刻不容緩臣等察看工程所有添雇樁夫多
安樁架釘樁已三萬四千餘根安砌底石者有二
百五十餘丈其逐層疊砌四五層至十五六層石
工上已有八十餘丈至續請添築之二百丈亦俱
一律開槽下樁一切門縫灌漿鑲做鐵錫鈎貫尙
爲緊密惟臣李質穎前在工所目擊該處土性澁
滯釘樁甚難計每日樁架一副釘樁止二三根而
自十一二兩月以來釘樁至數萬根何以前後難
易迥殊詢之監督人員及所派丞倅佐雜等官據

稱先因釘樁艱難公同商酌先用尖竹簽試再將
樁木釘入施工較易等語究未可信誠恐夫匠人
等有削鋸樁木偷減尺寸情弊容俟臣等再赴工
所間段創驗嚴密查察以期核實堅固臣富勒渾
等惟有督飭承辦各員上緊簽釘築砌務期春汛
以前完工此現在辦理情形也臣等察看形勢若
塘根臨水海潮大溜晝夜披刷柴塘之與石塘皆
不能保其無虞如不過汛水盛長潮流湍激盈堤
拍岸計圖捍禦則柴塘究不如石塘之鞏固此理
之顯而易見者也自以改建石塘爲是但臣阿桂

臣陳輝祖初到工所於此中窾要未能周悉卽詢之在工各員所見大率紛岐且現因搶做條塊石塘勢亦不能兼及至老鹽倉一帶難以下樁處所究有若干丈必須逐段釘樁試驗又應否用魚鱗塘或一律皆用條塊石塘之處事關民生攸繫且欲垂諸久遠更須詳悉講求妥慎籌酌方可爲一勞永逸之計容臣等另行通盤籌畫定議奏聞辦理至臣等節次欽奉

諭旨以富勒渾欲預畱坦水地步李質穎仍欲歲修柴塘其言孰是孰非令臣阿桂確按情形據實具奏臣等伏

思旣建石塘而柴塘仍須歲修則是以改建石塘爲無益可知衆論雖不以爲是但究未與李質頴同至工所彼此講求亦難遽定其是非俟一併勘實另行具

奏奏入

諭曰阿桂等奏勘海塘工程情形一摺據稱現在趕築之搶險條塊石塘五百丈所謂急則治標之計實爲刻不容緩至察看工程釘樁三萬四千餘根砌石二百五十餘丈一切做法尙爲緊密惟有嚴飭各員上緊築砌等語此時亦止得如此辦理惟摺內所稱李質頴前在工

所目擊釘樁甚難每日釘樁止二三根而自十一二兩月以來釘樁至數萬根何以難易迥殊詢之監督等官據云先將尖竹簽試再釘樁木施工較易猶恐夫匠有削鋸樁木偷減尺寸情弊再俟赴工刨驗各等語阿桂等既恐有此等弊端自當立行刨驗豈可俟再赴工所始行刨驗已於摺內批示此時阿桂等諒已驗明應卽據實速奏又奏稱富勒渾欲豫畱坦水地步李質穎仍欲歲修柴塘俟李質穎到工一併勘實另行具奏一節看來富勒渾與李質穎於海塘一事均不能確有定見切中機宜而李質穎尤不肯用心出力卽如商捐銀二

十萬兩李質穎因與王亶望意見齟齬卽稱王亶望欲令商人造船今據阿桂等查案係在王亶望未到浙省之先竈戶等呈請令商人造辦經李質穎批飭鹽道辦理今何以轉將造船一事專誘之王亶望此處應問李質穎從前因何如此陳奏自蹈面欺之罪令其明白回奏

又

諭曰據阿桂覆奏查辦浙江報銷辦差經費一摺內稱查取奏銷細冊詳加覈對均係照南巡成例開銷並無浮冒至李質穎到任後並無駁查底冊之案惟富勒渾曾

經駁查兩款等語此項奏銷前據李質穎面奏俱係王
燧經手難免冒開情弊等語若此則銷冊內可駁者多
何以李質穎到任半年轉未駁查一條是所辦與所奏
並不符合殊不可解著傳諭阿桂將李質穎因何不行
駁查之處查明覆奏又據阿桂奏浙江差局總理徐嘉
興府知府陳虞盛與王燧同辦上年浙江入境首站朕
因其所辦過當業經傳旨飭禁詢之三寶等稱係陳虞
盛所辦今該員雖已病故但與王燧通同浮冒開銷設
其人尙在自有應得之罪不可因其已故竟置不議也

二月初八日

諭曰前日據阿桂等叅奏杭嘉湖道王燧驕縱不法種種劣蹟以致民怨沸騰已降旨革職拏問嚴審矣該員既如此妄行恐此外尚有別項款蹟阿桂自應嚴密訪查至王亶望與王燧有無交通情事並著阿桂畱心查察至王燧如此行爲李質穎亦應據實叅劾何以轉無一言奏及豈李質穎亦與王燧有通同交涉之事並著阿桂一體嚴切訪查如有實據亦卽叅奏前據阿桂等奏國泰不宜久任山東朕因傳旨令于易簡來京陞見面加詢問據稱國泰因察吏過嚴諸事認真以致屬員畏懼多有怨言並無別項款蹟所奏自爲確實經朕降旨

訓飭著錄寄阿桂閱看

初九日

公偕陳輝祖富勒渾李質穎奏言臣等仰蒙

恩命籌辦海塘臣阿桂陳輝祖抵浙後卽馳往查勘業將

潮勢北趨及現辦搶險石塘工程情形恭摺奏

聞在案茲臣等公同籌議伏思論塘工者以石塘爲最固

爲海塘計者以建魚鱗大石塘則工堅料實屹若

崇墉足以資捍衛而垂永久惟是魚鱗石塘計築

十八層高一丈八尺統以底寬一丈二尺頂寬四

尺五寸爲准逐層收分陂陀斜下塘脚密釘馬牙

椿四路釘梅花椿七路用三和土堅築每層厚一尺二寸之大條石丁順間砌參差壓縫自九層以下外砌坦水保護九層以上至頂每層鑿成槽筍扣嵌錠錫聯合牽制故表裏完固高堅足恃但查魚鱗石塘每丈需用條石一百十三丈每丈下椿一百五十根江浙兩省辦石艱難河海轉運曠日持久是以原辦之石塘五千九百餘丈自乾隆二年興工至八年方始告竣今自老鹽倉迤西至章家菴柴塘四千九百餘丈現已趕辦搶險石工五百丈其天宇號迤西之二百丈不在此數尙餘柴

塘三千九百餘丈除老鹽倉一帶沙性澁汕難以
下椿砌石處尙有一千七百丈外所有應建石塘
共二千二百丈_臣等約畧核算若一律改建魚鱗
石塘所用夫役木石及運送船隻甚多即使上緊
趕辦亦須至四十八年冬底方能告竣至條塊石
塘原辦每丈釘椿六十餘根用石十四層現在搶
築石工五百丈釘椿八十根用石十七層底寬一
丈四尺頂寬四尺較前所辦加高三層底寬六尺
每丈用條石三十五丈比魚鱗塘不過三分之一
施工易而成事速若仿照辦理約計四十七年內

可以葺功臣等確按情形固不能如魚鱗塘之萬全無慮但前督臣稽曾筠所辦東塘搶險石工現在尙屬鞏固則酌增工料加添丈尺亦似可垂諸久遠容臣等再往尖山一帶相度履勘究已往之成規察目前之大勢博稽輿論廣集衆思熟籌妥議奏請

訓示奏入

諭曰據阿桂等籌議海塘工程除老鹽倉一帶一千七百丈沙性澁汕難以下樁砌石外所有應建石塘共二千二百丈若一律改建魚鱗石塘所用夫役木石及運送

船隻甚多若做條塊石塘比魚鱗不過三分之一施工
易而成事速約計四十七年內可以蕪工從前稽曾筠
所辦東塘搶險石工尙屬鞏固則酌增工料加添丈尺
亦仍可垂諸久遠等語所奏是已於摺內詳悉批示矣
老鹽倉一帶沙性澁汕難以下樁從前朕本親往試驗
所有該處塘工一千七百餘丈只可仍存其舊至此外
應建之二千二百丈既可仿照條石塘做法較魚鱗工
易而成速則現在辦法亦大約不出於此著傳諭阿桂
等一俟履勘確實衆議僉同卽速上緊興工辦理

十三日

公偕陳輝祖奏言臣等親身詳悉履勘范家埠對岸漲沙中衝水溝一道分爲兩塊以致大溜逼近塘根今自章家菴以西并東首之萬家廟添築盤頭二座旬日以來北岸范家塘一帶老河已不復坍卸水勢稍爲南趨對面近北陰沙一塊已日見刷低潮退時亦不甚顯露來回逼塘大溜亦稍平緩此實轉機佳兆臣等往來察看其從前所築上下盤頭二座頂衝形勢誠如

聖諭尙未十分得力現在欽遵

皇上指示於章家菴之潮神廟東首黃字號內趕築盤頭

一座臣等督飭工員上緊儻辦務於十日內完工並公同詳閱情形酌擬於現築章家菴盤頭迤西七十丈再添築盤頭一座俾上下幫助以挑來回大溜使潮溜日向南趨陰沙得大加刷汕實爲緊要關鍵至現辦工程打樁已共有三萬九千餘根鋪砌底石自一二層至十五六層並已蓋頂完工者通計有三百八十餘丈其餘均倍加趕辦務必於春汛前完工察看工程做法亦尙如式堅固至臣等前奏釘樁難易前後迴殊猶恐夫匠有削鋸樁木偷減尺寸情弊俟赴工創驗一節欽奉

諭旨阿桂等既恐有此等弊端自當立行創驗豈可俟再
赴工所始行創驗已於摺內批示此時阿桂等諒已驗
明應卽據實速奏查前項已經釘入樁木臣等前曾令
搭架用絞杆拔起親驗緣沙齧樁牢用盡人力以
致損折者有之終不能拔動若創驗又恐傷動過
多伏思開槽打樁沙土愈結實則樁木愈堅牢今
既不能拔起其爲深固可知且臣等到浙後委員
監視現在築打各樁入土丈尺既均如式又密加
訪察從前亦無私行削截情弊是以不復創驗至
所釘樁難易先後迥殊之故初時樁架止十餘副

樁夫寥寥是以李質穎起程進京時共止打樁三千餘根自富勒渾到任督辦陸續添設樁架四百二十副樁夫逐日增添兩月以來打樁三萬九千餘根此前後辦理實在情形也再富勒渾前奏請將天字號迤西添建未修之柴塘二百餘丈移至現在下埽牛處所挨順兜灣斜築接抵范公塘一節查沿海漲沙賦則最輕民間貪圖利便自築土埂圈護本不應官爲經理但自章家菴至八仙石三十餘里桑麻在望民田廬舍甚多自應趕築護河柴埽二百丈稍資捍衛以仰副

皇上軫念民生至意奏入

諭曰據阿桂等奏海塘沙水形勢旬日以來北岸范公塘一帶老沙已不復坍卸水勢稍爲南趨對面近北陰沙日見刷低逼塘大流亦稍平緩此實轉機佳兆因往來察看除從前所築上下盤頭二座外現於黃字號趕築盤頭一座章家菴盤頭迤西七十丈再添築盤頭一座俾上下幫助以挑來回大溜使潮勢日向南趨陰沙大加刷汕等語所辦甚好應速爲之已於摺內批示矣淤沙原無一定今水勢旣漸已南趨北岸老沙不復坍卸此

潮神顯佑大有旋轉之機朕心深爲欣慰此時所築盤頭旣甚得力應督率在工各員上緊趨辦使大溜日漸開遠其趕築護沙柴埽二百丈亦應照辦以爲保護之計至所稱刨驗椿木緣沙齧椿牢用盡人力終不能拔動若刨驗又恐傷動過多是以不復刨驗等語所奏是亦於摺內詳悉批示從前所釘椿木現旣不能刨起則其結實可知轉不必復行刨掘致多損折也

公又奏言本月初五日臣阿桂等於海塘工次接奉

上諭昨據阿桂叅奏杭嘉湖道王燧買部民之女爲妾并

於省置買房屋花園開設銀鋪種種劣蹟同城督撫豈
得毫無見聞所謂察吏者安在臣等伏思海塘關係重
大若督撫不肯擔承則屬員愈多瞻顧因循觀望
迄無遠圖此種情形難逃

聖明洞鑒臣等就富勒渾李質穎二人而論李質穎血氣
已衰不能有所擔任富勒渾自上年十月抵任後
卽到工履勘先行籌築搶險石塘三百丈復因溜
勢移西續請添辦二百丈又酌量於章家菴及萬
嘉廟頂衝處所陸續添築柴盤頭二座又於盤頭
西首接築護沙埽牛八十餘丈並添築亂石挑水

壩一座他如廣募樁夫添安樁架四百餘副派員分段趕辦塘工皆係富勒渾督飭上緊辦理皆有案據是富勒渾於塘工一事就其才力尙屬奮勉並未心存膜視但臣阿桂愚昧之見現已

特降諭旨用陳輝祖爲閩浙總督兼管巡撫卽在浙省督辦塘工俾地方管轄與海塘工程併歸一手委任旣重責成亦專卽用陳輝祖一人更易妥速集事或因陳輝祖有地方應辦事件不能常駐在工督辦現有王亶望查催照料陳輝祖不時到工察看斷不至貽誤况外省情形地方官事權已去雖有

虛銜不惟呼應不靈且致徒多掣肘於工程究亦無益臣阿桂愚意以爲富勒渾李質穎二人均可

毋庸畱工并奉到

諭旨因塘工緊要需人督辦且恐屬員聞信心存觀望不敢拘泥靜候部文卽將

諭旨內令富勒渾李質穎回京候

旨之處傳諭以便交印富勒渾李質穎理應卽日起身進京奏入

諭曰阿桂等覆奏富勒渾李質穎俱不必畱工一摺據稱李質穎血氣已衰不能有所擔任富勒渾於塘工一事

就其才力尙屬奮勉並未心存膜視但恐離任之後呼應不靈於工程究屬無益等語所奏自屬公論李質穎於海塘工程全不能有所擔任自不必畱工協辦卽富勒渾於工務雖較爲認真但旣接任有人且伊虛銜畱工轉致掣肘仍是有名無實自應俱令其來京候旨將此傳諭阿桂陳輝祖知之

又

諭曰阿桂等奏原任嘉興府知府陳虞盛聲名不好上年與王燧同在差局總理通同浮冒查該員在任時於省城購買民居蓋造房屋八十餘間又於嘉興地方置有

田房產業伊身故後其眷屬現任嘉興並未回籍現在將伊產業資財查封入官並行文該員湖北原籍一體查辦等語陳虞盛在差局辦理沿途水營昨南巡時於入浙首站見其過於糜費曾傳旨申飭三寶等彼時三寶等尙奏稱伊爲要好起見皆自捐養廉等語茲據阿桂等所奏可見陳虞盛與王燧竟以辦差爲名通同浮冒侵蝕爲自私自利之計三寶王直望何以從前並未奏及除三寶已就近令軍機大臣傳旨詢問外阿桂等傳諭王直望問其何以不行叅奏其如何登答之處卽行據實覆奏

十六日

諭曰前以阿桂等叅奏杭嘉湖道王燧劣蹟種種民怨沸騰已降旨革職拏問並據阿桂等查王燧資產多至二十餘萬兩又阿桂等叅奏已故知府陳虞盛係與王燧上年一同總理差務之員亦曾在杭州嘉興置買房產屢經傳諭阿桂等嚴訊伊等貲產從何得來切實根究矣上年南巡時經過江南各水營尙係仿照上屆規制不過畧加修整及添修古蹟一處朕已覺其不妥卽傳旨給還原主及一入浙江首站則屋宇倍增並多點綴隨面飭三寶王亶望不應如此繁費殊非朕省方間俗

之意據奏係陳虞盛實心要好自捐養廉未便阻止彼時雖成事不說而朕心實踏踈不安曾有御製駐浙江水營詩言其事比至杭州則添設座落更多今據阿桂等查辦情形則是王燧陳虞盛竟藉辦差爲名肆意侵蝕外博見長之巧陰遂貪縱之私且其平日必有朘剥民膏劣蹟以致天理昭彰因事敗露大約此事皆王亶望主張三寶竟無王見墮其術中所謂無能而可憫者也王亶望已於畱眷在杭一事草職畱工自効其辦差之有無染指俟阿桂審明自有定罪三寶現亦革去翎頂暫予從寬畱任至富勒渾李質穎於王燧陳虞盛藉

差貪冒之事雖然到任未久但不能查出叅奏且於王
直望忘親越禮大節有虧竟視爲泛常恬不知怪實屬
咎無可辭是以一併革去翎頂俟來京後另降諭旨

十九日

諭曰王燧等敢於藉辦差爲名外博見長之巧陰遂貪縱
之私必係依仗王直望爲之庇護故敢肆行無忌而王
直望若非與王燧等有交涉染指之私亦何肯曲爲包
庇蓋王直望平日辦事才具並非不能覺察如三寶之
一味顛預因人成事隨人得罪者可比阿桂務須嚴切
訪查使之水落石出據實覆奏毋得將就完事存做好

人之見至阿桂於浙江事件辦理完竣後不必急於回京伊上年曾在江南查看河道海口著卽於順道回京之便往清江一帶查勘高堰改建石工是否已有就緒其陶莊河身展寬之處現在情形若何是否日加暢達再薩載等所請增修徐州石工辦理如何光景此次所辦是否足資障禦於河務有益之處查勘事畢並可前赴河南將從前所辦儀封十六堡及李奉翰等所辦考城張家油房各工程並老隄已否補築完固一切善後之處俱關緊要一一詳悉查勘就近一面指示一面奏聞至河東總河韓鏞係屬新任有應行告知辦理事件

著阿桂面行詳悉開示今年豫省河工甚爲厯念不可謂目前無事也阿桂接奉此旨於辦理浙江事竣之後前往河南江南均須祥晰妥籌毋得草率完事卽至五月起鑿之前回京亦不爲遲

二十一日

公偕陳輝祖奏言竊查老鹽倉迤西至章家菴柴塘四千二百餘丈從前亦曾屢議接建石塘始以活土浮沙難施椿石而止繼以塘外護沙接漲廣遠而止本非可辦之工率以施工難易所見紛岐迄無成議上年

皇上南巡軫切海疆

親臨閱視念潮勢直趨北岸護沙無存塘根水深數丈朝

衝暮擊一線草塘豈能捍禦全漚潮勢况柴塘易

於坍塌年年修補終非長策究不如石塘之堅固

諭令將可以改建石塘之處勘估辦理經王直望奏明先

從陳字等號起至伏字號止改建魚鱗石工長二

千丈每丈用條石一百十三丈釘樁一百五十根

條石在於本省德清武康山陰會稽餘杭等縣及

江南省分辦樁木在於金華衢州嚴州三府屬購

辦正在開工間忽范家埠對岸淤漲陰沙日漸北

趨水勢貼塘搜刷以致柴塘屢次間段被衝矧陷
恐屆春汛更難抵禦而魚鱗石塘採石較難釘椿
不易難以及時趕辦因復議請於臺字號頂衝之
處建築搶修石工五百丈以禦春汛其魚鱗石塘
暫行停辦至李質穎到京奏改石塘徒費無益不
若於現在柴塘外一律改建坦水實於柴塘有裨
等語臣等自到浙後相度形勢稽查舊案柴塘之
外止有用竹簍木櫃以禦潮汐從無修築坦水之
事毋論塘根臨水有深至二三丈一日兩潮油灰
漿汁無所施用難以釘椿砌石且塘根固藉坦水

爲保護而坦水亦藉塘根爲倚靠方能堅固若以石鑲柴表裏浮鬆憑何存立此事之斷不可行者臣等自到工以來虛衷體訪一時衆論俱屬畏難苟安毫無定見臣等伏思海潮遷移不常浮沙往來無定此時章家菴旣屬頂衝卽迤東一帶亦在在俱關險要是從前改建石塘均屬先事預籌而現在之改建石工尤爲刻不可緩臣等前奏或仿照條塊石塘酌增工料加添丈尺以期施工易而成事速之處欽奉

諭旨俟履勘確實衆議僉同卽速上緊興工辦理但條塊

石塘究不如魚鱗石塘之堅固臣等前奏止就大概情形而論今數日以來悉心履勘通盤籌酌按日計工按工計料辦理魚鱗石塘二千二百四十二丈均可於乾隆四十七年冬間完竣伏思

皇上加惠黎元不惜用帑金爲沿海生民永籌樂利終以改建魚鱗石塘方可資捍禦而垂永久臣等不敢因有前奏稍存畏難遷就之見公同酌議富勒渾等所辦搶修條塊石塘長五百丈內自天字號止長三百丈天字號向西工長二百丈自來字號起迤東至食字號止二千二百四十丈俱擬建魚鱗

石塘仿照東塘之例酌量地勢高低或用十八層至十六層不等應需條石二十五萬餘丈浙省原辦條石十二萬八千七百五十丈江省原辦條石十一萬三千七百五十丈現運到工條石二萬一千餘丈僅供搶險石塘之用至續辦魚鱗石塘應用條石臣等卽飭本省並飛咨江省分派購辦嚴催趕運又所需樁木約估三十五萬根並飭本省金華衢州嚴州三府屬產木各縣領銀購辦并一應需用物料亦陸續採買俟現辦搶險石塘完竣後尅期諏吉開工以上二千二百四十丈工料脚

價約共估銀三十餘萬兩臣陳輝祖督率工員上
緊趕辦務於四十七年冬初完工至下樁處所臣
逐段簽試自來字號至師字號一千餘丈一丈八
尺之樁打至二時全行入土而自邵字號至率字
號卽有打至四個時辰方能入土者其自化字號
至老鹽倉積字號一千七百丈試樁三處誠如
聖諭沙性澁汕難於下樁除相近老鹽倉立字號至積字
號二百餘丈不能定樁處所應仍畱柴塘外其餘
一千五百丈安樁一丈八尺用礮夯打至四個半
時辰打下一丈四五尺週圍沙土卽合籠平樁不

能再打查椿木不能深入其底沙堅硬可知沙齧
椿牢力能擊石或可一律築砌或應仍存其舊恭
候

聖駕臨幸指示機宜再行多分年限接續辦理至現在議
築石塘離柴塘上餞約三四丈酌畱坦水地步緣
石塘工程全恃塘根堅固而保護塘根實賴坦水
蓋非此則海潮大潤往來衝激搜刷塘根無論柴
石塘工均難保其無虞從前辦理魚鱗石塘或用
條石二三層鑲砌坦水或卽以竹篾木櫃作坦水
塘根恃此外護方能經久實爲第一善策是以議

建石塘無論將來用坦水或用竹簍木櫃皆須預
畱地步但現在尙有柴塘爲重關保障且工費浩
繁勢難同時並舉俟全工告竣後酌地形之高下
水勢之平險或用坦水或用木櫃竹簍因地制宜
總期塘根得資擁護其新工未竣以前柴塘仍令
照前加意保禦俟石塘坦水一併築成卽將柴塘
歲修停止聽其自然以節糜費再遶海寧城之魚
鱗石塘內有工二十餘丈外係條石作牆內填塊
石歷年久遠爲潮汐衝刷底樁霉朽兼有裂縫蹲
甃之處又城東八里文將字號至陳文港密字號

止有石塘七處約共一百五六十丈地當險要塘身單薄石面亦微有裂縫上年欽奉

諭旨令於兩處均改建魚鱗石工俾一律堅穩今此項工程竣後再行改建魚鱗石塘所有改建石塘各事宜臣等督率在工各員詳悉商酌逐一勘估辦料鳩工次第興修務期妥速集事以仰副

聖主宵旰疇咨保衛萬民至意再臣阿桂前往尖山一帶查勘其尖山至塔山石壩內外自正月下旬以來均有新漲嫩沙而壩外更約寬里許實爲轉機佳兆其章家菴地方欽遵

諭旨添築盤頭溜勢亦漸離塘根現在趕打底樁腰樁鑲柴出水計日內可以完工奏入

公又奏言老鹽倉一帶柴塘水臨塘根工程險要仰蒙我

皇上廑念民生

諭令改建石塘實爲保衛久長至計乃臣抵浙後體訪衆論俱有因循苟且之見緣此次改建石塘費用浩繁工程遲速不同今昔情形亦異有報銷正銷斷斷不敷者卽如樁架一副需用樁夫十三名現因沙性澁滯牽算每架每日止能釘樁二根若按例

每椿一根止准銷銀五分是十三名之夫役每日只得銀一錢實不敷食用承辦各員均須幫貼銀六七錢不等他如木石料物或爲額定官價所限辦運均不無拮据即使酌量加增斷不便多至加倍有餘而藉端派累尤所不可伏思

皇上於民瘼所係不惜千百萬帑金爲閭閻禦災捍患從不肯以利民之事而稍病民臣仰體

聖意就該省情形通盤籌畫查有上年辦理塘工浙省商人呈請捐銀二十萬兩臣不揣冒昧仰懇

皇上將此項銀兩賞給海塘以爲額外貼費毋庸造入報

銷此外不許絲毫累民俛稱其值而民樂於從事
敷其用而工易於告成則官員既無所藉口而小
民踴躍爭先不難妥速集事以仰副

聖主加恩海疆優恤小民之至意均奏入

諭曰據阿桂等奏勘辦浙省改建石塘一摺內稱前奏請
仿照條塊石塘酌增工料加添丈尺以期施工易而成
事速今遵旨悉心履勘通盤籌酌條塊石塘究不如魚
鱗石塘之堅固按工計料辦理魚鱗石塘二千二百四
十丈工料腳價約估銀三十餘萬兩督率工員上緊趕
辦計四十七年冬間可以完工應如所奏辦理惟在實

力妥爲以期久安黎庶已於摺內批示至所奏老鹽倉立字號至積字號二百餘丈不能釘樁處所應請仍畱柴塘其餘一千五百丈用樁夯打至四個半時辰打下
一丈四五尺卽不能再打沙齧樁牢力能擊石或可一律築砌或應仍畱其舊等語俟阿桂到京時面奏亦於摺內批示又據另摺奏稱樁架一副用夫十三名每日打樁二根按例每樁一根銷銀五分承辦各員需幫貼銀七八錢不等查有浙省商捐銀二十萬兩一項除造船用銀一萬兩尙餘銀十九萬兩懇請賞給海塘以爲打樁夫役額外貼補毋庸造入報銷等語自應如此辦

理不然此項何用至所請毋庸報銷之處不報部可也
總不奏明則不可亦於摺內詳晰批示此係商捐銀兩
著卽賞給該處塘工交與陳輝祖嚴飭工員實力妥辦
不許絲毫累民俾稱其值而民樂於從事敷其用而工
易於告成方爲妥善且不特商捐一項卽王亶望等前
請認罰銀兩及王燧陳虞盛等查抄之項均應歸入海
塘項下實用實銷如有餘存屆期陳輝祖另行請旨再
陳輝祖以總督兼巡撫事務繁多自不能常駐工所王
亶望又係草職之人呼應不靈署工部侍郎楊魁久任
江南於江浙情形熟悉著派往浙江專駐海塘工所幫

同陳輝祖辦海塘事務於公務較爲有益

公又偕陳輝祖奏言王燧以監司大員不思潔已奉公貪奢放縱牟利營私種種不法行同市儈實出情理之外按律問擬杖流不足蔽辜應將王燧發往伊犁自備資斧永遠充當苦差以示懲儆其房產照例入官奏入

諭曰阿桂等具奏審擬王燧貪縱不職牟利營私各款照不枉法論律擬發往伊犁自備資斧永遠充當苦差一摺問擬殊屬輕縱已批交該部從重核擬具奏矣王燧身爲監司大員由朕特加擢用乃不思潔已奉公貪縱

不法以致民怨沸騰實出情理之外非尋常貪縱玩法者可比其勒買部民女子房屋及夥開銀號等事實與枉法無異卽從重擬絞亦不爲過何得僅擬外遣若凡爲地方大員者罔顧法紀平日逞其婪索驕縱之私倖免無事卽可坐享厚資從容逸樂及至事蹟敗露不過問擬外遣何足以示懲儆而彰法憲乎王燧卽著富勒渾親身嚴行押解來京交與刑部從重治罪一路小心管押毋稍疎虞至阿桂陳輝祖審擬此案輕縱之處著傳旨申飭

二十六日

公奏言修築海塘事宜一改建石塘魚鱗二千二百四十丈原設東西兩防同知責任綦重請於現任丞倅內選幹練數員各認段落經手辦理卽以兩防廳及委令協辦者爲承辦之員其查收物料稽察工作卽以奏畱及揀發來浙之丞倅知縣分段派委定爲監辦之員至杭嘉湖寧紹台二道爲督辦大員集料鳩工稽查派委皆其專責王直望本係總辦應令常川督催其工程做法臣仍與公同籌酌如各有所見許令具摺陳奏一應用條石二十五萬四千八百丈應照原議浙江江蘇二省

分辦查魚鱗塘逐層收分需厚一尺寬一尺八寸
條石間砌壓縫現飛咨江省按照尺寸趨辦至浙
省運石船紹屬現有三百六十隻由外海濟運每
月飭運五千餘丈湖屬由內河運工每月飭運三
千餘丈加以江省按月濟運自足敷用一應用排
樁木及梅花樁原派金衢嚴三府屬承辦每月約
辦塘工一百丈應用樁木一萬五千根分於各該
縣餘銀內勒限採運責成各該府催解並飭州縣
雇覓釘樁人夫到工至塘工首重底層現派佐雜
各員分段按照樁木圍圓長短尺寸親身量記點

檢入土如式一各處採辦木石應先出示將給發採購裝運各價曉諭如有短價勒派情弊嚴行叅處其運解到工時卽令解役一面報明總理道員一面持印票批文自投管收專員處立爲驗收並用該員印信給與回照一本年應辦塘工一千二百丈擬分三次每次開槽四百丈俟釘樁已竣卽挨次開挖其附塘民居給銀遷移令豐裕支給並飭承辦各員每五日將簽樁若干砌石若干開具清冊申送查考王直望率同杭嘉湖寧紹台道往來稽察臣仍隨時赴工攜帶原冊查驗一原請

留浙十五員續留四員又續請揀發十二員內丞
倅知縣十六員每次辦四丈每員監辦十五丈止
應八員覈用應分兩班替換其任雜十五員亦分
兩次派委統俟工竣補缺如有怠玩者卽行叅處
奏入得

旨諸條皆妥依議行

二十七日

公奏言 臣等奉

命籌辦海塘抵浙後業經將沙水工程情形及定建魚鱗
石塘緣由節次具

奏在案茲自二月中旬以來章家菴東首黃字號欽迥殊筆圈記處所添建盤頭一座業已趕築完工挑溜甚爲得力又章家菴迤西相離七十丈添築盤頭一座使其來回挑溜衝刷對面陰沙亦已趕築完竣自新建兩處盤頭以後溜勢漸向南趨所有范家埠對岸前漲陰沙中衝水溝一道陰沙分爲兩塊其北面小者較前更覺刷低潮退時全然不見南首大者亦已刷薄又范家埠之東對向海中相近南岸前漲陰沙一塊北面現亦刷低又翁家埠離塘一百餘丈之外旬日以來新漲陰沙一塊東西橫

長七百餘丈寬自一百餘丈至一百五十餘丈將水勢分爲南北兩股而行其沙之北岸止水深四五尺不等將來陰沙漸濶接連塘根足資擁護而自翁家埠至華家街一帶循塘水勢止深一二尺其下俱有嫩灘夫南坍北漲乃自然之理今水勢旣已南趨北塘復生嫩灘皆由

聖主廡念民生籌辦海塘

海神顯佑實爲轉機之佳兆也至章家菴西首添築埽牛俱經完竣接建柴工二百餘丈內亦已趕鑲一百八十丈其餘現飭趕築計日內可以完工奏入

報

聞

又

諭曰阿桂等覆奏查訊陳虞盛王燧上年辦差侵漁不出商辦及各員幫辦兩項等語看來伊等費財竟係侵蝕商捐居多浙省商人踴躍辦公固屬分所宜然但陳虞盛王燧藉差侵漁商力或未免疲乏不可不加體恤有無應行加恩之處著傳諭阿桂等將該省鹽務情形悉心籌畫或於鹽引內酌量加增或竟於查抄及認罰項內酌量賞給銀兩俾商力得資充裕之處詳悉妥酌據

實具奏候朕酌量加恩

三月十二日

公偕陳輝祖奏言時屆季春潮勢漸大章家菴東西新建盤頭以來溜勢漸向南開所有范家埠對面舊漲陰沙二塊其北面小者業已刷盡南首大者亦已刷低潮退時亦不甚見盤頭之外漸有嫩沙翁家埠一帶沿塘水深三四尺不等至現辦搶險石塘五百丈自上年十一月以後陸續添安椿架廣募人夫打樁砌石分段辦理上緊督催至本年二月中旬旬已砌築三百丈完竣今於二月二十

八日復續辦二百丈一律砌石全行告竣臣等查
驗此項工程雖據魚鱗石塘稍可減省然堅築地
盤礮打椿木嵌方塊石逐層疊砌條石一切鬪縫
鈎貫尙爲緊密填築土餞亦皆堅實足資捍衛再
搶險石工辦至寒字號現於來字號起接續趕辦
魚鱗石工四百丈業經開槽安設椿架並已釘椿
五百餘根俱能如式深固臣陳輝祖督率在工各
員上緊採辦木石僱運物料務期妥速集事以期
仰副

皇上廑念要工至意

十六日

公奏言來字號起迤東至倉字號止建辦魚鱗石塘二千二百四十丈酌定章程奏蒙

聖鑒在案查工段以四百丈爲一段分作五限半趕辦按五日計工每限四個月約來歲冬間可以全工告竣今初限四百丈工程已於三月初五日諏吉開工第一緊要以底樁爲最緣塘身穩固全在根盤結實所用前面排樁木係比密築打旁無空隙裏層梅花散樁寸節深打入土之後樁面彼此相間處例須填築碎石并墁灰土俾樁石槽底連成

一片庶承重鉅工分外得力石料一項共需丁順條石二十五萬四千八百丈照原奏與江蘇分半採辦均能如數交工無虞短絀椿木一項共需三十餘萬根分派本省金衢嚴三府屬承辦各就附近購運如限解送足敷工用又仰蒙我

皇上恩施優渥格外賞給商捐銀二十萬兩俾以後工用價脚充裕寬展乘此春和日永踴躍將事僱工亦速臣往來工所親加督察務令實料實工在在堅密整齊以保永遠鞏固仰副

聖主捍衛濱海民生之至意奏入報

聞

三月十一日

公偕薩載李奉翰奏言臣阿桂欽奉

諭旨於順道回京之便往清江一帶查勘陶莊河身展寬之處現在情形卽會同臣薩載臣李奉翰前往該處詳

細察看查陶莊新河上年春間仰蒙

聖明指示令將北岸河身一帶展寬現在形勢廣濶大溜通行暢流下注並無阻遏惟清河舊縣之玉皇閣埽工迤上河勢向走北岸該處埽工本屬迎溜頂衝自上年冬間溜向南趨南岸露有窰基數座土

人咸稱爲沈家窰土性堅實溜勢衝刷未能寬深
本年二月臣薩載在於南岸挑挖引渠一道長一
百二十八丈寬十五丈又砌灘長三十丈寬十八
丈以順其勢自開放後溜勢頗順今臣等親至該
處察看北岸長有暗灘水深不過一尺而止溜勢
竟走南岸所挑之渠已成河勢但土性堅實驟難
衝刷寬深河身尙覺逼窄過水無多每遇長水時
沈家窰以上長水尺寸較多以下長水較少此乃
不能舒暢之明驗亦足爲上游各工之病今臣等
公同酌定應傍南岸就勢再展寬三十丈挑長二

百五十丈挖深二丈則河身舒暢大溜可以迅行
下注將來不獨對岸埽工一帶可期漸次停淤而
下游順黃壩對岸灘嘴亦可望其刷長與陶莊新
河頭形勢更爲直捷刷去一分擁遏即可望一分
暢達甚爲有益所有此項工程估湏土方銀二萬
三千八百兩臣薩載臣李奉翰一面督飭工員預
集人夫俟奉到

諭旨允准卽分段上緊僱挑務於四月內完工以備臨時
啟放俾汎水暢流至陶莊新河尾北岸現在日漸
坍塌足見流勢暢順惟聞桃源縣所屬之九里岡

一帶河底淤淺冬春水落之際重載經過往往有
起剝之事臣阿桂現卽親往該處詳細查勘是否
尙可興工能否於伏汛前挑挖完竣之處酌量情
形再行具奏奏入報

聞

公又奏言

臣阿桂欽奉

上諭於浙江事件辦理完竣後順道回京之便著往清江
一帶查勘高堰改建石工是否已有就緒本月初四日
臣阿桂自杭州省城起程十二日晚行抵清江浦
十三日卽赴高堰山盱一帶沿湖察看該處磚石

工自高堰武家墩汎至山盱蔣家嘴南止應加高及磚工改建石工通共一萬七千一百九十八丈緣工段綿長不能同時興修經督臣薩載等酌量緩急分作三年辦理奏蒙

俞允在案所有應行急修之工皆係湖心卑矮處所最關緊要並磚工朽壞宜先拆改者內高堰所屬共急修工六十八段計長一千九百二十四丈五尺山盱廳屬共急修工五十段計長一千二百一十九丈八尺臣阿桂連日上下詳細查勘各工應加高者俱已加高應拆改者俱已拆改間有短一二層

未及修砌並少蓋面石二層者俱飭上緊修砌統計工程業有九分以上三月內定可告竣其作法一切均屬如式尙無草率之弊並有上年估修時列入次修嗣遇風暴掣卸者現亦趕緊辦理務期伏汛以前完工俾資抵禦其澗徐二汛堤身窄矮應行加高幫戩土工原估內列入急修亦已培築堅厚五壩內之智義二壩上年因湖水盛漲啟放後壩基偶有被水衝動之處並已修砌完整臣阿桂按通工核計所有次修緩修之工於四十八年總可一律完竣從臨湖大堤遶身全改石工洵屬

永遠鞏固且察視堤身水誌每年湖水大時堤岸
高處離水二三四尺不等卑矮處所幾與水平自
此加高之後卽遇湖水漲發皆離水數尺可以永
免漫溢之虞奏入報

聞

二十六日

公奏言 臣 仰蒙

恩命於順道回京之便查勘黃河各工凡於河務有益之
處總期悉心籌酌畫定機宜以仰副

皇上廑念河防綢繆未雨至意伏思論治河者以隄防與

疏濬各盡其宜方爲有裨查南河埽壩各工尙屬
穩固足資抵禦惟河身中有高仰淤淺處所多一
層壅遏下流不能通暢則上游未免漫溢爲災但
水底撈浚於事無濟止有估挑引河因勢利導俾
其日益寬深借水刷沙庶可以舒溜勢而資暢達
所有沈家窰引渠酌量展寬挑深業經恭摺具

奏外

臣

聞桃源縣所屬之九里岡臨河集一帶河心橫

亘岡沙淤淺尤甚今

臣

親至該處上下履勘詳細

體訪該處河勢向走北岸一帶河身汕刷年久本
深二三丈嗣於乾隆三十六年陳家道口漫溢之

後北岸埽工淤閉河向南趨由臨河集下注該處地勢本高且於古城山根相連岡土沙礪不能刷動臣逐加測量其九里岡一帶淤淺處所東西共長一千餘丈水深僅止二三尺不等其岡脊以上水深六七尺迤下水深丈餘是該處岡沙幾似黃河中有一滾水大壩卽如今春桃汛長水時徐州及峯山四閘皆爲黃河逼來之處乃峯山長水較之徐州僅止多長數寸而邳睢宿遷一帶則反多長水四尺其桃源以下又較邳睢少長三尺此卽岡上阻遏之明驗上年鄒家渡漫工固由此處河

漕不能暢順所致而下游梗阻盛漲難以速消實

足為上游通河之病臣與督臣薩載河臣李奉翰

公同相度亦以為必應籌辦之事但需費較多臣

思

皇上於民生攸繫不惜多費帑金永籌捍衛因酌擬於北

岸臨河灘內深挑引河一道俾資宣洩河臣李奉

翰熟悉河程詢據該督稱如蒙

恩准辦理即督飭工員上緊僱挑務於五月二十以前完

工等語臣思清口以下連年衝刷已極深逼此處

及沈家窰引河籌辦之後不特邳睢一帶河水易

消今年伏秋大汛卽可暢流下注而逐漸而上皆
可望其衝刷抽槽於上游各工均爲有益以現在
情形而論實有不容稍緩之勢奏入報

聞

公又偕薩載李奉翰奏言桃源廳屬臨河集之九
里岡一帶河勢向走北岸舊有埽工嗣因河向南
趨工卽淤閉河勢由南岸之臨河集下注該處素
稱岡淺乾隆四十三年臣薩載於總河任內曾經
奏明調撥河兵堡夫挑浚一次緣此段岡土砂礮性俱
堅實不能冀其衝刷通深而中間橫亘岡砂千餘

丈內測量水深僅止二三尺不等較之迤上水深六七尺迤下水深九尺一丈者其爲高仰已屬顯然全河至此未免爲之梗阻但黃河溜勢雖趨向靡常而水性就下則係必然之理若能挑挖深通使之流行暢達則上游盛漲即可望其隨長隨消不致壅遏爲患但水底不能施工撈浚終屬無濟臣等上下履勘再四籌酌惟於北岸坐灣處自李家莊起至臨河集北首止取直開挑引河一道計長一千一百四十丈口寬四十丈底寬二十八丈通身挑深二尺約估需銀十一萬二千餘兩臣薩

載臣李奉翰一面調撥工員預集人夫俟奉到
諭旨允准辦理卽分段上緊僱挑務於五月內完工屆期
開放因勢利導自可衝刷寬深伏秋大汛流行直
注較常年自當更爲通暢則上游消落亦必迅速
於全河形勢大有裨益奏入

諭曰宜速爲之不可因欲速而工不實

公又奏言徐州城外有舊石工三段每逢長水時
僅出水五六寸至一尺二三尺不等又石工頭迤
上至韓家山尙有空檔四百餘丈荷蒙

恩准加高接築茲臣欽奉

諭旨於浙江事體辦理完竣後前往查勘該處增建石工
是否足資抵禦本月十七日臣由清江浦起程至九里

岡一帶籌辦淤淺處所二十一日行抵徐州府卽
至城外周圍察看該處石工自東門外石機嘴至
西門外娘娘廟止其舊工三段長八百九十五丈
內有應行加高二三四層及蓋面一層者俱已築
砌完竣與新石工一律相平自此加高之後將來
汎水漲發可以離水數尺不致漫溢爲虞其自周
家莊迤西至靈神廟添建石工四百三十丈應砌
石十七層又自靈神廟至韓家山石工二十丈因

相近山脚地勢稍高應砌石十二層現在俱築砌五六層及二三層不等其做法一切均屬如式尙無苟簡草率之弊內有現在釘椿未經鋪石者不過數十丈查工所運到石料頗足敷用上緊修理均於四月內可以完工伏秋大汛足資抵禦奏入

報

聞

二十九日

諭曰據勒爾謹奏蘭州撒拉爾回人蘇四十三等搶據河州城勒爾謹因兵丁尙少現在屯兵狄道州俟各路營

兵調齊卽行進剿等語現已傳諭西安提督馬彪帶兵二千名迅速前往並諭西安將軍伍彌泰寧夏將軍莽古賚各選集兵一千名豫備倘須調用卽令前往協同剿捕並於火器健銳兩營兵丁內挑選豫備阿桂此時查辦河務已將次就緒著卽速起程來京倘有必須勁旅之處阿桂卽可帶兵前往著將前降諭旨及勒爾謹仁和奏到各摺一併抄寄閱看

阿文成公年譜卷二十三



受業

王昶勘定

盧蔭溥增脩

第三孫那彥成恭纂

乾隆四十六年

三月三十日

諭曰據伍彌泰畢沅等奏提督馬彪已於二十五日星馳
前往益選兵一千分起迅赴河州又伍彌泰現挑西安
滿兵一千預備親自帶往接應所辦與昨降諭旨相合
甚屬可嘉至新舊教既自相讎殺必非合駮或赦一勦

一以分其力未嘗不可而其互相讎殺之罪待事定再辦此等機宜恐勒爾謹不曉且爭教讎殺起衅自非一日勒爾謹何以早未籌辦此時各路大兵雲集調度機宜最爲緊要恐勒爾謹未能料理悉協著傳諭阿桂竟不必來京卽從河南取道徑往甘肅程途較近所有節次所降諭旨并批示奏摺已經抄寄閱看亦別無訓諭之處阿桂卽由河南馳驛前往到甘肅後卽將查明新教舊教及調度勦賊情形迅速具奏

四月初一日

諭曰昨降旨令阿桂馳驛前往甘肅辦理勦滅逆回事宜

此時諒已奉到前旨迅速遶行矣因思阿桂到彼調遣
需人已派乾清門巴圖魯侍衛福寧泰斐英阿明山河
蘭保各賞銀一百兩馳驛前往甘肅聽候阿桂差遣又
現在來京引見之肅州都司馬雲卽係西寧人熟悉該
處情形亦賞給銀一百兩隨泰斐英阿等一同馳驛前
往聽用看來此事起畔已久勒爾謹平日不能約束使
之知感知懼或存將就了事之見以致釀成事端阿桂
務悉心籌畫妥協辦理將賊匪剷滅盡絕根株以靖地
方盍此案或因勒爾謹辦理不善或係地方官釀成均
著詳悉查明具奏

又

諭日本日畢沅奏逆回進逼蘭州焚燒關廂省城眼前失
事已飛札文綬等調兵合剿復札富勒渾雅德調河南
山西兵前赴西安聽調龔懇迅發京兵派熟悉軍務大
臣帶領前往等語昨已傳諭阿桂令其卽由河南星赴
甘肅今逆回如此猖獗阿桂應卽迅速遄行現派尙書
和珅額駙拉旺多爾濟領侍衛內大臣海蘭察護軍統
領額森特馳驛前往甘肅龔派巴圖魯侍衛帶健銳營
兵二千名火器營兵二千名卽日分起迅速前往如和
珅等先到甘肅卽行調遣辦理俟阿桂到彼卽交阿桂

接辦和珅仍卽回京供職

初二日

諭曰阿桂和珅辦理此事必須印信已令福長安齎欽差大臣關防交與和珅帶往甘肅俟見阿桂卽令轉交應用

初四日

公奏言本月初一日臣在安陽途次接奉寄到

諭旨金闕勒爾謹等各奏摺逆回罪大惡極自應立卽剿除現已欽奉

諭旨令馬彪帶兵前往并諭伍彌泰莽古賚各選兵預備

調用益於火器健銳兩營兵丁挑選預備仰見

睿慮周詳無微不至臣思逆回意在刦殺因河州先已派

出兵丁二百名存城兵力單弱居民事出倉皇各

顧家室不能盡力守禦以致猝被攻破現在提督

仁和及勒爾謹前調各營兵二千名陸續到齊兵

力既集無難一鼓擒滅臣於二十二日晚由時和

驛起程因瘡疾發動每日僅能行百餘里今接奉

諭旨儘力進行約計初九初十可以到京奏入

諭曰阿桂奏到遵旨回京一摺計拜發此摺後又接到續

降不必來京之諭旨諒卽由途次前往但伊因瘡疾發

動每日僅行百餘里此時卽竭力趲程恐亦未能迅速到甘現在甘省急需重臣督辦刻不能緩和珅年力強壯行走自能便捷計可到在阿桂之先務須星夜兼程前進督辦一切俟阿桂到甘省後和珅仍遵旨將所辦事宜詳悉告知阿桂再行回京

初五日

公奏言臣於直隸磁州途次接奉寄到

諭旨令臣卽速來京以備帶兵前往甘肅臣思逆回嘯聚不過二千餘人况河州城內俱係百姓無可脅從不難立卽殲除現在勒爾謹等續調各營兵丁諒

已到齊又有西安提督馬彪先行馳往並選西安綠營兵一千名分起迅赴河州計西安至蘭州十八站蘭州至河州二三站約本月初旬可到自必將逆回剿滅全完如果賊勢猖獗必需續添兵力所有帶兵之人最爲緊要伏乞

皇上於海蘭察額森特二人內酌派一人先行馳往並令於侍衛章京如阿爾都等前在軍營得力伊所深知者揀派數人奏

聞請

旨派令前往至奎林勇往能事但由烏魯木齊帶兵前至

河州亦幾及四千里未免行走遲滯將來如果調用奎林竟請

特降諭旨令其先行馳往並令於所屬額魯特內挑選精兵一二百名派員隨後帶赴河州備用更爲有益

臣接奉

諭旨後卽帶同軍機司員仍由彰德衛輝一帶前赴甘肅惟有儘力趲行以期早到奏入

諭曰據阿桂奏在磁州接奉諭旨卽由彰德衛輝一帶儘力遄行等語海蘭察額森特二人業經派令同和珅前往其阿爾都等亦隨同和珅赴甘至奎林先已降旨令

其帶兵來甘後因烏魯木齊至甘肅程途太遠恐緩不濟急復經降旨停止此時派往之人甚多亦無需奎林一人也

初六日

公奏言臣於初三日行至衛輝接奉

諭旨及畢沅奏到各摺逆回竟敢進逼蘭州官兵多有傷折賊勢如此猖獗殊堪髮指非厚集兵力大加殲戮淨絕根株不足以抒憤恨臣現在晝夜兼程行走但自恨爲瘡所累不能迅速星馳計每日連夜趲行總在二百里以內實深焦急現奉

諭旨派尙書和珅等馳驛前往自可先到甘肅調遣辦理
然臣亦不敢因派辦有人稍紓已責惟有儘力兼
程以期迅到接辦奏入

諭曰今日接勒爾謹奏到賊勢已敗諸事易辦卿可放心
養瘡而行若再接再捷音益不往亦可

恭錄

御製詩

陝甘總督勒爾謹等奏報勦捕撒拉爾番回誌事十
韻有序

撒拉爾番回卽狗西番其俗人畜並處好卽人怒卽

獸往年因大加懲劄安靜五十餘年今其醜類復滋
昨督臣勒爾謹奏撒拉爾番回蘇阿洪等因爭立新
教殺傷舊教數人遣官往捕而賊匪等竟敢抗拒益
戕知府副將勒爾謹因率臬司福寧領兵往剿更調
集甘省提鎮仁和等五路兵而賊已乘間侵佔河州
維時事起倉卒勒爾謹暫駐狄道藩司王廷瓚保守
蘭州省城賊乃聞道進逼省城焚燒關廂西安巡撫
畢沅以聞將軍伍彌泰提督馬彪各領兵赴援奏到
卽勅飭八旗勁旅并命大學士阿桂尙書和珅等往
莅其事乃兵甫啟行而王廷瓚卽奏誅殺賊匪教主

馬明心茲勒爾謹畢沅仁和等奏克復河州省城圍解且擒殺賊匪要犯多人擊退上山即日可期剿滅

云云因勅分別獎賞頒諭中外僉賦十韻紀事如左

狗西黑帳本番離白帽非回竄籍呼狗西番又名黑帳房與內地回人戴白帽

者本另一種類昨勒爾謹等奏乃以其不食猪肉爭教始

因執新舊據州遂肆攫萑苻撒拉爾番回本舊教近因賊首蘇阿洪等欲另立新教殺

害舊教數人肆行不法該督委蘭州府知府楊士璣河州協副將新柱前往查拏途次白莊被逆番聚眾殘害時勒

爾謹一面率臬司福寧帶督標兵二千各會剿而逆匪乘官兵未到之先竟擁男婦二千餘搶佔河州實為罪大惡

極神人如狂一旦為猖獗不畏三章置鑕提鎮領兵皆

宿將甘肅提督仁和西安提督馬彪及各鎮總兵圖欽保德寧等皆曾經出兵金川久歷戎行故臨陣調度井

可文戈公戶會卷二十一

然因并交部從優監司守省具嘉謨甘肅藩司王廷璿以

議叙以示獎勵賊匪圍逼時悉力守禦又安定縣回民馬明心係賊人新

教之主前已拏禁省城王廷璿因賊人索取許其城上一

見指稱稟明督臣批至釋回隨將馬明心正法以免後會

患辨理實合機宜因賞給一品頂帶仍交部從優議叙

征有算妖氛斂決戰無前賊勢孤此案實起倉卒勒爾謹

勦仁和由途次迎勦金令德寧額爾恆額一面把守賊人

所毀河橋施放礮位一面直渡黃河督率官兵奮勇殺賊

圖欽保復手刃四賊將逆匪擊退上山此近日伏林遠滿

時賊眾已成釜底游魂揜滅指日可計矣近王伏林明季

四甘肅番回雜處好勇鬪狠其常也然小醜潢池官兵一

至即盡何辭淨勦受駢誅分馳禁旅原資眾先據畢沅奏

制軍紆壯畧鄰封安撫裕良圖

勒爾謹既調集甘省各路兵而畢沅在西安境內聞

報即悉心調度協濟滿漢官兵事事迅速妥協並有先辦而與所降諭旨相合者實屬可嘉之至因賞給一品頂帶

仍交部從優議叙以獎賢勞羣心齊自成功速小醜殲將乏處道方籲

佑隨聞捷信

是日 粵祭有薄伐番回不容已維揚速冀宴邊民之句回鑾至御園遂接此奏誠

吳乾 垂貺也曰欣曰敬曰慙夫

十二日

公奏言 臣於初七日接陝西巡撫畢沅來札知賊

人退踞龍尾山八蜡廟等處各路官兵陸續前到

兵力稍厚陝西省連發滿漢官兵五千約初十日

以內俱可到齊並聞督臣勒爾謹於三月二十九

日帶兵回省目前似可無意外之虞等語又於初八日畢沅將馬彪原札寄閱據稱河州業已收復經督臣派撥舊教回人二百名同西寧兵二百名在彼防護賊人現在佔據龍尾山華林寺山梁察看賊勢不過千餘人等語臣思伍彌泰等所調之兵皆可接續齊集小醜自不能復逞螳臂若賊人盤踞山梁遷延不去自當殲戮無遺即使勢窮力促計圖竄逸該督業已派兵在洪濟橋沙泥站兩處堵截縱有餘匪竄入深山官兵四面圍擒亦可剷除淨盡臣查勒爾謹畢沅節次調遣陝甘兩省

綠營兵及伍彌泰額爾恆額帶往之駐防滿兵已
有八千餘名其勢足敷會剿及邀截搜捕之用且
四川兵二千名俱界連甘肅尅期可到兵力已屬
有餘就現在情形而論不但晉豫兩省官兵毋須
調遣卽京兵亦可停止派往伏乞

皇上特降諭旨令京兵已經起行者中途撤回未經起行
者卽令停止臣一面仍先行咨帶兵行走之護軍
統領舒亮等暫行停駐俟奉到

諭旨卽陸續分起回京再臣晝夜趲行程途多寡不等每
日夜約行一百五六十里計程明日可過潼關如

尚書和珅尙未經過臣於途次畱心探訪恐沿途驛站馬匹不敷分應擬於前途暫停俟和珅經過晤悉一切先令迅速前往臣再儘力遄行奏入

諭曰據阿桂奏途次連接畢沅來信知現在各路所調之兵已有八千餘名足敷會剿等語前以京兵一千五百名業經起程是以且未撤回俟擒賊實信到日卽行降旨但思小醜旣可立就殲擒自不必復需勁旅現已另降諭旨令領隊大臣舒亮卽行帶兵回京並傳諭沿途各督撫知之

十六日

公偕和珅奏言臣和珅於山西途次接奉

諭旨卽星夜兼程行走於初十日過潼關臣阿桂於初九

日過潼關沿途探聽知臣和珅相隔不遠因緩程

稍候於十一日先後俱到臨潼臣和珅當卽將

諭旨並一切應行籌辦事宜與臣阿桂公同熟商妥議俟

到甘省時相度機宜辦理再臣等行抵陝境賊匪

大概情形俱已深悉現在逆回退踞山梁各路官

兵雲集足敷堵截勦捕之用其在途之京兵一千

五百名計程僅抵豫境臣等一面奏聞一面卽行

知帶兵行走之護軍統領舒亮等令將前隊作後

隊陸續按起回京至

乾清門侍衛等雖無須伊等帶兵打仗但將來拏獲首
逆及要犯應行解京遵

旨令伊等押解進京臣等擇其中曉事者酌留泰斐英阿

福寧二人俞三等待衛阿爾都以備差委餘一併
令其回京俞令伊等沿途緩程安靜行走俾驛站
馬匹不致應付竭蹶以免煩擾至額駙拉旺多爾
濟已遵

旨由潼關走山西一帶出口回伊游牧處所又農起等俱
已傳

旨行知令其回京臣阿桂帶往甘肅之衛輝營叅將劉之仁業於初十日在華州給咨令回原營至前奉

旨派出之記名以道府用之司員李照等六人除海廣現

隨臣阿桂和珅卽先行帶往其餘五人容俟到甘

後另行酌量差委再定去畱臣和珅於拜摺後仍

卽星夜兼程前進臣阿桂遵奉

恩旨緩行聽候

諭旨奏入

諭曰前次派往京兵早有諭旨撤回本日勒爾謹等奏將寧夏四川兵停止所辦尙是但賊旣據險自守又放火

何爲若云以放火爲搶掠之計則此時官兵四面圍困賊人又從何處搶掠所奏甚不明晰著和珅詳查覆奏現在據阿桂和珅奏稱十一日先後俱到臨潼公同商酌一切事宜和珅並留泰斐英阿福寧阿爾都以備差委仍卽星夜兼程前進等語泰斐英阿等前已有旨令其押解遊犯進京和珅所辦甚是至阿桂此時途次只須緩程前進再行候旨

二十一日

諭曰昨閱伍彌泰仁和等奏到各摺是勒爾謹之安坐衙署一籌莫展已可概見且並未見伊馳奏勦賊情形竟

若置身局外恐該處無督辦大臣指示調度衆人互相
觀望無可倚恃關係非小阿桂仍須到彼料理於剿捕
事宜方爲有濟著傳諭阿桂卽行兼程前進毋稍稽緩
龔和珅知之

二十六日

諭曰和珅奏稱接阿桂札知伊於二十一日可抵蘭州現
在剿滅賊匪正須督辦阿桂此時到彼與和珅一同和
衷籌辦甚爲妥善俟剿捕事宜稍有就緒和珅年力壯
盛卽可先行速回面陳一切阿桂尙須經理善後事宜
自當緩程回京至現在督辦一切阿桂和珅尤須同心

協力迅速籌辦不可稍分畛域方於公事實有裨益朕於數千里外因此事深爲厯念日夜不寧伊二人應亦深體朕懷也

二十七日

諭曰甘肅逆匪蘇四十三等肆擾不法係因爭立新教舊教不從致被殺害起衅若地方官早爲嚴明料理斷不至釀成事端乃勒爾謹經理不善以致養癰貽患從未奏明此事其罪已無可辭及事發之後卽當迅速妥辦以贖前愆乃朕已簡派八旗勁旅起程前往益就近酌調阿拉善兵協勦而勒爾謹轉一味含糊且以半月之

內卽可殲滅飾詞具奏致京兵等均各撤回今賊匪竄
匿蘭州城外山梁幾及月餘雖節次勦捕賊匪窮蹙待
斃已如釜底游魂而現在尙未淨盡殲戮致稽時日且
調往將軍提鎮等在城外督兵勦賊而勒爾謹竟安居
城內衙署僅委道員駐劄城外視爲與已無涉以致衆
相觀望坐失事機殊不可解朕初意本以逆匪滋事時
轉不便輕易地方大吏今勒爾謹如此辦理錯謬其罪
甚大難以姑容著阿桂和珅傳旨將勒爾謹革職拏交
刑部治罪并派妥幹章京押解送部目今卽擒勦賊匪
淨盡而善後之事正資料理因思李侍堯雖以簠簋不

飭獲罪而其材實能理繁治劇陝甘總督員缺著李侍堯以三品頂帶馳驛前往管理李侍堯未到之先著阿桂暫行兼管此朕用人苦衷中外宜共諒之

二十九日

公偕和珅奏言竊惟行軍制勝必須設卡安營使聲勢聯絡號令森嚴方足以壯士氣而寒賊膽查蘭州省城自賊匪滋擾以來民心無不驚慌而綠營兵丁又因屢次打仗傷亡已多臣等未到之前聞西南關外一帶通賊處所賊人竟敢任意往來搶掠民間牲畜口食並於燒剽民房內藏匿乘間

放火毫無顧忌至各路調來之兵雖已陸續到甘
因無總辦之人諸事渙散又各營零星散處聲勢
既不聯絡紀律又不嚴整是以不能使賊望而生
畏臣阿桂已於本月二十一日巳刻抵蘭現在申
明軍律激勵戎行並派兵自西關外從河岸迤南
至山梁安設卡柵使彼此接應又於山包上劄一
大營照料各卡俾賊人知我兵逼近不得不晝夜
防守且有此卡營斷其來路賊人卽不能近關外
滋擾民心自漸安貼將來進兵攻勦時卽可由卡
營前進亦爲迅便又此路營卡立定後所有城守

兵丁即可撤下一二千名逐漸添放卡棚步步進逼賊窠扼其險要賊人自必日加窮蹙無難剋期殄滅至綠營兵丁因從前賊匪猖獗時未經揣量賊勢多寡強弱陸續到來地方官不俟力齊卽催令零星打仗以致傷亡甚多愈行畏怯又各處兵丁內新者多而舊者少卽如曾在金川軍營跟隨打仗者甚屬寥寥其新補兵丁未經行陣心志不固安能向前効命兼之兵不顧將將不知兵一遇賊匪卽行惶遽實由於此臣等現在簡閱各營官兵令懦弱者守城或打仗時令其誘敵擇其強壯

奮勇者向前打仗命海蘭察額森特明亮總辦
各營倘遇賊人滋擾卽一面報知臣等一面調遣
勦殺則呼應較靈而兵丁知有所恃亦思用命出
力如此提綱挈領安設布置庶壁壘一新可以相
機進勦

公偕和珅又奏言查賊匪恃險跳梁雖不過苟延
殘喘但自知罪大惡極併命相持是以現調之兵
不爲不多而綠營兵丁節次打仗間遇折傷殊形
氣餒尙未能速行勦滅臣等揣度情形勢不能不
添調勁兵以冀尅期集事今悉心籌酌竊以川省

雜谷腦五寨屯練兵丁及安插降番由松潘一帶前赴甘省實爲近便現已飛咨四川督臣文綬令其速飭維州協副將李天佑於五寨內揀選曾經出師金川之屯練兵丁并金川安插土守備降番等共一千名帶同都司守備等員兼程遄進星夜赴蘭協同剿捕又前次派出阿拉善兵雖經暫撤但該游牧毗連甘省邊境道路更近尅期可到是以仍行文阿拉善王羅卜藏多爾濟卽於該游牧內擇其相近蘭州者揀派七百名或五百名速委幹員帶赴甘省羅卜藏多爾濟腿疾復發無庸親

身前來以免遲滯臣等將現在綠營兵丁激勵整頓仍公同籌辦法布置如有可乘之機卽行一鼓殲擒斷不肯坐俟兩處兵齊始行進剿再查川省屯練兵丁暨降番等由松潘一帶赴甘約須二十日內外臣等現在籌剿逆匪務期迅速集事但察看賊人所佔山梁雖不甚高而坡坳陡險路徑一線可通必須魚貫而上兵力不能施展今調取屯練土兵等上山打仗最爲得力惟思賊人於佔據河州及焚燒省城關廂後搶掠馬騾甚多恐將來挺而走險乘機竄逸此處現雖不乏馬匹而兵

丁等馬上技藝能追趕殺賊者竟不能得是以調取阿拉善兵以備追捕且使內地民人知口外蒙古兵丁皆可一呼而至亦足以安衆心而寒賊膽再臣等查成都將軍臣特成額四川提督臣明亮業於本月二十日抵蘭臣等公同商議祇須畱明亮一人在此帶兵協剿至特成額雖據懇求帶兵剿賊情詞真切但川省地處邊陲俱關緊要應令特成額卽回成都辦事庶於調取川省屯練土兵來甘協剿事宜彼此有濟

公偕和珅又奏言前臣等欽奉

諭旨賊匪佔據山梁從何處得有口食其施放鎗礮之火藥又從何得來其馬匹約有若干均著查明具奏臣等查賊匪自戕害副將知府後佔據河州民間糧食牲畜俱爲搶掠一空又蘭州省城凡富商大賈俱在城外關廂開張店鋪最爲繁盛今西南兩關廂被賊人焚燒搶掠計賊人起事以來所擄財物糧食甚多足敷口食其溝坎內俱有山水可供汲取至賊匪施放鎗礮之火藥亦係攻破河州時所得查河州本有總兵鎮守嗣經裁去改設副將是以兵數無幾而營中舊貯火藥原多皆爲賊人所有

再賊人步行者固多而乘馬者亦復不少所有河州及省城關廂益民間馬騾牛驢俱被搶去乘騎馱載總之賊匪負固死守雖不過苟延殘喘然習於戰鬥拚命抗拒兼之綠營官兵當攻城危急時隨到卽隨令打仗節次俱有損折其氣已餒是以未得立就殲除容俟熟籌捕剿機宜整作士氣懋期進兵一鼓勦滅卽行馳奏仰慰

聖懷均奏入

諭曰本日覽阿桂和珅奏到各摺自逆匪起事以來實在情形直至披閱此次奏函方始詳悉端委甚增憤懣亦

因此而畧慰至阿桂等現在籌辦各事宜皆朕早降諭旨逐一查詢者何以從前勒爾謹全未奏及今摺內所稱該處因無總辦之人諸事渙散又各營零星散處聲勢既不聯絡紀律又不嚴整不能使賊人望而生畏等語可見衆人袖手觀望毫無料理光景不出朕之所料勒爾謹身爲總督旣因辦理不善致釀事端及自狄道回至蘭州見賊已擊退上山竟謂半月可以完竣而伊安坐城中衙署一切毫無籌辦且將各路已調之兵全行停止俾賊衆得以遷延時日勒爾謹之罪尙可赦乎又阿桂等奏賊人皆習於戰鬥拚命抗拒賊於何處曾

習戰鬥而竟不奏聞勒爾謹之罪更大甚至未經揣量賊勢之多寡強弱陸續到來不俟力齊卽催令零星打仗以致節次傷亡日多愈多畏怯兼之兵不顧將將不顧兵一遇賊匪惶遽退回太覺不成事體若京兵不令中途停止則此時頭起已到卽所謂四川兵阿拉善兵亦已可抵蘭州乃勒爾謹輒以半月之內定能勦絕奏請撤回是勒爾謹之貽誤軍機尤爲罪所不赦今阿桂復檄調川兵一千及阿拉善兵自不得不如此辦理就現在情形而論阿桂一人儘足料理和珅不必同辦卽遵前旨回京毋稍遲延也看來阿桂於滅賊大段情形

俱有節制想賊人不久即可擒滅且官兵設卡安營賊不能復出肆掠卽從前所擄之口食富足亦豈能支數月且賊人馬匹旣多困守一山草料亦易匱乏卽使宰馬爲食亦必不能支持半載阿桂惟當整作士氣俟兵力齊集尅期進剿一鼓殲滅以副朕懷

恭錄

御製詩

確信

彌月繼蘭州確信披驛至河州雖已復蘭州解嚴未爾撒拉
回肆逆一案自三月三十日奏到以來日夜屢念昨四月
初六日據勒爾謹奏到已克復河州省城圍解并有半月

成功之語意謂事可速蕞乃今已及彌月直待大學士阿

然得信已遲致悞 莊涼兵初集賊暫向山避 勒爾謹奏甘

涼州總兵德寧等帶兵赴蘭州協剿奮勇殺賊圖 時來竄

焚擾城門原尙閉 四月二十九日據阿桂和坤奏伊等未

賊人竟敢任意往來搶掠民間牲畜口食并於燒剩民房

內藏匿乘間放火又於黑夜不過數人潛至城下騷擾而

守城兵丁虛張聲勢施放鎗礮徹夜張皇和坤到彼始嚴

飭禁止并搜捕殺賊數人又各路所調之兵零星散處不

候力齊催令打仗以致間有傷亡士氣不振現在阿桂等

申明軍律激勵戎行并安設卡棚彼此接應又於山間札

一大營照料各卡俾賊知大兵逼近不敢不晝夜防守民

心亦漸安貼等語如此辦理始漸有就緒覽奏畧慰知賊

渠將不日 勒爾謹奏謂半月功遂因命所發兵中途迴

以暨前勒爾謹奏現在所調各路官兵先後到蘭惟有公

同商酌四路擒剿益分派漢土官兵分途前進預備

擒拏半月可以成功等語阿桂於途中聞此信遂令頭起
 領兵之人不必前往候旨而迴奏到因將所發健銳火器
 營京兵撤回其前調川兵及阿拉善兵亦經勒爾謹咨撤
 庸臣輕舉敗事未見面目頓止援兵以致遲誤實為可恨
 設無此奏則京兵及川兵阿拉善兵均早抵蘭州可以一
 鼓擒滅茲阿桂和珅復奏請選調川省會經出師之屯練
 兵一千名阿拉善兵七百名兼程赴蘭協同勦捕此亦無
 聊之計雖現在軍容整頓壁壘一新奏功指日可期而前
 此舉甚屢易貽誤已和珅及阿桂先後到次第乃據實情
 多言之徒增慚恚耳
 奏庸臣敗國事我兵初到蘭衆力未齊備率即驅之戰而
 又乏董帥一二致傷亡遂乃餒士氣綠旗兵本怯聞戰先
 驚悸設京兵弗迴此時將逮至舉碁屢易著兵法之所忌
 二臣謂阿桂和珅調川兵是亦無聊計申律勵戎行旗鼓重新
 示儆轍雖抵罪貽誤已不啻功雖指日蕝盱食徒增恚庸

可
 戊
 八
 戶
 會
 卷
 二
 一
 三

三

臣誰所用自責誌吾媿

五月初二日

諭曰從前逆匪茲事之初因阿桂在豫省查勘河工卽傳旨令其就近馳往督辦又因阿桂出差已久於此案詳悉情形及朕節次所降諭旨未能深悉復令和珅賈欽差大臣關防馳往令與阿桂相見同行三日告知一切後卽回京面奏後據阿桂奏稱瘡疾發動儘力遄行未能迅速而甘省現無大臣董辦是以令和珅兼程前進同海蘭察額森特等迅往帶兵勦捕令和珅奏四月十七日行抵蘭州而阿桂亦於四月二十一日續到看來

此事阿桂一人自能經理妥協無須復令和珅同辦且恐和珅在彼事不歸一卽海蘭察額森特等向隨阿桂領兵打仗阿桂之派調伊等自然呼應更靈而朕啟鑾臨幸熱河爲期亦近御前大臣領侍衛內大臣軍機大臣等扈蹕者現亦無多是以傳旨令和珅速行馳驛回京而以勦捕賊匪及籌辦善後諸事俱交阿桂專辦以期逆賊迅就殲除彰國憲所有朕派辦此案之先後原委著通行宣諭俾中外共知之

又

諭曰前日據阿桂和珅奏到蘭州現在情形各摺如摺內

所稱河州自裁去總兵改設副將兵數無幾而營中舊貯火藥原多皆爲賊人所有一節河州裁鎮改協一案約已二十餘年該處存營火藥雖多此二十年中該營演放鎗礮自應將舊存火藥逐漸用完豈有另配新藥開銷官項反將舊藥存營之理若果如此是卽勒爾謹辦理不善之故著卽查明具奏又所稱綠營官兵隨到卽催令零星打仗以致傷亡甚多如此不量兵力舉動乖謬勒爾謹固罪無可赦卽伍彌泰仁和馬彪俱係統兵大員而仁和又係本省提督從前設法帶兵渡河時尙覺其有料理及至蘭州與伍彌泰馬彪等俱存觀望

見勒爾謹種種錯謬益無一言阻止任聽其措置乖方均屬不合著阿桂傳旨將伍彌泰仁和馬彪嚴行申飭益詢問伊等因何不勸阻勒爾謹緣由據實覆奏

初五日

公偕和珅奏言臣等於二十六日派海蘭察額森

特伍彌泰明亮泰斐英阿福寧阿爾都馬彪仁和

三德哈當阿等分帶滿漢官兵四千餘名分路進

剿各處堵截臣阿桂臣和珅督催策應益令綠營

兵丁預備鋤鋤一面打仗一面拏卡俱於二十六

日子時計道路遠近不等先後進發卯刻齊抵龍

尾山梁賊匪自十九日殘敗以後畏懼我兵勢大
深藏溝穴不敢迎敵有從華林寺背後遶道前來
迎撲者俱被官兵勦殺敗逃正追至賊營相近因
溝礮陡險深至數丈小路俱先被賊匪挖斷賊人
潛於土窰孔隙處所抵死放鎗抵禦勢亦甚急一
時未能得手明亮等卽督率官兵於龍尾山梁拏
立大卡三座自早至晚賊匪藏匿不出因派舊教
土兵及綠營兵分守各卡其餘各兵俱整隊撤回
臣等逆料賊匪鬼蜮伎倆必乘夤夜上山搶卡預
令各營准備是晚果有賊匪前來撲卡土兵及綠

營兵不能堅守俱爲所動臣等卽連夜派兵三路
海蘭察明亮泰斐英阿福寧馬彪哈當阿由龍尾
山左爲一路額森特仁和三德阿爾都由龍尾山
右爲一路另派老弱兵由中路前進爲誘敵之計
賊人預揣我兵必上山奪卡分路埋伏明亮等兩
路兵早已望見佯爲不知益不令中路兵與聞冀
其前進誘敵可以痛行殲戮賊匪見中路兵已過
突出撲戰我兵果爲衝動賊卽乘勢衝壓惟時海
蘭察額森特等所帶官兵由兩翼夾攻奮勇截殺
賊卽紛紛潰敗拚命逃走海蘭察等用箭射死多

人追至溝底其時舊教士兵在彼埋伏見官兵得勝亦俱從後奮勇砍殺賊卽踉蹌奔竄迨至賊營相近因溝濶礮深不能得利兩日打仗殺賊共一百餘名漢土官兵受傷陣亡者甚少

公偕和珅又奏言臣等節次欽奉

諭旨令查此案起衅緣由臣等現將拏獲賊黨馬復才嚴切究訊據供我係河州東鄉大禮拜寺三十會人從前也是舊教乾隆三十六年纔跟他新教馬明心在撒拉爾地方念經這經來歷都是一樣只是念的不同舊教是小聲默念新教是大聲高念或

搖頭跳舞自三十六年馬明心會各處阿渾傳經
有河州舊教阿渾馬來遲說是邪教不肯遵從故
與他們舊教時相讎殺本年正月內因丁藏莊念
經起衅兩家打仗到三月裏舊教回子殺了新教
些人後來蘇四十三約齊人半夜裏去也殺了舊
教許多人舊教人到循化告狀省城委了官來我
們出來分辯被舊教人阻住三月十七日我們又
出來到白莊子遇見新副將聽說要動兵勦我們
蘇四十三起意纔殺了新副將後來又聽見楊知
府來已經殺官這事大了不如連楊知府也殺了

罷這都是蘇四十三主意二十日去攻河州原想殺馬來遲子孫還要滅舊教的人二十一日早到河州攻了一日至二更時候將城攻破原想同撒拉爾去攻循化又想要兩路攻狄道蘭州因聞總督在狄道看守嚴緊不敢過去在河州住了兩日二十三日聽說馬明心已被省城拏去收監蘇四十三等都趕到蘭州要救馬明心二十四日到洮河西邊渡船已被官役打壞不能過河有洪濟橋唐家川六處回子紮棧渡他們過河這六處回子原都是馬明心新教徒內有許多人跟隨蘇四

十三同來蘭州連他撒拉爾族共有一千數百人
在蘭州打死受傷的有幾百人如今還有千餘人
在河州帶來火藥鉛子約有七八十馱如今還存
二十馱藏在營內地壕等語又訊據逆犯馬丁加
及蘇四十三之姪蘇二個所供亦約畧相同臣等
復查閱原案本年三月據舊教回民韓哈拉旬韓
五個以蘇四十三請來安定縣教師馬明心韓二
個等另立新教因伊叔韓哈戶長不隨新教被其
殺死彼此互相讎殺共殺老教四十餘人受傷一
百多名一切家財牲畜糧食搶掠無存等情在總

督衙門控告經勒爾謹飭蘭州府知府楊士璣前往查辦並劄飭河州協副將新柱親往彈壓會同楊士璣督率兵役按名嚴拏嗣據新柱稟稱轉據循化廳洪彬札知新教回番韓一的巴拉等有畏罪投案之意而蘇四十三不自省悟煽惑衆心恐到案自投法網執意負隅抗拒不法已極現與楊士璣一同前往帶領弁目相機辦理等因蘇四十三聞官兵往拏卽約會各莊新教之人約有一千餘名帶鳥鎗器械先後將新柱楊士璣殺害其時勒爾謹審出馬明心傳教滋事卽札飭安定縣黃

道巽孛獲解省監禁此逆回蘇四十三起衅滋事
實在情形也至

諭旨內詢其爭立新教係由何處流傳向來有無此等名
目臣等查檢舊案緣撒拉爾回民約有六千多戶分爲
十二工俱有掌教韓哈濟係世傳總掌教該處回
民每遇婚喪必延請本工掌教同總掌教在章哈
禮拜寺念經乾隆二十六年韓哈濟與賀麻六乎
等同在一處念經賀麻六乎念經搖頭韓哈濟說
他不是祖傳老教規矩賀麻六乎又說韓哈濟要
的布施多因此兩家不和二十七年賀麻六乎就

另起禮拜寺三座至三十四年韓哈濟稟知循化廳斷令仍歸一處將新起禮拜寺封閉賀麻六平等懷恨轉以韓哈濟串通馬國寶斂錢惑眾捏稱大聖人到天入地成仙誘人入教等情赴按察使衙門控告而韓哈濟韓武等又訴稱二十七年馬明心駁同楊回子等潛入撒拉爾與賀麻六乎馬索南韓哈勻等妄言禍福煽惑愚人前經地方官飭明將馬明心等逐出撒拉爾出示嚴禁追具賀麻六乎永不招留外來游匪甘結詎賀麻六乎等又在章哈寺牆壁畫門爲圈妖言門內顯示聖人

天仙搖頭念經跳舞等因在臬司衙門具呈其控
賀麻六乎一黨卽有蘇四十三在內經地方官會
同審明兩造所稱成仙得利大聖人到天入地及
妖言門內顯示聖人天仙惑衆跳舞等情俱係捏
詞誣告將賀麻六乎韓武均照誣告人死罪未決
律擬以杖流賀麻六乎首先生事從重發烏魯木
齊爲奴韓哈濟等擬以枷杖馬六個韓哈勻蘇四
十三訊不知情均予免議并議稱該犯等教雖稍
有異同實非兩教旣不願合爲一處亦不必強之
使合轉啟衅端應飭令撒拉爾十二工各舉身家

殷實品行端方一人充當掌教令其約束稽查其
新寺三座係回民禮拜之所應仍聽分開禮拜以
杜爭端各工回民遇有婚喪所延掌教聽從本家
之便不得勒令延請等因議擬咨部完結在案此
新教流傳兩教互相讎殺緣由也臣等查馬復才
供內稱三十六年馬明心令各處阿渾在撒拉爾
地方傳經之語是馬明心於二十七年逐回原籍
後潛來撒拉爾傳經惑眾地方官並不稽查拏究
以致釀成事端至兩教互相讎殺之後舊教至省
控告時勒爾謹並不查明兩教強弱眾寡實在情

形卽派副將帶兵輕率前往逆匪遂激而生變實
勒爾謹辦理不善所致統俟剿賊完竣後再行據
實查明叅奏但新教流傳二十餘年甘省各屬回
民新教甚多且有父子兄弟而各爲一教者臣等
恐各處新教回民心懷疑惑或爲逆匪煽誘現已
出示曉諭令其各守本分其未經從逆者決不波
累以安衆心至唐家川六處回民素與馬明心蘇
四十三潛通自應一律嚴懲亦已派兵彈壓俟拏
獲首犯後再行嚴切查辦至新教是否馬明心
倡立抑另有傳教之人馬明心業經正法無從查

訊亦俟事定後嚴究辦理總之甘省各屬回民雜處據馬復才供稱蘇四十三分遣賊匪在安定會寧一帶求救並現據安定縣盤獲奸細馬應高供亦相符現已分兵往各處防範但究係新教少而舊教多兩教互相讎怨且舊教土兵現在隨同打仗奮勇出力不能合而爲一尙可不致蔓延均奏

入

諭曰本日覽阿桂等奏四月二十六七兩日派兵分路進剿一摺所稱因溝濶礮深且有至丈餘不能過去者各處小路又被賊處處挖斷是以暫將官兵退回該處既

云溝濶礮深則賊人何從前出撲卡又能竄回死守豈賊人能過而我兵轉不能過乎殊不可解看此情形恐竟須俟川兵及阿拉善兵到後方能剿捕淨盡此時未能尅期了事至詳閱覆奏新舊教構衅緣由一摺是此案起衅釀毒已久若勒爾謹早爲嚴切辦理何致構成事端乃伊竟毫無措置以致誤事不小實斷不可復畱至新教逆回如此肆擾實爲罪大惡極不可不嚴斷根株如所稱洪濟橋唐家川六處回子素與馬明心蘇四十三潛通且紮棧渡賊匪過河尤爲罪不容誅此事應於剿賊事平後趁兵威嚴整之時痛加懲治以儆兇頑

不可姑息了事此皆阿桂在彼應督辦之事其餘地方善後各事宜不妨交李侍堯辦理其拏獲之馬復才等及從前已獲各犯卽派員先行解京至朕爲此次逆匪之案日夜焦勞籌計於數千里外阿桂須仰體朕懷悉心督辦隨時奏聞以慰塵念

初十日

公偕和珅奏言臣等在滿漢官兵內揀選一千五百名作爲三隊派海蘭察額森特明亮福寧泰斐英阿哈當阿侍衛阿爾都統領由龍尾山過溝至華林山直撲賊營派伍彌泰薩炳阿馬彪仁和三

德分帶各隊滿漢官兵佔居龍尾山梁接應堵截
臣阿桂臣和珅督催策應俱於初二日丑刻先後
進發寅刻齊集山梁查龍尾山至華林山中隔大
溝一道崖礮甚陡其華林山左臨溝一帶壁立數
丈雖有小路俱爲賊人挖斷不能由此前進山右
現爲所踞無由繞進惟山前一路可通須下龍尾
山過水磨溝而上路亦甚險賊匪預料我兵必由
此路進攻於漫坡接連兩旁溝礮處所刨挖溝壕
以爲抵禦之計維時海蘭察等帶領奮勇官兵搶
上華林山直撲賊營賊匪自盤踞以來從未見我

兵得上華林山者遂傾穴出迎拚死抗拒我兵撲至壕邊賊匪在溝內放鎗抵禦勢難踰越因令舊教土兵佯作敗退之狀我兵亦往後稍退誘賊出壕方可大加殲戮相機撲進其時賊匪果有六七百人全行衝出希圖追壓我兵退至稍平處所海蘭察額森特明亮等帶領官兵奮勇截殺勦戮多人賊卽紛紛敗逃我兵追至溝邊賊匪拚命跳入而溝內亦尙有賊匪數百潛藏放鎗我兵不能得利因復暫退誘其出壕勦殺如此三次賊性狡滑其第二次出迎已較前漸少至第三次則竟藏匿

不出自寅時打仗起直至申末因山上並無水泉
我兵難以久駐其時海蘭察額森特明亮先令各
兵徐徐撤回伊等在後防護賊匪不敢再行近前
此次打仗計殺賊二百餘名殺死賊人頭目二名
割得賊人首級及搶獲賊人馬匹器械甚多此次
滿漢官兵及舊教土兵實屬奮勇出力雖未能一
鼓勦滅而賊匪經此一番創敗亦已魂膽俱破但
賊人負固死守上山下溝中間多係一線魚貫而
行之路不能一擁而進是以臣等現在另行籌畫
布置相機進剿

公偕和珅又奏言臣等察看華林山一帶形勢較之兩金川險峻誠屬兩相懸絕但賊人佔據山梁負固死守我兵必由龍尾山過溝再上華林山梁下壓賊營而山腿經山水衝刷俱成橫截立礮自數十丈至十餘丈不等止容一人一騎上下兵力不能施展且賊人潛於礮後放鎗勢難下壓是以初二日打仗臣等止揀選奮勇滿漢兵一千五百名直撲賊營誘合向前方能大加殲戮若使大兵可以長驅直進卽各路所調兵力現有萬餘誠如聖諭以十人而擒一人自無難一鼓勦滅現在惟有督同

海蘭察額森特明亮等設法進剿迅速集事以期
仰慰

聖懷再土司韓煜現已遵

旨賞給三品頂戴并賞戴花翎加賞大緞二疋該土司感
激

天恩自必愈加奮勉至該土司管理撒拉爾一族回民由
元明以來世襲土千戶之職韓煜於乾隆二十九
年承襲兵部給與號紙隸循化廳同知管轄均奏
入

諭曰據阿桂等奏本月初二日剿賊情形一摺此次所辦

尚好但勦殺賊匪不爲快意至所稱崖礮止容一人一騎魚貫上下之語山徑路窄雖不能一擁前進但賊人可以魚貫而行我兵轉不能魚貫而行乎况金川賊番亦何常不死守今地勢較金川旣大相懸絕豈有金川能進兵而此處賊匪反不能勦捕之理阿桂等務卽上緊妥速爲之

十一日

諭曰現在賊勢日益窮蹙又屢經官兵四面圍勦自斷不能復出搶掠卽從前所掠糧食較多而困守山梁日久人畜必漸皆乏食所謂釜底游魂計日待斃此時轉須

計出萬全不宜輕率舉動稍傷兵力惟賊人自知窮迫
難支不甘就死或黑夜中乘間分竄此則不可不實力
嚴防著傳諭阿桂於派兵各隘口務須晝夜嚴密巡查
毋使一賊得以逃竄至昨日奏到摺內稱山上並無水
泉我兵難以久駐等語賊人所據之山無水可汲官兵
防守又嚴賊更何從得飲果如所言則山下之水溝我
兵卽應佔守旣杜其飲汲之源兼截其逸出之路阿桂
久歷行間於此等事最爲嫻習自應一一籌計及之也
至此案起衅滋事緣由係安定縣回民馬明心潛行往
來撒拉爾地方傳經惑衆該犯以內地回民敢於如此

肆逆則該處必尙多匪回聚集隨同入教者必須查拏嚴辦以淨根株又前此奏蘇四十三分遣賊匪往安定會寧一帶求救現在盤獲奸細馬應高供亦相符等語是此兩處匪回亦不可不實力查辦又所奏唐家川等六處回人均係馬明心新教徒弟賊匪到洮河時該犯等爲紮棧過渡情罪甚爲重大業經傳諭趁兵威嚴整之時卽行查辦至撒拉爾地方番回錯處是否循化廳同知得有幹練之員卽足以資料理抑另須大員彈壓再此次起事之始因省城駐兵較少以致不能卽時撲滅將來事畢後甘省地方竟宜多添官兵數千時常操

色妥協經理著傳諭阿桂卽將實在情形迅速覆奏至和珅未起程之先此等事是否會同阿桂商辦並著諭令於途次接奉此旨卽先行覆奏

十四日

諭曰就現在勦賊而論阿桂之意欲俟川兵及阿拉善兵到齊以川兵攀踰險阻直搗賊窠以阿拉善兵防其竄逸乘騎追捕一鼓而前可以勦洗淨盡惟是逆賊罪大惡極必須將首犯蘇四十三及幫同主謀之犯生擒解京盡法處治方足以示刑章而申國憲阿桂等務須設法生擒解京治罪至馬明心係內地回民非如韓煜之

世襲土司者可比乃竟敢倡教惑衆實與賀麻六乎同爲此案罪魁是否係安定縣知縣自行拏獲抑係勒爾謹差往擒捕著阿桂詳悉查明覆奏

又

諭曰前據勒爾謹奏報收復河州時除將賊黨殲斃外擒獲蘇四十三之姪蘇二個胞姪蘇五個并要犯馬八十三等十七名又搜獲子女回婦二十三口并節次生擒逆賊一百零九名婦女幼孩一百數十口現在嚴行監禁等語此等黨惡要犯其應行解京訊問者不過數人多亦不過十人著卽行派委妥幹員弁押解送京此外

隨同抗拒打仗之犯均係罪無可追卽應於該處按律正法卽將來擒獲蘇四十三僉爲逆匪出力主謀之大頭目等自應解京訊問其餘無關緊要之犯亦卽於該處正法至其餘緣坐各犯非如尋常邪教逆詞等案尙可邀減監候者可比自應按律卽予駢誅以昭國憲其婦女小口亦卽就近發往伊犁之索倫察哈爾厄魯特等兵丁爲奴不必拘泥成例給付功臣家爲奴俾轉得衣食豐足且省長途解送之煩著傳諭阿桂李侍堯卽行分別嚴辦嗣後若續獲之犯亦俱遵照辦理

十六日

公奏言官兵自初二日進剿賊匪痛加殲戮以後賊匪甚露惶懼情狀臣恐其乘間竄逸當卽飛飭防守後路各將備晝夜嚴密防範毋稍疎虞數日來臣等察看賊匪於華林山前拏立石卡折卸民居土坯砌築礮房欲於孔穴暗放鳥鎗以爲抵禦之計我兵若照舊進兵仍須過溝上礮賊必藏匿溝壕併力支持不肯出壕受剿臣與海蘭察額森特明亮相度地勢惟從華林山之西添派一路健兵從後路夾攻方能集事現在揀選之奮勇滿漢兵仍須令其從初二日進攻之路過溝上山衝壓

賊營乘賊人盡力防禦之時派兵從西路突入賊人四顧不暇方能得手但就現在滿漢兵丁內再行揀選派進轉易爲賊人知覺須先備禦恐進剿未能得利是以再四籌酌不得不稍俟兵力齊全以期一舉殲滅查護軍統領舒亮等帶同侍衛章京三十人日內陸續可到臣又聞本省附近之保安四屯土兵及鐵部番兵勇悍可用業經飛飭檄調若此二處土兵調到實在可用又不必專候屯練卽乘機進剿臣揆度賊勢自節次打仗剿殺後賊人望見海蘭察額森特明亮等騎馬數人卽望

風敗北其毫無伎倆可見况賊匪撒拉爾巢穴業經被搗無路可歸而又與舊教及番人等素相讎怨自揣一經逃散必被擒拏是以誓死守此一隅臣與海蘭察額森特明亮日夜籌畫必思計出萬全一舉殲盡不肯以打仗爲虛應故事奏入

諭曰阿桂奏現俟兵力齊全一鼓勦洗賊匪以現在情形而論逆匪旣逃竄無路其所捨糧食亦斷不能支兩月卽餓斃亦可完事但以么膺小醜如此肆逆不法非痛加殲戮生擒首犯盡法處治不足以洩忿恨而彰國憲今川兵及阿拉善兵於二十日以前可抵蘭州爲期已

近此時自不宜更冒險以損威第目下既不即進剿何不先行曉諭賊黨并脅從之人以罪魁逆首止蘇四十三若能將伊擒獻則汝等脅從尚可奏請邀恩寬減倘執迷不悟將來大兵剿捕無分首從一同受戮雖悔無及如此明切開導衆心自可解散或作檄文曉示或令舊教土司等設法遣人傳諭使賊衆猜防彼此疑慮擒捕賊首未始非解散黨羽之計至所稱檄調附近之保安四屯土兵及鐵部番兵勇悍可用但此等番土兵是否與逆賊差往求援之安定會寧回人及爲賊紮棧過渡之唐家川六處逆回同屬一教著阿桂查明覆奏

公又奏言逆回滋擾不法由勒爾謹辦理不善自
狄道回至蘭州見賊已上山遂謂易於剿捕並無
調度督率輒奏稱半月內可以成功致各路已調
之兵全行停撤今賊人退守山梁口食不能寬裕
草料亦易匱乏原不能久爲支持臣與海蘭察額
森特明亮亦不肯曠日持久待其糧盡自斃現在
士氣較前振作而簡選之奮勇滿漢兵丁已能直
前對敵不肯退縮前所調之川省屯練兵丁約計
二十以前可抵蘭州此項兵丁到日阿拉善兵亦
已先來兵力齊全即可分路進攻至總兵圖欽保

於四月十九日打仗陣亡臣等到蘭州後詢問海
蘭察知是日官兵由龍尾越溝繞上華林山梁有
賊匪數百直前來撲維時圖欽保先已下溝被賊
截住卽海蘭察亦在被圍之內射死數賊始得衝
出其時和珅卽嚴飭各兵令其堅立而海蘭察又
馳馬由龍尾山斜坡直前與賊接仗親身射死二
賊官兵合力復將賊匪壓下山溝卽帶土兵下溝
剿殺次日和珅查出圖欽保之親隨兵丁五人詢
知該鎮因馬倒被賊戕害再王廷瓚於賊匪起事
後恐其直犯蘭州飛調莊浪滿兵三百名兵到之

後賊匪隨卽圍城此項滿兵卽在賊人攻打緊急之時在西門竭力抵禦自三月二十五日起至二十九日止各鎮協綠營兵陸續到蘭節次打仗多有折損該司又率同在城大小文武官員督率民夫晝夜守禦查出奸細卽行正法賊匪於攻圍至急時王廷瓚因賊人有懇放馬明心卽行退散之語遂將馬明心提出在城上令賊人一見卽將該犯正法又將馬明心之子及婿放令出城予賊雖屬一時緩賊之計實失國體奏入

諭曰阿桂奏王廷瓚於三月二十五日至二十九日令調

到綠營兵節次打仗損折甚多亦係出無奈尙屬過之
小者至其將馬明心之子及婿放令出城予賊此則不
是甚大其罪實在於此伊於逆賊逼犯省城時旣將馬
明心提出示賊卽行正法何以又將其子婿放給藩司
大員豈可損威失體若是阿桂和珅於此等辦理錯謬
之事何不早行奏及王廷瓚現有交代之事尙未能卽
行起程兪著阿桂先行面詢據實覆奏

二十一日

公奏言數日以來有自賊營滾溝脫回老教土兵
一名漢回四名詳加訊問俱稱賊匪於初二日打

仗被戮甚多神情惶懼終日創挖溝壕安立柵卡
防守甚密臣與海蘭察額森特明亮公同商酌若
俟兵力齊全再圖攻剿爲日尙遠不如派兵仍由
舊路攻進若有可乘之計卽直壓賊營設或賊匪
仍爲我兵所誘出壕抗拒亦可痛加殲戮益可觀
賊人出入抵禦路徑爲他日一舉擒滅之計因於
十三日派海蘭察額森特明亮帶領奮勇滿漢官
兵及老教士兵由龍尾山過溝上華林山派伍彌
泰莽古賚等率領滿漢官兵佔住龍尾山梁接應
堵截海蘭察等過溝先令老教士兵上前誘賊伊

等暫駐礮邊待其出壕卽行截剿賊匪狡猾異常
惟藏匿溝壕放鎗抵禦終不敢出壕迎敵自寅至
未併力支持我兵若令深入於制勝機宜尙無把
握因將官兵徐徐撤回佯示賊人以我兵形勢不
過如此既可堅其死守之心而於他路防備必懈
一俟屯練兵到卽可添派兩路健兵從華林山之
西面後面突前攻進賊人四顧不暇方能一舉殲
滅查此次打仗賊匪爲鎗礮擊斃者二三十名土
兵受傷陣亡者共有數名又華林山之北有高樓
一座向爲賊人窟穴於進攻之路有碍且下臨直

礪深至數丈官兵不能越過臣預派土司楊宗業
番兵數名藏伏溝內乘賊匪在前抵禦時奮力爬
上放火燒燬賊人愈加惶懼而於他日進兵甚有
裨益業將該土目酌量獎賞

公又奏言賊匪自初二日創敗以後愈形惶懼將
所踞華林山四面溝壕更加刨挖寬深止畱向南
小路一條盡力抵禦爲死守之計我兵非不能過
去但現在簡選奮勇滿漢兵僅能直前對敵若令
深入賊營恐難得利不得不稍俟兵力齊全一舉
殲滅現在阿拉善王羅卜藏多爾濟及伊子旺親

班巴爾等帶領該處兵於十三日到蘭川省屯練亦據文綬咨稱於五月初六日起程飭令沿途迅速行走臣又節次迎催約計二十內外可抵蘭州此項兵齊即可尅期了事惟是賊匪不過千餘而辦理如此費手實非臣意料所及至蘭州城外四面皆山西關外緊接賊營全無隙地惟東關外稍覺平坦可以劄營又距賊營較遠聲勢不能呼應民心更覺驚惶是以臣等入城居住臣等目擊情形不得不通融辦理斷不敢當此勦賊緊急之時尙欲辭勞就逸也至洪濟橋唐家川等處回民素

與馬明心蘇四十三潛通膽敢紮棧偷度賊匪實
爲罪大惡極現經該處民人首告指拏及兵役陸
續拏獲賊黨七十餘名婦女幼孩數十口臣已飛
飭分起提解到省嚴審通同謀逆各確情將要犯
派員解京其附從各犯俱卽行正法以彰國憲如
通同附逆未經就獲者尙多仍於勦賊事平後派
兵前往痛加懲治以儆兇頑所有拏獲之馬復才
馬丁加蘇二個馬應高四犯除馬應高患病甚重
恐逃顯戮業經正法梟示外其馬復才等三犯卽
遵

旨派員先行解京至循化廳等處從前拏獲各犯內蘇五
個馬八十三二名據該廳稟報因傷監斃戮屍其
餘各犯前因賊匪逼近蘭城未便提解臣阿桂等
抵蘭後已飛飭各該屬妥速解省俟解到後卽行
詳細審明分別解京正法此外現在拏獲監禁人
犯甚多亟經行知各該地方官訊供明確亦卽照
此辦理均奏入

諭曰阿桂奏十三日派兵誘賊出拒賊仍藏匿不出擬俟
屯練兵到添派兩路健兵一舉殲滅等因用兵機宜設
卡安營自應與賊逼近聲勢方能聯絡今賊在城西而

大營轉遠在城東中隔一城安能遙爲照應今詳閱奏
進圖說方得洞悉形勢從前城東安營之處究屬錯悞
阿桂等到後住居城內轉覺與營相近且可安城中百
姓之心而前次伍彌泰仁和馬彪等之安營錯悞阿桂
自必見及亦因成事不說耳至爲賊紮楸過渡之賊犯
及蘭州西南兩關廂壺河州回民從逆者均屬亂民當
概行勦洗馬明心家屬例應緣坐者亦當卽行查辦毋
使免脫至解京賊匪除現行起解外止須將蘇四十三
及黨惡要犯數人解送其餘卽於該處正法以免疎虞
至此案辦理關鍵現在總以幫扶舊教滅除新教爲詞

附
明
白
曉
諭
以
安
舊
教
回
衆
之
心
著
阿
桂
李
侍
堯
妥
協
經
理

又

諭曰本年二月間據阿桂奏勘辦石塘工程二千二百餘丈督率工員上緊趕辦務於四十七年冬初完工至老鹽倉立字號至積字號二百餘丈不能釘樁處所應仍畱柴塘外其餘一千五百丈安樁一丈八尺用礮夯打至四個半時辰打下一丈四五尺周圍沙土卽合籠平樁不能再打查樁木不能深入其底沙堅硬可知沙齧樁牢力能擊石或可一律築砌或應仍存其舊恭候臨

幸指示機宜再行多分年限接續辦理等語已批令俟到京時面奏彼時原以老鹽倉一帶沙性澁汕難以下樁且改建要工尙多是以可緩昨詢據富勒渾面奏老鹽倉一帶仍有可以施工之說卽阿桂所奏沙齧樁牢力能擊石或可一律築砌等語是亦似謂此段工程可以辦理朕思現辦二千餘丈之石塘旣於明歲可以完工且屆四十九年南巡之期尙遠此段要工旣有益於民生卽可及時接辦何必復待南巡親爲相度前次令阿桂到京面奏原因此段工程應否辦理未能明晰是以欲面訊明確再降諭旨現在阿桂督辦逆回到京尙

須時日著傳諭阿桂卽將老鹽倉一帶實在情形詳悉具奏如果有工費浩繁不能拘定開銷成例之處亦不妨據實奏明交陳輝祖接辦朕不惜多費帑金爲一勞永逸之計也

二十四日

諭曰前王廷瓚有奏繳積存養廉銀四萬兩以資兵餉一摺因思王廷瓚僅任甘肅藩司何以家計充裕甘省地方本爲瘠薄而藩司何以僉稱美缺若云有營私貪黷之事何以王廷瓚在任多年僉無聲名不好之處卽從前王亶望在甘省藩司任內亦未必竟敢勒索屬員以

肥已橐但王賈望於浙省捐辦海塘案內竟捐銀至五十萬兩之多伊在浙未久其坐擁厚貲當卽在甘省任內所得因思甘肅收捐監糧其中必有私收折色多得平餘情弊且聞向來監糧係各州縣分收而近來則全歸省城卽使多收折色平餘而在部報捐者亦未嘗不收盈餘若甘省所收平餘較多則捐監者自不樂從何又紛紛向甘肅遠省捐監并稱較部捐便宜其故實不可解若云該省監糧實係收納本色而本色又如何多得盈餘其中情節總未能深悉著傳諭阿桂李侍堯卽將王廷瓚因何家道充裕是否卽係捐監一事有染指

情弊或另有巧取之處嚴密訪查據實覆奏不可稍涉
瞻徇

二十六日

公奏言官兵自十三日與賊接仗後本欲屯練兵
到四路進攻以期一舉殲滅惟是賊匪勢雖窮蹙
佯作鴟張竟敢於十四日下華林山至舊教土兵
安卡處滋擾及海蘭察額森特明亮等帶馬兵數
十名馳至山坳土兵知有倚恃翻身趕殺數人賊
始竄歸窟穴其狡譎實屬可惡且接文綬來咨頭
二起屯練於五月初六初八等日自維州起程二

十五六方抵蘭州等語臣等再四籌酌於十八日
派海蘭察同那木扎彰霽明山阿蘭保及阿拉善
公多爾濟色布坦帶領侍衛章京阿拉善馬兵由
龍尾山過溝繞至華林山西南潛行埋伏額森特
明亮同泰斐英阿福寧阿爾都哈當阿等步行帶
領滿漢奮勇兵分爲三路在水磨溝內埋伏派舒
亮帶領土司楊宗業番兵在華林山後埋伏伍彌
泰莽古賚旺親班巴爾烏爾圖納遜仁和馬彪三
德等仍率領滿漢官兵佔龍尾山梁接應堵截臣
阿桂臣李侍堯在後督率策應於是日寅刻先令

老教士兵由華林山前撲壓賊營賊於溝壕之外
安設卡柵數重放鎗抵禦士兵時前時却至巳刻
佯作敗退之狀果有賊數百人出壕追壓海蘭察
帶領侍衛章京由溝中奮勇衝出截爲兩段馬上
鎗箭齊發阿拉善兵用長矛隨後刺殺其被截之
賊殲戮殆盡而未截住之賊稍退復回與我兵
一處擾殺及被殲甚多始竄歸卡柵在溝壕內潛
藏放鎗抵禦維時明亮等亦從溝內覓路上撲無
如崖礮陡峻賊人先已豫防鎗勢甚急不能立即
砍營而入直至未時我兵雖屢次前撲賊終藏匿

不出因將官兵徐徐撤回查此次除鎗礮擊斃賊人不計外約殺賊六七十名侍衛哲森保放鎗打死騎馬賊目臣等恐賊匪計圖竄逸連夜派精細之人於賊營左近偵察僉預行派定官兵一有信息海蘭察等立即帶兵馳追本日早據報賊營尚無動作此次侍衛內哲森保珠爾杭阿阿禪保克臣保及守備馬得俱帶有鎗箭等傷尚無妨礙奏入

諭曰本日阿桂奏剿賊情形一摺賊匪勢已窮蹙尚敢潛出滋擾實爲可恨看此光景賊人自知指日就擒衆心

渙散意圖分路竄逸恐官兵防守嚴密是以先行下山滋擾故爲鴟張行徑以便事勢窮蹙之際從後路竄出卽從前有事急欲投黃河自盡及設誓死守之供恐亦係虛言散布使我兵不行准備便可乘間脫逃此則阿桂等最宜畱心稽查者前閱進到圖內賊營迤西一帶山勢重疊恐其中小路甚多而所安設官兵尙未能十分嚴密使賊匪卽從該處乘馬衝逸綠營官兵未必能悉力堵禦若改換衣帽分散潛逃又恐搜捕不能淨盡惟在先事預防使一名不致漏網爲要至賊人雖已露待斃情形但亦不可輕視卽川省屯練兵二十五六等

日到蘭爲期已近然尤宜持重整頓兵力使一鼓盡殲
方爲妥善再此次侍衛哲森保趕殺賊匪頭目勇往可
嘉且又受有鎗傷著阿桂查明該侍衛現係何等職銜
卽奏明加一等升用以示獎勵其餘受傷各員益著逐
一照例獎賞至添設官兵一事亦據和珅面奏數千尙
屬不敷卽添至一二萬亦無不可現已交部查辦矣

公又奏言賊匪佔匿山梁雖屬崖礮陡峻其地勢
較兩金川實大相懸絕誠如

聖諭豈有兩金川能進兵而此處賊匪反不能剿捕之理
惟是現在簡選之滿漢官兵尙非殺賊好手不得

不稍俟屯練兵到四路齊進以期一舉殲滅至我
兵數次攻勦俱下龍尾山過水磨溝上華林山方
能直壓賊營山徑路窄止容一人一騎魚貫上下
賊於溝礮兩旁及壕內施放鳥鎗皆可暗傷官兵
是以未能即時勦滅又華林山前我兵打仗處所
盆無水泉其華林山後賊人佔匿之處下臨黃河
汲取甚便臣初到蘭州時卽與海蘭察等籌計欲
分兵佔守杜其飲汲之源則不數日間賊卽不戰
自亂但華林山後河岸甚窄旣不能駐劄多兵且
賊人居高臨下鎗石兼施我兵難以存住若在對

河放鎗勢不能及是以止可多派兵丁在隔岸嚴密堵截而不能斷其水道坐令困斃奏入報

聞

閏五月初一日

公偕李侍堯奏言查蘇四十三等肆逆其撒拉爾各莊新教逆回起事者皆其死黨且搶佔河州圍逼省城自知罪大惡極無可解免卽洪濟橋唐家川等六處黨惡從逆隨至蘭州者亦自知罪大不赦是以立誓死守難於解散臣阿桂與和珅於五月初間亦會令撒拉爾舊教回人繙寫回字曉諭

脅從賊黨令其擒獻賊首尙可免死於賊營附近
一帶插立布旗分散曉示亦如治病偏方姑爲嘗
試今奉

諭旨 臣等復派令舊教撒拉爾回人前往賊卡相近處大
聲曉諭以現在天兵齊集帶兵將軍等從前曾經
掃蕩西路回城數十處爾等不過數百人據彈丸
之地何難立時剷除所以數日內不卽進攻者因
仰體

大皇帝好生之心不忍爾等脅從諸人同受剷戮若能將
賊首及大頭目擒獻尙可不至於死如再執迷大

兵一進不分首從俱行勦洗諭畢賊匪頭目拍掌
聲喊似不欲其羽黨聽聞老教同人復行宣諭一
次賊黨有懇求寫字散給者此雖欲生致首逆之
一法總不若俟屯練兵到四路進攻一舉勦滅無
餘方足以奮兵威而揚士氣至保安四屯土兵及
鐵部番兵已陸續調到數百名看來亦不及屯練
降番甚遠此等土兵卽係番人向屬土司與撒拉
爾逆回種類各別保安四屯在循化附近其鐵部
番兵屬洮州土司楊宗業該土司現派頭人帶兵
打仗最爲恭順惟鐵部與松潘接壤程站亦遙一

時不能到齊其未起身者業已停止調撥所有該
二處土兵與逆賊差往求援之安定會寧及爲賊
紮棧過渡之唐家川六處回民相去遙遠並非同
教

公偕李侍堯又奏言查賊匪肆逆以來循化河州
等處及各州縣陸續擒獲黨惡要犯並附從賊犯
又搜拏逆賊家屬共七百餘名口除身傷病故及
在監病斃外尙有六百餘名臣阿桂到蘭州後卽
飛飭各州縣將已經起解各犯分起管解到省派
員會同按察使福寧嚴審通同謀逆各確情將要

犯派員解京其無關緊要各犯審明後卽行正法
至循化河州西寧各處監禁逆犯尙多臣等核其
供詞內情節緊要者提省審辦其餘從賊各犯卽
檄飭各州縣會同營員監視正法將來擒獲首逆
蘇四十三盆爲逆匪出力主謀之大頭目等卽派
員解京訊問其隨同抗拒及爲賊脅逼甘心從逆
者拏獲審明後亦卽予駢誅以昭國憲至現在各
處監禁之家屬婦女幼孩數百口統俟剿賊完竣
遵

旨就近發往伊犁賞給厄魯特索倫察哈爾等兵丁爲奴

以省長途解送之煩均奏入

諭曰閱阿桂等奏到供單內據買成伏供有賊人因西寧糧草最多令其前往探聽虛實之語賊匪自知計窮垂斃必思挺而走險乘間竄逸斷不肯束手就縛西寧一帶山多地曠兼糧草富足尤不可不加意防範若賊人乘機結隊奪路衝逸尤屬不成事體著傳諭阿桂等逆匪首犯若能設法生擒固爲盡善倘一時不能擒獲卽被鎗礮殲斃甚或自焚自戕得有確屍亦可完事斷不可令其乘間免脫以致別滋事端又阿桂等前奏賊人所掠糧草僅能支給月餘今又閱數旬自己匱竭賊人

又從何處得濟恐仍有潛出搶掠及附近匪徒暗爲運送之事著阿桂等嚴密防捕毋使暗中接濟得以苟延殘喘至逆犯家屬將來辦理時其婦女幼孩不可合爲一處所有婦女仍發厄魯特等處爲奴其男丁雖幼孩改發雲貴烟瘴地方著阿桂等於勦賊完竣後分別遵照辦理

公偕李侍堯奏言 臣等欽奉

諭旨查甘省收捐監穀有無弊竇及應否停止之處據實奏聞仰見

皇上坐照如神無微不至查甘肅收捐監糧事例於乾隆

三十一年奉

旨以漸收折色者多於積貯實政無裨

特勅停止嗣於三十七年調任總督文綬奏稱新疆烏魯木齊一帶屯政日興年穀順成產糧既多而往彼販運者甚少若非預籌收貯不免有穀賤傷農之慮請照舊例准各省商賈士民報捐監糧以裕積儲經戶部覆准奉

旨允行而三十九年原任總督勒爾謹卽奏請甘省各處仍復捐監舊例以省撥帑之煩亦經部覆准行在案此甘省捐監其停止之故實因杜絕弊源其停

而復開則欲藉捐輸而資裒益也臣等伏思捐監一事如果地方大吏經理妥善原於帑項倉儲均屬有益若辦理不善則收捐既爲利藪稽察亦屬虛文包攬之徒得以因緣爲奸而貪墨之吏益且從而染指非惟有名無實甚至百弊叢生臣阿桂自到蘭州留心體察從前所謂折色包捐諸弊實難保其必無至臣李侍堯蒙

恩授以陝甘總督重任監糧一事通省利弊攸關何敢不實心查辦惟是甘省幅員寥濶各州縣實貯常平倉糧監糧共二百五十餘萬石未必如數無虧非

半年數月盤查難周而事關通省官吏亦不得不
慎重圖維俟臣等悉心體訪有無弊竇虧短於臣
阿桂起身前再行據實具奏奏入報

聞

初六日

公偕李侍堯奏言黃河船橋被賊燒燬後遵奉
諭旨此時且毋庸搭成以防賊人偷過至金城關一帶現
已添派多兵晝夜防範無虞竄逸惟前日有自賊
營脫回之老教士兵三名據稱蘇四十三向伊醜
類揚言到至極時隨伊北走死後即得好處之語

妄言哄誘臣思賊營之北緊臨黃河既有此言將來勢窮計蹙希圖跳入黃河倖逃顯戮亦未可定因令地方官預備船隻搭造浮橋並於河邊安設卡柵派副將一員帶兵二百名駐守又令多備皮渾屯撓鈎安設水網以俟進剿時撈取活賊及屍身以正國法臣因屯練兵丁久無音信本欲於二十八日大舉剿賊嗣聞屯兵於月內可到不如稍俟以圖計出萬全但思該兵丁等跋涉幾三千里必須休息數日方能鼓勇殺賊而自十八日以後未經派兵進剿不能悉其近日情形因於二十六

日派侍衛遜齊鼎等二十餘騎至賊營之西山嶺
上察看情勢佯爲遊兵誘賊賊匪遙遙觀望不敢
出迎又於二十八日派海蘭察額森特明亮伍彌
泰莽古賚馬彪仁和等酌帶滿漢兵在龍尾山梁
向賊營架礮轟打使賊不得休息其挑出奮勇官
兵俱未派在令得蓄養銳氣維時我兵打至數十
礮多有中其帳房人馬者賊匪窘逼又見官兵甚
少卽有賊人數百下華林山過溝於礮邊放鎗希
圖衝突而上皆爲我兵放鎗擊敗其稍近前之賊
又被侍衛章京奮勇殺敗賊卽紛紛竄歸卡柵我

兵本不欲深入故未追趕因於申時撤回賊匪被鎗礮打死者頗多沿溝俱有血跡此次接仗殺傷賊匪約數十名我兵陣亡三名帶傷十餘名本日頭起屯練兵已抵蘭州俟二起到時令其休息數日卽尅期大舉四路進攻

公偕李侍堯又奏言查馬明心正法後至今兩月有餘如果該犯黨羽甚多聞知馬明心被殺不肯甘心則於賊匪攻圍蘭州時安定縣城無兵防守自必乘虛蠢動豈能安堵如常乃自逆回起事以來該處回民甚屬寧靜驛使往來及運送火藥糧

餉經過毫無他故而會寧尤安貼未聞別有浮言是馬復才所供賊匪差人往安定會寧等處求援一語未必非搖惑人心之計至臣等於安定等處早已派兵彈壓並飭該縣時刻稽查防範俟剿賊完竣酌派明幹大員於陝省官兵撤歸大營之便將馬明心家屬黨羽訪查確實照倡立邪教之例按名拏獲嚴行辦理至新教即係邪教但訊據賊黨稱馬明心自二十六年從口外回家即倡立新教令人大聲念經蓋緣新疆各城所居回民其念經即係高聲大念臣阿桂所素知者至內地回民

之小聲默念或於唐朝初入中國時爲人訕笑因故爲默念馬明心自口外回家遂以爲在西域得有真傳轉相傳習其實經本一樣而愚民厭故喜新俱爲煽惑隨教者甚多地方官又因其本屬一教無從辨別異同未經查禁是以甘肅一省臯蘭狄道河州鞏昌安定會寧金縣渭源秦州固原西寧平涼靈州伏羌涼州肅州鹽茶廳等處數十州縣回民甚多新舊雜處臣阿桂與和珅先後到蘭恐各新教回民心懷疑懼或爲逆匪煽惑特出示曉諭令各安本業其未經從逆者決不波累以安

衆心查回民崇奉新教不過以能得好處之言彼此煽誘今見倡立新教之馬明心已身正刑誅家屬緣坐興起新教之蘇四十三等俱遭殲戮而洪濟橋唐家川從逆新教又殺戮無赦其餘各處新教有與馬明心蘇四十三往來勾結者難逃顯戮回民雖愚亦知禍福斷不肯復習新教自投羅網臣等辦理善後事宜案內立法嚴禁飭令各屬將新教所起禮拜寺概行拆燬草去新教阿渾掌教名目如有私行傳習陽奉陰違者一經查出照邪教律從重辦理並曉諭舊教回民隨時覺察一有

萌蘖卽首告指拏如此立法稽查則新教自然淨盡可以杜禍源而靖邊陲至原任甘肅藩司王廷瓚已飭令於閏五月初一日起身赴京其辦理錯誤之處實難辭咎除伊奏請捐銀四萬兩遵

旨作爲軍營兵丁犒賞之項外此後凡軍營一切賞需俱著落該司名下儘數捐出歸款奏入

諭曰據阿桂等奏到各摺賊匪情勢日見窮蹙屯練兵到齊後自可尅期剿滅但兵丁跋涉遠來自應休息數日以期一舉集事至蘇四十三事急北走之語恐係故爲揚言以爲向西奔竄之計蓋回人向以西方爲正面猶

內地之以南爲正前閱和珅所攜之圖賊營向西一帶
亂山叢雜路徑甚多阿桂等務宜加意防守實力堵禦
勿使一人乘間兔脫方爲妥善至所稱馬明心正法後
安定一帶回民安堵如常並無蠢動形跡所奏固是但
馬明心拏獲解送時蘇四十三尙未攻圍蘭州該處回
民自不敢遽行蠢動及馬明心正法後官兵卽陸續雲
集馬明心家屬黨羽卽使得信亦未敢肆行不法然馬
明心究係傳教首犯該處一帶回民平日素與交結者
不可不畱心體察辦理至其家屬應緣坐者尤應嚴行
查辦務使根株悉絕不可存姑息完事之見又據奏甘

肅新舊教回民雜處之各州縣不下數十處統俟事竣後立法查辦革去名目等語祇可如此辦理但如唐家川洪濟橋等處從逆回民則勦洗不可不盡斷勿稍存姑息以致養癰貽患

公又奏言查老鹽倉附近一帶相傳以爲難建石塘者該處沙性澁汕一椿甫下始而扞格繼復動搖不能存立難以下椿砌石臣在工時逐段簽試除相近老鹽倉立字號至積字號二百餘丈釘椿祇入八九尺外其餘一千五百丈安椿一丈八尺用礮夯打至四個半時辰打下一丈四五尺週圍

沙土卽合籠平椿不能再打臣思此段塘工如果浮土浮沙自難下椿砌石今椿木打至一丈四五尺不能深入其底沙堅硬可知沙齧椿牢力能擎石卽可一律築砌况椿深一丈四五尺亦不患高於水面而外有坦水層層擁護更無虞潮溜往來披刷塘根但工費浩繁勢難同時並舉是以奏請恭候

聖駕臨幸指示機宜再行分年接辦茲奉

諭旨垂詢以現辦二千餘丈之石塘旣於明歲可以完工且屆四十九年南巡之期尙遠此段要工旣有益於民

生卽可及時接辦如果有工費浩繁不能拘定開銷成
例亦不妨據實奏明欽此仰見我

皇上廑念民生不惜多費帑金爲濱海閭永籌捍衛久
長之計臣查此一千五百丈一段工程可以辦理
臣在工時陳輝祖所見亦同至添用幫費現辦二
千二百餘丈塘工蒙

恩賞銀二十萬兩外尙有另籌添補若接辦一千五百丈
較前雖少七百餘丈但釘樁較難則所需幫費亦
約畧相等從前興工無期尙未核算查陳輝祖辦
理海塘已屬半年於該處情形較前自更熟悉所

用原算二千二百餘丈之幫費或另有撙節妥辦之法亦未可定楊魁以

欽差大臣駐工督辦尤應諳習一切事宜相應

勅下楊魁會同陳輝祖將此段工程應否接辦共應開銷正項若干幫費若干之處熟商妥酌定議奏

聞恭候

聖明訓示再行遵辦奏入

諭曰前以浙省老鹽倉一帶塘工是否可以及時接辦降旨詢問阿桂茲據覆奏稱此段工程一千五百丈可以接續辦理前在工時陳輝祖所見亦同至添用幫費現

辦二千二百餘丈塘工除恩賞銀外尙有另籌添補之
項若接辦一千五百丈釘樁較難所需幫費亦約畧相
等請勅下楊魁會同陳輝祖將此項工程共應開銷正
項若干幫費若干之外熟商妥酌等語浙省辦理石塘
二千二百餘丈計明歲冬間始可歲工其老鹽倉一帶
塘工若一律築砌自應俟現辦工程完竣後再行次第
籌辦昨經降旨令楊魁赴閩省暫署撫篆換令富綱來
京陛見所有老鹽倉工程如何接辦並應如何開銷正
項及幫費之處俟楊魁回至工所後再與陳輝祖妥議
熟商具奏亦不爲遲

十二日

公偕李侍堯奏言川省頭二起屯練兵於五月二十九及閏五月初一日先後到蘭臣等思該兵丁等跋涉幾三千里必須休息數日方能鼓勇殺賊而賊匪盤踞既久防禦甚周尅期大舉尤須計出萬全以圖一鼓殲滅此數日內本不欲派兵進剿但屯兵初到蘭州於華林山形勢及進兵路徑打仗情形無由知悉必須預令得知而屯練兵丁亦踴躍報効因於閏五月初三日派海蘭察明亮同那木札彰霽明山阿蘭保及阿拉善公多爾濟色

布坦帶領侍衛章京阿拉善馬兵川省屯練兵由
龍尾山過溝繞至華林山西南斜撲賊卡派舒亮
哈當阿三德泰斐英阿福寧帶領滿漢官兵奮勇過溝
由華林山南直壓賊卡額森特帶兵在龍尾山坡
俟有可乘之機卽分路督率繼進伍彌泰莽古賚
旺親班巴爾烏爾圖納遜仁和馬彪羅江鱗等仍
率領滿漢官兵佔龍尾山梁接應堵截並架礮向
賊營轟打是日寅刻齊至華林山賊匪已將前次
進攻之路砍斷並多掘坑塹令我兵馬不能馳騁
海蘭察等帶領屯練兵曲折繞進相近賊卡賊匪

仍於卡內放鎗抵禦不敢出迎惟時屯練兵卽奮
勇撲進直至卡邊賊匪見事勢已急卽有數百賊
出卡拚死抗拒屯練兵棄鎗短接刀砍矛戳戮戮
甚多賊始退回我兵乘勢撲壓賊匪又復出拒如
此三次賊匪被殺更多始竄歸卡柵在溝壕內潛
藏放鎗抵死不出此次本不過令屯練兵畧知路
徑情形尙非大舉至未刻卽將兩路官兵徐徐撤
回查此次除鎗礮殺死賊人不計數外其三次攪
戰約斃賊六七十名官兵屯練陣亡者十二名副
將保興都司阜王保守備關聯陞阿拉善三等台

吉諾依多魯叅領達克巴俱帶有鎗傷尙屬無妨
臣查賊匪能打仗者不過數百人現在滿漢屯土
官兵已有萬餘任其盤踞死守苟延殘喘實非意
計所及現在川省降番已到更無可待臣等公同
籌畫卽於初九初十兩日內尅期大舉四路進攻
務將逆匪剿除淨盡

公偕李侍堯又奏言查賊匪勢已窮蹙臣等時刻
畱心慮其竄逸所有防守後路各將備屢經嚴飭
曉諭令晝夜防範嚴密稽查至賊營之北緊臨黃
河不但對岸金城關駐兵嚴防並於南岸船橋處

所亦新立卡柵派兵二百名駐守其迤西一帶因欲於大舉時派兵從此路進攻故尙未安設多兵該處雖山勢重疊路徑叢雜迤西總有洮河爲限不能越過沿河洪濟橋一帶有兵八百餘名迤南之沙泥站又有兵九百名防守賊匪即使結隊乘馬衝逸一至河邊不能下馬覓渡無難勦擒若改換衣帽分散潛逃則撒拉爾逆回鬚髮截短言語不同易於識認且有舊教指拏不患不搜捕淨盡臣等仍加意稽查先事准備以期殲戮無遺至馬明心爲新教之首其家屬黨羽事竣後自當照

倡立邪教之例按名查拏嚴辦且伏羌縣爲馬明
心斂銀之回民如果屬實亦當一併查辦此外向
從新教者只可於辦理善後事宜案內立法嚴禁
其首逆蘇四十三及助惡頭目韓一的巴拉等所
有家屬當概予駢誅其餘各犯家口卽遵

旨改發雲南會洱廣西百色等處極邊烟瘴之地以淨根
株均奏入

諭曰前已屢次傳諭阿桂以賊營迤西一帶山徑叢雜小
路甚多尤須畱心防範卽或伊勢窮計蹙竟爾自焚自
戕必當檢驗屍身確有憑據方爲完事此尤辦理之最

要者至馬明心之家屬黨羽自當按名查拏嚴行辦理其伏羌縣爲馬明心斂銀之回民如果查明屬實亦必須一併嚴辦不可稍事姑息阿桂李侍堯務須妥協經理以期永靖邊陲

十七日

公偕李侍堯奏言臣等於初九日令海蘭察額森特明亮同那木札明山泰斐英阿福寧哈當阿鄂輝阿拉善公多爾濟色布坦帶領侍衛章京阿拉善川省屯練及延綏固原綠營兵共三千餘名由龍尾山過溝繞至華林山西斜撲賊營派舒亮薩

炳阿彰靄三德帶領滿漢兵一千七百餘名由龍
尾山過溝從華林山南直壓賊卡派馬彪仁和阿
蘭保阿爾都帶領綠營兵二千名及舊教土兵由
華林山東分路上撲賊營派羅江鱗額爾恆額帶
領土司楊宗業所屬番兵由華林山後攻撲賊營
羅卜藏多爾濟伍彌泰莽古賚旺親班巴爾烏爾
圖納遜仍率領滿漢官兵佔龍尾山梁接應堵截
臣阿桂臣李侍堯在後督催策應子刻先後發兵
寅刻齊至華林山梁整飭各隊維時海蘭察額森
特明亮等帶領西南兩路官兵由華林山直撲賊

卡卽將賊匪所立卡子四座盡行捨得直至大卡
邊奮勇攻撲賊匪於卡邊刨挖深溝一道潛藏溝
內放鎗抵禦鎗勢甚急未能撲進而賊匪見我兵
直至大卡惟恐一失卽不能存立遂傾穴出迎拚
死衝壓海蘭察等因壕邊坑坎甚多不能馳騁卽
棄馬同衆步行鎗箭齊發殲戮甚多賊人稍退復
回希圖撲壓如此數次始竄歸卡柵在溝壕內潛
放鳥鎗我兵乘勢上撲不能得手而華林山之西
亦有立礮數道兩旁溝壕甚多無路可上其時馬
彪仁和等帶領綠營及老教土兵從東邊內覓路

奮力上撲無奈崖礪陡峻而賊人向下施打鎗石
我兵多有損傷不能立即砍營而入至華林山之
後賊匪又已預備番兵攀援而上俱爲鎗石所中
滾下山坡自寅至未我兵作氣何啻三鼓若令久
駐反恐無益臣因將各路官兵徐徐撤回此次打
仗殺賊百餘名而官兵直至卡邊撲壓及攀礪仰
攻未免損折稍多陣亡三等侍衛齊勤泰一員把
總三員滿漢屯土番兵共七十六名查此次厚集
兵力四路進攻滿擬一舉殲滅又因賊匪負固死
守未能集事臣等實深愧憤焦急現在悉心籌畫

另圖計取之策仰仗

聖主天威必能一鼓勦除設或仍前阻住現在將屆麥熟
賊匪必思就近割取以充糧食卽於賊營迤西趕
緊安設數營嚴密圍困晝夜防範先令賊人無路
覓食不戰自亂可以乘勢殲除斷不致耽延時日
公偕李侍堯又奏言臣接奉

上諭據賊人買成伏供有賊因西寧糧草最多令其前往
探聽之語不可不加意防範臣查買成伏係三月
十三日在西寧盤獲嗣經解省訊據該犯供稱三
月二十六日晚間蘇四十三因聞西寧客商買賣

人衆糧草最多令其前往探聽虛實三十日行至
平仲驛地方卽被兵役拏獲等語計彼時正值賊
人初至蘭州勢方猖獗各路官兵尙未到齊是以
蘇四十三敢令買成伏前往探聽希圖搶掠糧草
目下賊勢窮蹙各處俱安兵防範斷不能復至彼
處滋擾至賊雖拚死抗拒實不過釜底游魂現在
惟有多方籌畫俾早就生擒卽令自焚自戕以及
跳河致斃亦必盡心設法求其屍身確據必不令
乘間免脫致別生事端其所有糧草尙係從前搶
掠所得臣阿桂初到甘省時賊人猶潛出滋擾民

間有被其搶掠前來稟報者近日以來益無稟報
搶去糧食等物之事而賊營附近居民地方均已
差人曉諭搬移賊人無從搶劫况沙井驛阿千鎮
一帶皆有兵防守稽查嚴密卽有匪徒亦不敢暗
爲運送接濟奏入

諭曰日內盼望捷音甚爲懸切及披覽阿桂奏此次進剿
又未能卽刻擒獲殊增憤懣看來逆匪拚死抗拒頗爲
悍兇阿桂另摺所云賊勢窮蹙竟不可輕爲此語且此
次官兵打仗不爲不盡力而仍未能一舉殲擒尤須慎
重籌畫計出萬全不宜再多傷兵力阿桂所稱嚴密圍

困使之無路覓食不戰自亂自應如此辦理但防範倍
須嚴密務使聲息不通至所稱賊人糧草尙係從前搶
掠所得朕以爲必無此理據前奏賊匪尙有一月糧食
今賊匪佔據山梁已及三月卽和珅回程以來又幾五
十日若僅係前次搶掠之糧安能供給如許之久恐仍
不免潛出搶掠并或有人爲之接濟朕始終以此爲疑
卽火藥一項前據奏賊人止存二十馱藏在營內地壕
裏若果如此則日下亦將用罄何致尙稱鎗勢甚緊卽
賊人箭枝亦應用完何以尙有受箭傷之人是阿桂所
稱附近匪徒不敢暗爲運送者亦未必然惟當加緊防

範不使復有劫掠接濟之事而迤西一帶尤宜防其逃
竄并潛通消息為要

恭錄

御製詩

永佑寺瞻禮

皇祖當年喜此居自應

神御奉如初禮因義起言思彼

仁以

憲章事矧予至必先瞻欽繼述念維切已敢舒徐不期梗
化回倡亂復此有征盼捷書

撤拉爾番回肆逆一案已屢
有詩紀事昨阿桂奏川省屯

練土兵等到齊欲令預悉華林山勢及進兵路徑先於閏
五月初三日派海蘭察明亮等帶領阿拉善馬兵及屯練
兵由龍尾山繞至華林山西南斜撲賊卡又派舒亮等帶
滿漢奮勇兵過溝由山南直壓賊卡額森特及伍彌泰等
在山坡山梁分路策應除鎗礮斃賊不計數外三次攪戰
約殺賊六七十名現擬於初九初十兩日尅期大舉四路
攻圍以期一舉殄滅晝
夜惟望捷音速至耳

十八日

諭曰昨據阿桂奏此次官兵打仗出力而勦洗尚未蕪事
朕心實爲厯念阿桂摺內亦稱甚屬焦急但此事現止
阿桂一人督辦非如征剿兩金川尙有參贊之人務須
持以鎮靜方可悉心籌辦不可過於焦急至李待堯與
阿桂係同辦一事尤須善爲勸慰諸事盡心贊助以期

妥協不可以軍旅地方之事稍存岐視再海蘭察舒亮
薩炳阿鄂輝等此次打仗奮勇受有鎗箭傷昨已俱加
恩賞阿桂尤須加意撫慰其帶兵員弁及滿漢官兵出
力受傷者已俱酌量加恩此際自宜稍令休息不可過
於督責卽川省屯練等跋涉遠來臨陣時又能奮勇出
力昨已加恩賞給錢糧所有此次打仗受傷者均須一
體加以撫循使之感奮用命至此時辦理關鍵總在各
路堵截斷賊口糧不使搶掠供食而防守嚴密勿令乘
間竄逸尤爲最要之事現在已屆麥熟之時昨阿桂奏
賊人必思就近割取朕意逆匪如果出卡割搶卽可乘

勢勦殺至民間新麥或竟官爲買取刈割使不爲賊人
所得其應如何酌辦之處著阿桂李侍堯妥爲籌辦務
令賊匪坐困乏食卽可不戰自斃再聞賊人夜間尙無
防範若令海蘭察等帶領屯練降番等銜枚前進潛刦
賊營可以使其擾亂著卽酌量辦理至朕於甘肅百姓
每歲發帑養贍恩施優渥而此等番回平日旣無差科
又非若金川必欲取之以絕後患者可比何致作逆若
此揆之天理人情實出意計之外或者向來地方有所
擾累若輩乎不然何以致此也昨得奏後終夜反覆思
之實爲憤懣想阿桂亦同深痛恨惟期妥協速行籌畫

早爲歲事以慰懸望

二十三日

公偕李侍堯奏言賊匪自五月初二日被我兵痛加殲戮後卽於華林山前拏立大卡一座拆卸民居土坯碎石砌築碉房內安孔穴又於卡邊刨挖深溝一道賊匪分布潛藏請放鳥鎗以爲抵禦之計其大卡前又有小卡四座希圖接應聯絡負固死守我兵屢次打仗俱係誘其出壕方能截殺迨賊匪敗逃竄歸卡柵我兵撲進時俱爲溝內卡上鎗勢所阻不能得利臣阿桂晝夜思維非攻得賊

入大卡不足以制其死命但賊人以逸待勞居高
臨下若力攻仍無把握因與海蘭察額森特明亮
再四籌酌益於十三日令伊等至賊營迤西一帶
相度安營處所又於龍尾山打礮併發兵過溝誘
賊賊總不敢遠離大卡因觀其進退情形知賊匪
見我兵撤回後亦卽由卡內將多餘之人陸續撤
回歇涼坐卧臣等公同熟商惟有乘賊人懈怠之
時出其不意突前撲壓或可集事因於十五日令
海蘭察額森特明亮同多爾濟色布坦那木札彰
靄明山阿蘭保阿爾都總兵羅江鱗併侍衛章京

帶領馬兵五百名步兵八百名於撤兵之際潛往
華林山東南山溝內分路埋伏派泰斐英阿福寧
哈當阿帶領滿漢兵在龍尾山南埋伏策應臣阿
桂臣李侍堯同伍彌泰莽古賚旺親班巴爾烏爾
圖納遜馬彪仁和三德武靈阿率領滿漢官兵在
龍尾山梁向賊營架礮轟打寅刻齊集華林山梁
維時海蘭察額森特明亮等卽先率兵衝撲賊卡
將卡前山包佔得仍令老教土兵上前誘賊賊匪
藏匿卡柵內放鎗抵禦不敢出迎午刻我兵徐徐
撤回至山梁潛伏其時海蘭察在龍尾山均察看

賊營動靜其守卡衆賊果有陸續回營止餘數十
賊在卡存駐海蘭察偵探得實卽單騎由五泉山
繞道至華林山溝埋伏處所同額森特明亮等帶
領馬兵突出疾馳直撲大卡步兵屯練降番同時
趕到齊至溝邊卡內之賊猝不及防惶遽無措我
兵用鋏鑊覓路過溝一擁進卡將賊匪數卡盡行
殺死其營內賊匪傾穴出迎拚死衝壓希冀奪回
大卡我兵鎗箭齊發殲戮賊匪甚多賊人退至兩
處山包後潛藏放鎗抵禦時出力撲我兵旣得大
卡俯視賊營動靜皆知實已扼吭據要時天已將

晚卽於新得卡座內砌築防守並於左近峯卡數處聯絡接應海蘭察明亮等卽在彼帶兵駐守以備賊人攻撲賊匪果於夜間奮力衝撲數次俱被我兵鎗箭所中傷死甚多及至天色黎明海蘭察等逆料賊人終夜抗拒必已疲乏因分兵撲進又將兩處山包佔得並派兵將賊人迤西本布爾廟一座向爲賊人窟穴一併捨得燒燬殺賊甚多現在我兵離賊營甚近賊人存立之地甚促不過中隔溝砌數道賊匪已無險可恃我兵勇氣倍增賊人竄敗窮蹙情狀畢露不難刻時殲滅而賊營迤

西一帶我馬兵已接連佔至黃河邊臨河及北岸俱有兵丁水手嚴密防範業已四面圍困無虞竄逸計兩日打仗除鎗礮打死不計數外殺死賊人百餘名我兵陣亡官二員阿拉善佐領根丕爾由京派來前鋒托倫保受傷官五員阿拉善三等台吉諾依多魯千把總四人兵丁內陣亡受傷者無多俟詳查明確另行造報奏入

諭曰此次官兵攻得賊匪大卡及所佔廟宇相距賊營甚近彼已無險可守且黃河南北岸邊亦俱有官兵接連密布不致有乘間竄逸之虞至逆賊如此猖獗我領兵

大員官兵等爲所傷折不少必得生擒首逆及其黨惡
要犯盡法處治方足以彰國法而儆兇頑第恐賊匪自
知無路可逃竟爲自焚自戕之計此雖亦足以完事然
究不如生擒之爲更快想阿桂自必設法妥協辦理

又

諭曰阿桂等此次派兵攻卡殺賊調度有方阿桂李侍堯
各賞給大荷包一對小荷包一對

恭錄

御製詩

遊獅子園

獅子峯陰居

賜昔額題仍是

御臺揮有懷因便為一豫無逸敢皇懈萬幾頻問郵籤心

不憚閏五月二十三日據阿桂奏十五日大舉攻剿將賊

匪甚多隨於左近四面拏卡聯絡接應海蘭察明亮等

即帶兵駐守次日天明又佔兩處山包並將賊營迤西本

布爾廟燒燬殺賊甚多現在官兵佔至黃河邊兩岸俱有

兵丁水手防範賊勢窮蹙不日可剿除淨盡等語今又隔

數日惟晝夜忍看畫障景如依成詩數首旋歸去行漏曾

盼望捷音耳非四刻違

二十七曰
公借李侍堯奏言查賊營之前尚有溝壕二道溝

卷之三十一

三

上俱有賊卡我兵於閏五月十六日已撲至第一層溝邊賊匪在第二層溝礮及營內放鎗抵禦不能撲進卽於迤西安設營卡並令馬兵接連佔至黃河邊嚴密防守是夜賊人不敢復出攻撲惟於十七日申刻烈風暴雨時賊匪乘勢出壕衝突被鎗箭殺死十餘人始行退入溝內藏匿拚死支持臣思賊營旣在掌握不值用力攻撲傷我官兵但恐我兵一擁進攻賊匪挺而走險不能保無竄逸因與海蘭察明亮公同熟商於本布爾廟迤西至蓮花池繞出華林寺後陡礮下直接龍尾山俱安

設官兵木城營卡星羅碁布空缺處并刨挖深壕四面圍困使賊人不能下至黃河取水其華林山東水磨溝之水派員前赴上游相度地勢可以旁洩處俱令旁洩其水磨溝業已斷流賊人水道已斷數日不戰自亂可以盡數擒剿而官兵周圍攻打亦斷不致耽延時日奏入

諭曰閱阿桂所奏現在安設木城營卡刨挖深壕使賊不能下至黃河取水其水磨溝之水業已旁洩斷流所奏自是正辦覽之亦爲慰藉第惜籌之不早耳至現在令軍機大臣審訊逆犯馬復才據供八蜡廟內樓房九間

上下多有糧草并墳園內有屋六間俱堆糧食等語恐賊人儲蓄尙復不少若我兵竟待其食盡坐斃則曠日持久亦復不成事體因思賊人樓房本高且樓屋皆係木植構成易於引火何不於夜間令沿河防卡官兵以火箭火彈等物向準拋射將所蓄口食盡行燒燬則於剿捕更速著傳諭阿桂令其妥酌辦理

二十九日

諭曰前經降旨令阿桂等於籌辦善後事宜案內將陝甘二省應添兵數若干妥議具奏因諭軍機大臣將陝甘二省原額兵若干現存兵若干交部詳查今據查奏陝

甘二省兵丁除積年移駐新疆屯防並扣缺不補外現存兵五萬二千四百五十四名較原額少兵三萬一千九百二十名等語自新疆一帶盡入版圖拓地二萬餘里兵儲經費自應加增今該二省內地兵數既較原額減少三萬有餘自應量爲添設但不必竟照原額添補朕意酌添兵一萬餘名亦足敷用至兵丁有馬步守三項之分各省成例大約以馬三步七爲率朕意馬兵一項較步守爲優遇有調遣亦可得力今既酌爲添設不如竟將馬兵酌添六七千名卽所需兵餉較多而爲捍衛邊陲起見正不必斤斤小費著傳諭阿桂李侍堯於

籌辦善後時確核此二省地方營制情形將某處應添兵若干及馬步守三項應如何酌量分添之處逐一妥議具奏其陝西一省益著會同畢沅辦理至現在所少兵三萬一千餘名查係歷年移駐新疆屯防及扣存不補之缺但新疆一帶未必駐兵有三萬餘名之多著傳諭阿桂等將新疆一帶實在移駐屯防若干此外扣存未補兵額若干及如何扣存不補之處逐一詳悉查明覆奏再陝甘二省從前原係一省是以該部於原額兵冊不能按省分開載但現存兵數既尙有五萬二千餘名卽甘肅所駐較西安爲多亦未必大相懸絕何以畢

沅前奏陝省此時兵力合計不過萬餘若陝省兵數實
止如此則甘省存兵計尙有四萬餘各何至逆匪起事
時又無兵可調其詳總不能深悉并著傳諭阿桂李侍
堯詳確查明覆奏

--	--	--	--	--	--	--	--	--	--

阿文成公年譜卷二十四

王 昶 勘定

受業

盧蔭溥增脩

第三孫那彥成恭纂

乾隆四十六年

六月初三日

公偕李侍堯奏言官兵數日以來於營卡相間處所創挖寬深一丈溝壕溝邊安設卡柵將賊營四面圍困其華林寺後及雷壇有井二處俱用土填築賊匪自知死在旦夕卽夜間亦不敢出壕攻撲

惟於溝內潛藏待我兵臨近時暗放一鎗希冀苟延片刻其營內騾馬牛驢數百因斷絕水草倒斃殆盡卽間有逸出遇水奔飲亦多不能活官兵自十九日拏卡以後賊人業已斷水二日惟二十二日寅刻起至巳刻止密雨四時賊人又得稍資接濟連日有自賊營脫回之老教三名_臣等詳加訊問據供賊營自官兵斷絕水道後俱各惶懼曾於山上挖井二處掘至十餘丈不能得水二十二日天雨賊人各將帳房盆罐等器承取足敷一日飲用二十三日又已斷絕蘇四十三令賊衆不必聲

噉恐官兵知其斷水喉啞賊營大小及受傷者尚
有四五百人設誓共死糧食亦止能支七八日等
語臣思賊匪尚勉強支持其困憊情形業已畢露
不值用力攻撲傷我官兵若兩三日不雨斷不能
稍延殘喘即可盡數剿擒奏入

諭曰據阿桂奏賊匪待斃情形自斷不能再稽時日惟望
速得捷音擒獲首夥要犯以伸國憲而快人心再甘肅
省向來俱以被旱須賑爲言幾於年年如此昨和珅一
入甘境卽遇陰雨今阿桂摺內又稱二十二日得有密
雨四時可見該省亦並非竟少雨澤人言俱未足信著

傳諭阿桂李侍堯確切訪察向年雨水情形據實覆奏
公又偕李侍堯奏言查賊匪佔據山梁已及三月
醜類本有一千數百節次爲我兵剿殺尚存四五
百人誠如

聖諭其從前搶掠所得糧食安能供給如許之久臣等於
拏獲賊匪及自賊營脫回之舊教回民等屢經嚴
切詢問其四月中旬以前洪濟橋唐家川等處從
逆回民尚有馱運糧食爲賊匪接濟者及該處安
設多兵防守並陸續拏獲黨惡逆犯審明正法辦
理後已無接濟之事惟賊營迤西一帶民居雖早

已搬移避匿而其埋藏糧食有因一時惶急未能盡行攜帶者賊匪於抗拒官兵之暇雖不敢遠出劫掠而於附近一帶空屋內搜取糧食實所不免所以不至乏食至賊營迤西雖有洮河爲限而該處山徑叢雜小路甚多屢奉

訓諭防範倍須嚴密

臣

阿桂日久籌慮不釋於懷但欲分

兵堵禦須從五泉山迤南繞出華林山背後下至蓮花池亂古堆始可安設營盤非得三千可用之兵實不足恃而中隔賊營越山遶路有四五十里與迤東各營聲勢絕不能通須從黃河北岸運送

食物草料辦理既屬周章且恐數營孤懸山外後臨黃河萬一兵志不固稍有動移更屬不成事體是以與海蘭察額森特明亮再四籌酌伊等亦屢次前往賊營迤西相度形勢未克遽爲安設惟是本月十五日攻得賊人大卡之後卽在華林山逼近賊營四面安設木城木柵營卡始能嚴密圍困至火藥一項賊人攻破河州所得雖止存二十馱而_臣等未到以前官兵打仗多有陣亡遺棄屍身其所帶火藥轉爲賊匪搜取添用自_臣等到後官兵卽間有陣亡者本屬無多同隊官兵卽將屍身

擡回火藥臺無所得臣等又詢之脫回老教人等
知賊營火藥漸少實無附近匪徒暗爲運送之事
再賊匪畏懼我兵架礮轟打俱刨挖土穴潛居其
帳房本屬虛設且官兵現已四面圍困賊匪所踞
不過彈丸無需大礮轟擊至蘭州舊存子母礮僅
與鳥鎗無異施放不能及遠又威遠礮八尊子重
十六兩至二十兩轟擊稍遠而施放時易於跳動
又無準頭俱不甚得力現已照四川劈山礮式樣
製成二十尊轟打賊營甚爲便捷得力又聞從前
辦理準噶爾回疆時所造食子六十兩重神礮現

有存貯涼州者並已調到數尊應用亦甚得力有
準涼州尚有熟諳匠役現亦調取來省令其照式
試造雖現在圍困賊營已無需應用而省城重地
鑄造礮位數尊亦可永資防衛奏入報

聞

又

諭曰據李奉翰奏開放沈家窰引河溜勢暢達一摺所辦
甚好至閱進到圖內南岸御椿亭之西現在塌崖該處
距挑水壩西邊木龍不遠恐漸塌漸近未免於木龍有
礙自宜設法小心保護爲要因於圖內用硃筆點記至

北岸舊有灘嘴處所現在已將嫩淤刷去灘嘴亦漸次塌動此是極好形勢因亦於圖內圈記再閱挑水壩東邊木龍之下雖有舊堤兩道今若從東邊木龍接至順黃壩一帶沿河再添築新堤一道則河流更直似不慮其復逼舊堤因亦於圖內用硃筆尖記兩頭但是否應如此辦理阿桂今春在南河上下履勘其情形自必熟悉將硃筆標識原圖照樣另繪硃批李奉翰摺抄寄阿桂令其審酌具奏昨有御製詩書扇寄賜阿桂並著隨旨發往

恭錄

御製詩

書扇賜大學士阿桂時在蘭州剿回寇

適日書詩經

曩時曾書詩經全部並指示畫院圖之間亦涉筆茲重觀之覺書法未臻因復手寫一通

易之適書至小雅北山從事賢勞經營四方之句不覺纏懷于役者之勞云

北山什重勘即事

懷賢臣于役頻再三江河資畫策逆回茲剿陷

大學士阿桂於上年

臘底命往浙江閱勘塘工今春並令由江南至河南查辦河務時值甘省匪回肆逆命由豫取道會剿近雖屢奏剿殺賊匪并於賊人所佔山梁四面擊卡圍逼賊勢窮徒以感待斃而蕘事捷音尚未奏到懸望日甚一日耳

恃險守絕壁及深塹密圍待坐困報功以遲欠憤懣爾我

同賢勞久煩憺卿無父母憂予有股肱念賜扇藉解爰是

用五字按

初八日

公偕李侍堯奏言臣等將賊營四面圍困斷絕賊人水道二十五夜間有數十賊從直礮縫下水磨溝至從前有泉處刨挖盜水官兵知覺鎗箭齊發殺死賊人數名餘俱受傷竄去溝內血跡甚多遺棄皮渾屯五個及木碗繩鞋等物次日有脫回老教數名詳加訊問據供是夜賊匪本有五十名帶皮渾屯十五個因官兵鎗勢甚急止盜得十渾屯水又每渾屯止裝得水一半方能肩負爬山及竄回賊營卽已一搶而盡並無餘存等語臣與海蘭

察明亮將該處守卡官兵嚴行申飭所有創開泉脈多加土石填築並添派阿拉善鎗手百名赴該處嚴密防範至二十七夜間賊匪復圖覓路下溝卽爲屯練兵殺死一名生擒一名又有脫回之老教八名臣等一併提訊該犯等俱因受渴已極不能出聲惟解胸懷以心貼地卽予以水飲亦不能下咽徐徐灌潤始能言語據供賊匪共有五百餘人老弱傷病者業已斷水五日已有渴斃者卽蘇四十三及強壯有力能打仗者亦已斷水三日雖有炒麵作糧亦不能下咽至騾馬牛驢數百俱倒斃

淨盡衆人受渴無奈俱向蘇四十三商量計策蘇
四十三惟稱現在念經祈禱到至急時天必降雨
救濟等語是賊匪困憊情形已可概見臣與海蘭
察明亮公同商酌於二十九日派兵分路進撲以
試其能否抵禦雖二十八夜間賊人復至華林寺
後身將舊井刨開盜水而據脫出之老教一名供
稱賊匪因井內木石甚多刨挖費力且恐官兵驚
覺止盜得兩小罐水等語諒不能多爲接濟因派
滿漢奮勇官兵由中路進撲賊營派屯練降番由
華林山東攀勸上撲派老教土兵由華林山西覓

路上攻我兵撲至壕邊賊匪雖不能如前剽悍尚於溝內卡上放鎗抵禦維時官兵鎗礮齊發並添派熟練鎗手向賊營施放賊匪雖傷死頗多尚拚命支持不肯潰散臣思賊匪滅在旦夕不值用力攻撲傷我官兵因令撤回各卡防守此次攻撲賊營傷死賊人約二十餘名臣查賊匪斷水數日尚能死守實出意計之外現在將舊井及有泉處所愈加填築堅實並多派屯練阿拉善兵在左近埋伏以備乘機勦殺本日寅卯二時又復密雨現在尚未晴霽然正值土王用事看來不至連陰賊人

雖得稍資接濟亦不能多延時日俟其困憊已極
卽進兵擒捕再賊匪於二十五二十八兩夜至水
磨溝及華林寺後身盜水該二處營卡係提督仁
和及總兵羅江鱗所管不能嚴密防範殊屬疎玩
臣阿桂業已嚴加申飭並將該二員存記以觀後
效如再有疎虞卽一併嚴叅治罪奏入

諭曰賊人當此窮蹙垂斃之時尚皆負隅死守實是奇事
出於情理之外今官兵四面圍攻又將其盜水處所填
築土石加兵防範賊匪自必益加疲困且晚卽可全就
擒捕至脫回之老教卽係順從新教同惡相濟之人此

時或暫畱軍營不卽正法以爲招致賊駭之計尚可但其縱賊爲逆已經數月隨賊打仗傷我官兵實屬罪無可赦且伊等果係舊教何不早行竄出直至目下知賊勢窮迫萬無希倖始復脫回託名老教以圖寬免自斷不可復畱著傳諭阿桂等於剿辦正賊後卽將臨近脫回之老教概行按律正法無少姑息至賊人下溝盜水雖旒經知覺但已被創挖得水用皮渾屯裝取實屬疎於防範在羅江鱗係他省總兵到甘効力或可誘之呼應不靈至仁和係本省提督所派弁兵皆其管轄何致玩忽若此仁和之不是更大著傳諭於事畢時卽嚴行

叅奏

恭錄

御製詩

阿桂奏圍困賊營斷水情形詩以誌事

賊營蓄糧足延時取水黃河更密邇所以守穴三月久近

始四面圍築壘黃河被隔填井泉絕水賊窮知必死老教

逃出將欲斃前經阿桂等奏安設木城卡柵將賊營四面

及雷壇二井俱用土填築茲復據奏守卡官兵殺死夜間

盜水賊匪數名并有脫回之老教等八名提訊該犯等俱

受渴已極不能出聲予水亦不能下徐徐灑潤始能言語

死者卽賊渠蘇四十三及力能打仗之人亦斷水三日雖

有炒麵不能下咽騾馬牛驢數百匹倒斃淨盡俟其困憊

可之戈八戶會

已極即進兵擒捕不與水亦不能飲此徐徐灌活始取供
 使一名免脫等語 其眾五百苦斷水觀奏翻為心惻然兇渠首禍累眾耳然
 猶一心拒王師反側為恨亦彼取叶厄魯回部及金川無
 不勦殺為蕩洗何以茲番乃憐賊古稀因識吾老矣吁嗟
 嘉兵有至訓豈願興戎不得已

初九日

諭曰據李奉翰奏邳睢黃河南岸魏家莊大堤於六月初
 一日未刻該處隄工漫溢過水約長十餘丈等語江豫
 二省黃河自乾隆四十二年開陶莊引河以來連歲衝
 溢在豫省沙土鬆浮或尚易於衝刷至江南土性堅實

何以上年郭家渡甫經漫決此次又有魏家莊之事况
上年春間命阿桂在南河會勘展寬陶莊新河四十丈
今春又令在彼會勘因九里岡一帶河中岡沙橫亘復
於北岸挑挖引河一千餘丈南岸又將沈家窰河身展
寬三十丈近日復據李奉翰奏開放沈家窰引河溜勢
甚暢朕心方爲慰藉何以此次忽又有漫溢之奏况現
在清黃交滙處所離清口較遠清口得以暢出海口又
復深遙何以轉致如此且從前並非每歲必有水患而
自開放陶莊新河以來轉年年不免漫溢朕於此實不
能無疑著阿桂將南河實在情形是否或因陶莊開放

引河致有紆迴格礙之處詳晰具奏此朕因河防緊要
虛心諮訪阿桂諒亦必確按實情入告不肯稍存迴護
也

十二日

公偕李侍堯奏言賊匪斷水之後雖於兩次夜間
縋下水磨溝至華林寺後身盜水然爲官兵鎗箭
所中驚懼惶急盜取無多若再渴數日亦必困憊
潰亂無如本月初一日寅時起巳時止密雨四時
較二十二日其勢更酣賊人大資接濟初二初三
兩日晴霽初四日又復陰雨幸不甚大臣阿桂與

海蘭察明亮再四籌酌現在大雨時行止可將斷絕水道爲困賊之一法難以坐待必須另籌攻取之策但賊人所恃惟在溝內卡上放鎗抵禦我兵自木柵內進撲距溝尚遠未到以前已不免損傷因先在我兵卡外夜間刨挖溝壕合官兵足以蔽身然後逐漸刨挖於賊營前又擊立木柵一層離賊溝邊不過至三丈五丈不等擲石可及自初一日夜拏起賊匪惶懼時於卡內探身放鎗俱爲自京派來之好鳥鎗手及阿拉善鎗兵擊斃初二初三兩日共陸續斃賊二十餘名及我兵木柵拏成

賊乘夜又挖深坑潛匿日間並不敢溝邊行走我
兵現擬於木柵內接築礮臺數座俯視溝卡內賊
匪施放鎗箭並架礮轟擊賊卡令其不能存立一
面挑選奮勇官兵預備俟有可乘之機卽一擁而
進

公偕李侍堯又奏言查八蜡廟並無樓屋九間惟
華林寺後有九間樓一座已于五月十四日爲官
兵燒燬並無賊人糧草存貯卽本布爾廟回爲賊
匪窟穴官兵搶得燒燬時亦無儲蓄臣等訊據拏
獲賊匪及脫回老教供稱賊人雜糧炒麵等物俱

用口袋盛貯藏于地穴賊人畏官兵架礮轟打俱
挖坑穴潛匿帳房亦屬虛設蘇四十三亦在地穴
居住外搭木板等語是賊營內除華林寺外實無
房屋爲堆貯糧草之處至馬復才所供蘭州關廟
回子暗通逆匪及西南關蕭姓馬姓回子爲賊接
應糧草一節臣阿桂等一到蘭州卽風聞其事早
已畱心察訪並諭按察使福寧借他事爲名於閏
五月十九日將蕭得福看守監禁俟訪有通賊實
據於辦畢正賊時拏獲馬姓回子一併查辦其唐
家川爲賊紮棧過渡隨去回子除馬復才指出各

犯外尚有張國清供出之張國桃等十四人唐正宗供出之唐宗第等二十三人臣一併存記俟搜捕賊黨時按名查辦至唐家川等處逆黨陸續拏獲者除前次奏明已正法三十四名外現又正法二十名審解二名恐尚有餘孽於勦賊完竣派員前往查辦諭令搜捕淨盡至馬復才供稱蘇四十三要逃往苦蘆灣現在賊營尚有該處逆回三百餘人都會打仗等語查苦蘆灣回子于逆賊初到蘭州時雖供有馱送米麵之事亦無三百餘人都會打仗之語但馬復才既有是供臣等寧信以爲

實于攻破賊營後逐一嚴辦至安定一帶被馬明
心煽惑者自多伏羌新教從前拏獲之馬而立又
供有斂銀資助馬明心之事俱應查辦臣等早已
諭令該地方官嚴密查察事平之後卽派明幹文
武大員帶兵前往查明從逆確實各犯一并嚴辦
不使復畱遺孽其苦蘆灣在華林山之西距賊營
一百里離西古城六十里緊臨黃河南岸有四五
百家俱係臯蘭縣所屬回民諒無處習學打仗但
該回民等卽無幫同打仗之事若接濟糧食屬實
俟擒獲正犯之後亦應一併嚴辦均奏入

諭曰據阿桂等奏於賊營南拏立木柵又接築礮臺一摺所辦甚是現在賊匪日益窮蹙不難計日待斃自不值傷我官兵朕雖日夜焦急盼望成功亦不得不耐心以待况官兵四面圍攻布置嚴密自不虞賊衆復有竄逸及外來賊匪接應之事至南關外逆回蕭得福既經訪明拏獲監禁著派委幹妥員弁解至熱河審辦沿途務令小心防範毋致少有疎虞

十三日

諭曰昨據阿桂等奏到圖內賊匪所佔之華林山並龍尾山緊接蘭州西南一帶關廂該處商賈湊集最爲殷富

而蘭州省城本小轉在山下殊於形勢未協朕意欲將西面城垣展寬至此山梁俾西關一帶居民及現在賊營佔據之處一半包入城內如此跨山臨水既足以壯觀瞻並可以資控制至河北金城關逼近黃河渡橋形勢亦關緊要將來添設兵丁時亦應於該處多添兵丁合將領大員駐劄似更足資彈壓且大河南北聲勢連絡於巡緝防守等事尤爲有益著傳諭阿桂李侍堯將此二事入於善後事宜案內一併妥議具奏

十七日

公偕李侍堯奏言查逆犯馬復才所供八腊廟有

樓房九間上下多是賊人糧草一節今八腊廟已圍在官兵木柵之外該處並無樓房亦無賊人存貯糧草至賊營所踞周圍不過半里並無糧束堆積其糧食俱口袋盛貯藏於地穴火彈既不能及而所支帳房半屬虛設賊人亦不在內居住且被我兵每日鎗礮環擊俱經破燬是以前次雖經製造火箭數十枝尚未施用至從前燒燬華林寺後樓房屋宇卽係拋擲火彈俟將來逼近賊卡再行拋擲焚燒可使潰亂又奉

諭旨賊人所挖溝壕雖屬寬深或令官兵等填壕而進賊

人必出而抗阻我兵卽可用鎗箭剿殺仰見

聖明遠照於現在情形洞若觀火臣等實深欽服查官兵

自六月初一日夜於賊營南又拏立木柵一層逐漸進逼並於木柵內接築礮臺數座施放鎗礮卽欲爲填壕而進之計數日以來賊匪又乘夜挖深坑潛匿及於卡內藏身挖孔放鎗不敢探身出望日間亦不敢於近處行走其爲派出之好鳥鎗手打倒者每日七八名至十餘名不等而挖溝拏卡官兵亦間有受傷者臣阿桂與海蘭察明亮再四籌酌現離賊溝尚有數丈計於第二層木柵外接

連創挖人字形溝三處直逼賊壕相離不過數尺復於溝上拏立木卡三座令官兵足以蔽身創挖成溝並於柵內填築土臺用鎗礮在上擊打來擾之賊然後令官兵於柵內及溝邊將枝捆土袋拋入賊壕挑選奮勇官兵屯練在溝內預備俟賊壕填滿卽一擁而進自可期其得手惟初六日大雨竟夜勢甚霂霏初七初八連綿不止直至初九日始晴雖雨止卽行創挖而泥水甚大施力較難伏思華林山上雖絕無水泉而經此數次大雨賊匪承接藏貯可敷六七日飲用須再待五六日方受

渴困憊而此十餘日內又安知不雨是斷水爲最善最速之策而目今已覺其緩惟有遵照

諭旨指示俟數日內木卡拏成逼近賊溝填壕而進仰仗聖主威稜自應一舉集事奏入

諭曰連日盼望捷音及披閱奏函仍係籌辦情形且因連遇陰雨不能迅速刨挖而泥水甚大施力較難愈深憤懣想阿桂亦焦急愈甚至甘省近日雨水甚多致逆賊得以接濟固亦無可如何但糧食何以尚能久支况阿桂旣稱賊營並無樓房貯糧而目下官兵四面環攻賊人已如釜底此時豈尚有黨羽爲之接濟何以尚能如

此支持雖據阿桂奏稱斷不待其食盡坐斃但正恐不能不如此耳至甘省如此多雨而歷年俱謊稱被旱上下一氣冒賑舞弊若此安得不受天罰現命提訊勒爾謹及王廷瓚令其據實供吐阿桂李侍堯務將此案徹底嚴查不可稍存瞻顧也

公又奏言查沈家審引河臣阿桂於春間履勘時與薩載李奉翰公同商酌

奏請展寬三十丈挑長三百五十丈深二丈不獨爲挖淺起見原期大溜由南岸坐灣斜向東北奔注則北岸新河口以上淤灘可望其刷去於陶莊新

河形勢更爲直捷順暢仰蒙

聖明愈允辦理今據李奉翰奏報該處展寬河身完工已久適值黃水增長乘勢開放大溜直趨新河南岸日見塌崖溜行迅速由西南坐灣斜注東北順黃隄對岸灘嘴嫩淤先經刷去已成陡坡灘嘴亦漸次塌動等語誠如

聖諭此是極好形勢至南岸

御椿亭之西現在塌崖處所雖距挑水壩西邊木龍不遠但溜勢至此業已坐灣斜注東北似於木龍無礙
現奉

諭旨令該總河設法小心保護更爲慎重又敬閱圖內
硃筆尖記處

聖意欲從東邊木龍接至順黃壩一帶沿河再添築新隄
一道則河流更直似不慮其復逼舊隄

睿慮周詳

指示明切合臣詳悉審度將是否可以如此辦理之處據

實具奏臣思現在溜勢既由西南坐灣斜注東北

刷去北岸嫩淤塌動灘嘴則是已漸向北趨南岸
自不至著重似無慮其復逼舊隄但沿河添一層
隄岸卽多一層保障且河流更直於新河形勢更

屬有益無礙諒薩載等察看情形亦無異議俟伊等奏到時恭候

聖明欽定至奉到

御製詩書扇另行恭摺

奏謝奏入

諭曰據阿桂覆奏河工圖內硃筆尖記處添築新隄一道河流更直於新河形勢更屬有益無礙等語著將原摺鈔寄薩載閱看令其會同李奉翰妥爲辦理

二十二日

公偕李侍堯奏言臣阿桂於十五日合海蘭察明

亮率領多爾濟色布坦那木扎彰靄泰斐英阿福
寧明山阿蘭保哈當阿阿爾都老格併侍衛章京
帶領奮勇官兵屯練降番及阿拉善兵先在卡邊
預備埋伏令海祿鄂輝旺親班巴爾烏爾圖納遜
帶兵策應舒亮仁和馬彪羅江鱗策卜坦三德德
寧武靈阿伍彌泰莽古賚在龍尾山添助聲勢臣
阿桂臣李侍堯董率照料是日清晨轉乘天氣濃
陰出賊人不意方傳官兵將枝捆土袋拋入賊壕
而我兵勇氣百倍哈當阿帶領降番屯練先跳入
壕內與賊匪攪殺急令官兵用撓鈎搭住溝沿賊

卡鈎開土袋板片一面拋入火彈一面躡身而上其卡內之賊惶遽奔竄我兵一擁而進乘勢追殺殆盡隨將溝邊一帶賊卡十餘座及第二層賊壕拆毀以便兵丁往來行走賊匪見官兵已過溝卡知死在旦夕傾穴出迎抵死衝撲海蘭察明亮督率官兵奮勇勦殺賊匪潰敗竄回少頃又復前來衝突如是三次及被我兵勦殺無數始竄歸巢穴維時各路帶兵將弁見正面官兵得手由華林山西覓路攻進搶佔賊卡殺死賊人數十名仁和帶守卡官兵亦從華林山東直勘攀援而上殺散賊

人將勘上賊卡佔得海蘭察明亮令策應官兵卽於賊卡前拏立木柵一層未刻海蘭察明亮帶兵撲入賊營痛加勦殺拋射火箭火彈燒燬帳房板屋其蘇四十三所住巢穴係板屋內挖地窟數層外用板片遮蔽所有賊營內衣服食物以及堆貯火藥糧食尚多因官兵拋入火彈時引起賊人火藥盡行燒燬奪獲賊人刀矛烏鎗無數賊匪退回華林寺死守周圍預築土牆迤南有溝一道寺之西旁尚餘零星帳房及賊人板棚土房一處敗殘衆賊尚復拚死支持其時天已傍晚海蘭察明亮

又令官兵卽逼近華林寺拏立木柵一層賊匪於木柵將次拏成時奮力來撲日落後又衝突一次俱被我兵鎗箭打回被殺亦多臣等飭令官兵遇有賊匪頭人俱須擒獻不可殺傷無如賊人狠戾性成雖負傷甚重苟有殘喘俱儘力抗拒不肯束手就縛有中箭五六枝尚持石奮擊者於官兵焚燒賊營時猶復捨死前來搶奪糧食雨水實屬剽狡强悍是以官兵對敵時勢不能不卽行殺死恐稍遲卽爲賊人搶去本日殺死之賊除被賊搶去屍身未經割獲首級外共割得賊首一百二十餘

顥陸續送至臣阿桂處呈驗因令前次被擒現尚

監禁候質之新教馬三十九及馬六十七等逐一

詳細辨認認出蘇四十三韓一提把拉周阿渾張

懷德馬黑提卜首級五顆臣阿桂細驗蘇四十三

首級雖連鬚短鬍面白色與馬復才所供相符尚

恐難以憑信因派軍機司員會同按察使福寧陝

西鹽法道永慶攜帶蘇四十三等首級五顆飛馳

進城提出蘇四十三等家屬令其一併識認此內

蘇四十三首級不特蘇四十三妻妾認明哭泣卽

其十餘歲幼女亦撫摩泣涕其爲蘇四十三首級

✓
確鑿無疑是晚又有投出老教杜山別等四人臣
等詳加訊問據供十五日官兵過溝攻卡韓一提
把拉帶人守卡被官兵將韓一提把拉殺死卡內
有帶傷賊人逃回營盤告知蘇四十三見衆人害
怕不敢上前親身拏帶刀矛同馬得明海朝京張
懷德張漢催衆迎敵向前攻撲彼時官兵鎗箭甚
多蘇四十三等俱被打死賊營中被官兵殺死的
併帶傷的三百多人現在退回華林寺居住者尚
有韓黑提卜馬作南兩個頭人並能打仗者大小
二百多人因韓黑提卜等二人不是大頭人衆人

也不甚聽他們的話但各人怕死不肯出來等語
查此次過溝奪卡奮勇官兵屯練降番俱屬出力
而降番尤爲鼓舞先登現在賊人止有華林寺及
寺旁板棚土房一處前挖溝壕一道死守地更逼
窄無難奮勇撲進但困獸猶鬪而我兵仰攻賊人
於華林寺上放鎗抵禦恐不免傷損此時首逆及
緊要頭目俱已殺死所存不過敗殘賊黨更不值
傷我官兵現今官兵四面緊圍架礮轟打華林寺
俟賊人困殆卽乘勢撲進將餘黨剿戮淨盡奏入
諭曰此次圍剿賊巢賊斬首逆海蘭察明亮屢次率衆爭

先攻奪賊卡殲戮甚多實屬首先奮勇出力並哈當阿著交部從優議叙其餘在事出力之大小各員弁著阿桂等查明分別咨部議叙

又

諭曰本日已刻遞到阿桂等八百里奏報之摺知本月十五日官兵直撲賊營痛殲賊眾所有首逆蘇四十三等俱經被殺割得賊人首級一百二十餘顆等語已明降諭旨分別議叙議卹矣此時餘黨無多且要犯首犯已皆殲斃所餘不過敗殘賊眾何以尚然如此死守實不可解但此時自不值復煩我官兵用力攻剿祇須圍守

嚴密或待其饑渴自斃便可乘機擒捕惟在掃除淨盡不致漏網爲要至蘇四十三雖已不能生擒檻送盡法處治以快人心但其黨惡要犯中尚有韓黑提卜馬作南均係頭人如能設法生擒解京審辦亦可跟訊賊人起事的確實情盡法處治至蘇四十三首級當照康熙年間辦理勒爾丹之例傳示各省回民居住地方每處懸示數日使之共知儆戒再此時剿捕餘賊自屬易辦之事所有由京派往之海蘭察額森特及侍衛官員等著阿桂酌量如將來辦理餘黨尚須伊等帶兵則仍行暫畱倘已無需多員或就其中酌令陸續先行回京並

傳諭伊等到京後准其在家休息俟八月初再赴熱河以示優恤

恭錄

御製詩

阿桂奏報撲剿賊營已誅賊首蘇四十三詩以誌事

番回滋事信奇談嘯合千人死守甘邪教縱能令志固元

戎原是用兵諳前以撒拉爾番回蘇四十三肆逆官兵圍

于華林山而賊眾甘為死守阿桂節次奏

報調派官兵安設木卡斷絕填壕撲柵羣心奮斷水焚糧

水道諸務辦理皆合機宜衆力戮乃得一朝破巢險猶然數百冒鋒酣六月廿二日

已刻據阿桂

等奏到於本月十五日合海蘭察明亮率同領隊大員并

侍衛章京等帶領官兵屯練降番及阿拉善兵先在卡邊

河文文三會

三

埋伏相機進攻乘密雨時出賊人不意將枝捆土袋拋填
 賊人所掘壕溝我兵奮勇直進哈當阿帶領川省降番首
 先躍入壕內與賊匪攪殺官兵拋擲火彈乘勢擁進勦殺
 賊眾佔得賊卡賊壕俱經拆燬填塞海蘭察明亮督率官
 兵遠則鎗箭齊發近則短兵相接各路官兵咸懷振奮分
 佔壩上賊卡海蘭察明亮又拏立木柵帶兵直撲賊營痛
 加勦殺拋射火箭火彈燒燬帳房板屋奪獲賊人刀矛鳥
 鎗無算餘賊竄回華林寺死守呈驗割得賊首一百二十
 餘顆隨令前此擒獲監禁之賊黨家屬等逐一辨認據認
 出首逆蘇四十三韓一捉把拉周阿渾張阿渾即張懷德
 馬黑提卜等首級確鑿無疑并據投出老教杜山別等供
 稱賊人被殺死并帶傷者三百餘人所存殘敗賊黨尚有
 二百餘人遁入華林寺不敢復出現台官兵四面圍緊架
 礮轟擊數日之內即可殲戮淨盡等語因明降諭旨將首
 先奮勇出力之海蘭察明亮並哈當阿交部從優議叙其
 餘在事出力員弁及受傷陣亡官兵查明分別議叙優卹
 降番等概行賞給一月錢糧以示獎勵并令阿桂將
 蘇四十三首級傳諭各省梟示俾回民共知儆戒 異哉

狼戾撒拉爾馘矣倡狂四十三不屑紅旗飛報捷但云歲

事更云慚

二十八日

公偕李侍堯奏言賊匪敗殘餘黨退入華林寺死守官兵拏立木柵四面緊圍架礮轟打至六月十六日亥刻賊二百餘人奮力來撲海蘭察明亮督率守卡官兵奮勇勦殺鎗箭齊發賊人於鎗箭叢中拚死跳入溝內直至木柵邊希圖扳開木植乘隙竄逸俱被我兵刀斫矛戳殺死溝內餘賊始倉遽竄回是夜殺傷賊人數十名割取首級九顆賊始不敢於夜間復出衝撲又有連日投出老教三

名經_臣等詳加訊問據供頭人馬作南傷重身死至賊營所餘雨水業經臭敗眾人飲用二日至十八日俱已斷絕十七日晚又因爭水互相殘鬪殺死三人等語_臣等伏查賊營首逆及緊要頭目俱已殺死此時雖止存餘黨三百多人如盡數生擒尚可審究謀逆情節擇其稍關緊要者解送

行在盡法處治若卽督令官兵進撲賊人設或抗拒勢不得不盡力勦殺又復殲戮無遺是以稍遲數日俟賊人受渴困殆卽進兵搜捕逐一擒拏一面令官兵拏柵進逼施放鎗礮預備一擁撲入

公偕李侍堯又奏言查甘肅收捐監糧原爲倉儲賑濟起見自應收本色糧石乃開例之始一面奏立規條一面卽公然折色收捐情弊顯然王亶望僅以責成道府查禁結報希圖誘過又稱捐多穀多一任通融辦理更屬狡飾及王廷瓚任內改歸首府總辦竟定以五十五兩一名收捐將銀兩發交各州縣買補如五十五兩之數足敷採買則必甘省連歲豐收市糧充裕何以又需報災賑卹若不敷採買而令各屬州縣經手又必有短價勒買及竟不買補虛開賑濟冒銷通同肥橐種種情弊

皆不出

聖明照察之中臣等現在公同熟商設法跟求一有間隙

即嚴切究審務令水落石出

公又奏言甘省收捐監糧惟開例之始為多近來

報捐者已屬寥寥臣將歷年所捐數目比較惟乾

隆四十一年王亶望任內收捐監生至六萬三千

餘名為最多是年賑卹案內所動糧數至一百七

十萬餘石亦較歷年為甚其中情弊王亶望百喙

難逃但在浙省訊問王亶望恃無質証仍恐輾轉

狡飾似應將王亶望即行提解進京臣陸續查有

款蹟奏

聞時卽可

勅交刑部堂官提集勒爾謹王亶望王廷瓚二面質對以
成信讞均奏入

諭曰據阿桂等奏賊匪敗殘餘孽尚思乘夜衝撲希冀逃
竄實爲可惡然此時我兵拏柵嚴密圍攻無虞竄逸自
應待其困渴已極卽可一鼓成擒此事蘇四十三攻犯
蘭州被官兵擊敗後卽死守華林山不復散往他處俾
我兵得以拏柵環攻盡數剿殺益信

上天嘉佑之恩再阿桂等覆奏查辦監糧折色一案此事

既已發覺斷不能置之不辦卽結保之道府亦應查明
叅奏至王宣望任內捐收最多年分報災亦較重其中
情弊自屬百喙難逃阿桂等諒能徹底嚴查以成信讞
也

公又偕李侍堯奏言

臣等欽奉

諭旨蘭州河州民人爲賊蹂躪應如何加恩優恤之處查
明具奏

臣

等查該處民人至四月中旬後陸續來

歸

臣

阿桂抵蘭諭令地方官設廠施賑前此流離

顛沛之民今已漸次安集惟是兵燹之餘十室九
空兼之棲息無所葬埋之費牛馬被掠則無畜可

耕地畝拋荒則收成無望自應仰體

聖恩從優撫恤臣等伏查被賊焚掠貧民應如何優恤之

處向無成例可循惟甘省乾隆三十年寧遠伏羌通渭等縣地震奉

旨優恤案內將壓斃人口每大口給埋葬銀二兩小口七錢五分倒坍房屋每間給銀二兩生存人口每口先給糧一倉斗初賑不論大小口賑給糧三倉斗再普行加賑一個月每大口日給京升糧八合三勺小口四合一勺五抄倘有禾苗被災者入於災傷案內分別辦理又賞給器具銀一兩壓斃牛隻

附方之全言
每隻借給銀四兩分作四年徵還又奉

旨將寧遠伏羌通渭三縣該年應徵錢糧一體蠲免在案
此次蘭州河州被賊焚掠貧民困苦情狀實堪憫
惻蒙

皇上軫念災黎

施恩優恤似應仿照地震災民之例辦理凡有傷斃人口
每大口給埋葬銀二兩小口七錢五分燒燬房屋
每間給銀二兩生存人口每口先給糧一倉斗初
賑不論大小口賑給糧三倉斗被掠牲畜每牛馬
騾一匹借給銀四兩每驢一頭借給銀二兩分作

四年徵還務農民戶每戶賞給器具銀一兩其省城內外及河州附近一帶貧民業於五月初一日起先行開賑一個月口糧至續歸之戶一體賑恤以廣

皇仁以甦民困臣等現在飭令司道督率地方官確實查明辦理務使窮民均沾實惠奏入

諭曰據阿桂等奏甘肅應行撫卹事宜請將蘭州河州地方照乾隆三十年寧遠伏羌通渭三縣地震之例辦理等語此次甘肅蘭州河州等處猝被逆回焚掠急宜加意撫綏以甦民困所有該處應徵本年錢糧著加恩概

行蠲免以示優卹該部卽遵諭速行其餘所奏卹賞各
事宜並著行在戶部速議具奏旋經戶部議覆應如所
奏辦理得

旨允行

恭錄

御製詩

命加恩甘省被番回兵燹窮民詩以誌事用四月降

旨查卹施恩詩韻

偶來雜種逞刁狴竟犯州城躡市闐早以詳查命大吏是

命尚書和珅往甘肅卽令將該地方遭賊氛燹何以加恩
之處奏請頒旨有曰隱曰艱應入告十行次第待頒綸之

可
茲應實政惠窮民本年糧賦全蠲納六月廿八日據陞

撫卹事宜請將蘭州河州地方照乾隆三十年寧遠等縣

地震之例辦理因卽降諭旨將蘭州河州本年應征錢糧

加恩概行蠲免其傷斃人口每名房屋每間請各給銀二

兩又每人先給倉糧三斗再普行加賑一月又每戶賞給

置辦器具銀一兩牛馬每頭匹借給價銀四兩俾被賊焚

掠貧民各安生業俱交行在戶部核覆依議速行仍令該

地方官實力撫去聲燹處災傷普施仁小醜潢池累黎庶自

無德化愧絲綸

公又奏言查陶莊新河自開放以來衆論原有將

來水勢束住不能暢順之說臣於上年春間奉

命會勘業經奏請展寬四十丈惟新河迤西玉皇閣一帶

溜走北岸其勢將向南趨復欲其折回東北流入

可
三
一
三

新河雖有挑水壩挑溜究不免紆迴阻遏是以大溜直逼順黃隄南岸而行北岸長有淤灘今已於南岸

御碑亭之西開挑沈家窰引河俾河身廣濶大溜由南岸坐灣斜向東北奔注將對岸嫩淤灘嘴塌動於新河形勢更爲直捷無虞格礙而河身寬至八十丈不爲逼窄則上年以及今年漫溢其受病似不在陶莊引河如果因陶莊引河所致則漫溢自應在清河桃源宿遷一帶地方而此次魏家莊漫工仍係邳睢廳所屬在上年郭家渡漫工之上以臣愚

見究屬九里岡梗阻之病查黃流湍急河底必衝
刷抽槽方可以舒溜勢而資暢達九里岡與古城
山根相連地勢既高且岡土沙礪不能刷動自三
十六年陳家道口漫溢之後黃水改向南趨至此
爲岡土所阻上游一帶漸停漸淤河身竟成高仰
之勢卽如今春臣在南河正值桃汛長水時邳睢
一帶較之下游桃源多長水數尺且河流散漫不
復直走中流此卽岡土阻遏不能抽槽所致是以
急與河臣商酌奏請挑浚寬四十丈長一千餘丈
深二丈引河一道以期因勢利導衝刷寬深則上

游各工不致受病彼時因欲於大汛前完工不能
再加挑挖寬濶今閱李奉翰奏報魏家莊大溜南
趨業於閏五月二十七日將外灘刷去始于是日
將臨河集引河開放臨河集相去魏家莊尚遠自
不能卽日掣動溜勢隨隔兩日於六月初一日漫
溢此臣詳加審度以爲仍係九里岡高仰所致再
臣於乾隆四十四年冬間在儀封督辦漫工時副
將徐建功卽有江南河身高仰必須急加挑濬若
不挑濬則下游不能暢注河南七堡雖合龍亦恐
衝開之說今該副將雖已物故而此語袁守侗及

陳輝祖皆經與聞况自七堡合龍之後引河流至江南卽不能暢注壩根水勢兩月後始逐漸消落其爲下游淤淺尤屬顯然臣思魏家莊漫工雖止十餘丈正當伏秋大汛而各汛又俱雨水較多未必卽能合龍萬一正河斷流臣愚以爲似應乘大河見底之時將九里岡引河相度形勢再加寬展其漫口以下至九里岡九里岡以下至沈家窰一帶河身不必通行刨挖遍加察看如有間段淤淺處所趕緊逐段實力抽槽則漫口合龍河復正流後當必通順暢達上游各工或不致受病奏入

諭曰所奏似爲近理著鈔寄薩載李奉翰閱看卽速通盤
籌酌詳晰覆奏

七月初五日

公偕李侍堯奏言賊匪又於溝邊連夜收拾木卡
三面共有十餘處因上次我兵用撓鈎鈎開木板
土袋奪卡過溝更加填築堅實且將木植縱橫排
立密布如鹿角以爲賊卡外護二十一日有投出
老教一名詢據供稱賊營尚有韓黑提卜韓六十
個數頭人又小木撒係蘇四十三徒翁傳語眾賊
以若卽投出卽違棄教門務須同死方得好處係

蘇四十三遺言各宜遵守至賊人斷水業已三日
等語臣等揣度賊人業已受渴困殆擬卽于二十
三日進兵剿捕無如二十二日竟夜大雨如注直
至二十三日卯刻始止賊人又資接濟勢不能待
因卽派兵乘賊人初得水飲精力未復之時於巳
刻撲進賊人雖不敢出卡迎敵尚於卡內放鎗擲
石抵死守禦而雨後潤濕官兵拋擲火彈其板棚
木卡不能延燒惟是我兵鎗箭齊發賊人雖多死
傷不肯潰散臣等因官兵攻撲已久不免損傷至
申刻傳令撤回二十六日寅刻海蘭察明亮率同

彰靄泰斐英阿福寧明山阿蘭保海祿哈當阿鄂輝阿爾都并章京侍衛帶領奮勇官兵由正面進攻策卜坦三德德寧帶領守卡官兵及老教土兵由西邊攻撲舒亮仁和武靈阿帶領本卡官兵及屯練降番由東面攻撲我兵直至壕邊賊人於溝內卡上奮力抗拒且賊人舊存板棚土屋帳房連接緊密卡邊地勢狹窄又因躲避官兵鎗礮創挖溝壕縱橫數十道日間總於溝內行走坑坎既多又有板片木植拉雜蓬蓋我兵至此眼目既不能遠及手足更無從舒展久攻無益因於辰刻暫行

撤回合稍休息傳集將領弁兵飭整鼓勵復於午刻乘賊人不備奮勇復進一面拋擲火彈一面撲入賊卡痛加勦殺將溝卡盡行佔得並將溝內及守卡賊人殺死餘賊竄回華林寺我兵三面鎗箭追擊殺死更多海蘭察等卽督率將華林寺旁板棚土屋帳房盡行燒燬其內積存糧食衣物甚多一併延燒奪獲賊人鳥鎗刀矛無數並於賊人窟穴旁尋得窖水土坑二處卽用土填築此時賊人雖心膽已裂尚於華林寺土牆孔隙及寺牆外溝內放鎗死守天已將晚因在所得賊人溝卡邊逼

拏木柵一層以防賊人乘夜來撲此次殺死賊人一百餘名割取首級五十三顆生擒一名馬格拉五訊據供稱此時大小賊匪及受傷者尚有四百餘人本日倉遽竄回糧食不能攜取所積雨水之處又被官兵佔得寺內存水無多不敷兩日飲用等語連日官兵奮勇攻撲損傷稍多現在賊人所佔不過一華林寺勢更淺窄幾無容身之地且屢被勦殺窮蹙愈形自無難即日葺事奏入

諭曰據阿桂等奏攻勦逆回餘黨將華林寺旁板棚土屋帳房盡行燒燬殺賊一百餘名此次陣亡官員著交該

部照例優卹其餘受傷各員及陣亡受傷之滿漢屯土兵丁俱著阿桂等查明一體照例卹賞

又

諭曰賊黨垂斃之時尚敢抵死抗拒傷我官兵實堪痛恨但逆犯自知罪大惡極自不得不爲苟延殘喘之計想官兵四面圍攻且又將華林寺旁板棚土屋帳房盡皆攻得進擊木卡賊僅踞華林寺內爲地無幾想不日亦即可殲滅淨盡惟在防範嚴密不使一名乘間竄逸至現在尚有逆匪頭目韓黑提卜韓六十個及蘇四十三徒翁小木撒等在賊營率衆抗拒必得此三犯生擒解

熱河審辦盡法處治以彰國憲再阿桂等前奏撒拉爾回衆共有十二工人數自必甚多此次作逆之蘇四十三等不過其中之二三工將來事平之後須於善後事宜案內將此數工歸地方官妥協經理使永遠牧寧之處著傳諭阿桂等詳籌妥議

公偕李侍堯又奏言查捐監首嚴折色以防百弊叢生乃乾隆三十九年甘肅開例之始卽公然折色收捐業經王直望立供認不諱而彼時各道府並不盤查監糧有無亦卽假捏結報其爲欺罔若非染指分肥通同舞弊何以一力擔承臣等伏思此

事所關甚大雖歷時已久人數衆多不可不逐一
嚴叅徹底根究所有王亶望任內假捏結報之歷
任道府直隸州知州謹詳悉查明叅

奏請

旨將道員內陞任甘肅藩司王廷瓚現任江西藩司秦雄
飛甘肅臬司福寧甘肅西寧道劉光昱四川川北
道熊啟謨甘肅安肅道奎明浙江寧紹台道蔣全
迪河東鹽運使程國表山東糧道觀祿知府各員
內現任甘肅涼州府知府汪臯鶴廣東高州府知
府周人傑甘肅甘州府鍾賡起甘肅寧夏府張金

城

泰陵郎中觀亮署知府各員內現任江西廣信府知府康基淵甘肅秦州直隸州知州侯作吳直隸州知州各員內現任刑部員外郎覺羅彥方湖北安陸府知府姜興周甘肅鞏昌府知府宗開煌署直隸州知州各員內現任甘肅靈州知州黎珠甘肅寧夏縣知縣宋學淳等現任內二十一員章職除王廷瓚及覺羅彥方現在京中請

勅交刑部就近審訊外其在甘省各員臣等卽一面究訊至現任他省人員應令刑部行文各該省督撫委

員押解來甘質訊又丁憂事故潘時選德明奇明
黃元圮博赫郭昌泰陳之銓崧柱吳鼎新魏春年
瑞泰楊士璣李承端等十三員應請

勅交吏刑二部查明如已補官一併革職押解其已經革
職者亦行文原籍督撫派員解審卽病故各員亦
查明知照以便定案時扣除至王亶望陞任以後
各道府雖係相沿結報罪亦難辭俟臣等審明陸
續叅奏再現任甘肅道府缺出甚多除另摺奏補
外一時實無妥員委署應令被劾各員暫畱頂帶
辦事俟新任到日再行交代臣等有應行訊問事

件卽傳集究審亦無慮其彌縫掩覆

公偕李侍堯又奏言臣等查辦監糧折色收捐一

事現向按察使福寧鞏昌府知府宗開煌嚴切究
訊據福寧供開捐之始卽係折色並未交糧上倉
藩司原屬知情其實收王亶望總交蘭州府存貯
給發各州縣或多或少俱係藩司主政各省捐生
俱赴蘭報捐而各州縣亦就近在省填捐至各屬
折色銀兩並未見買補歸倉多係放銀抵糧盤查
既屬具文按季出結亦係虛應故事等語宗開煌
亦有四十一年署安西州任內敦煌玉門兩縣册

結因未曾到任盤查詳請轉限王亶望不准只得
在省城出結之供是王亶望明知各州縣係折色
收捐徒取道府一結爲異日諉卸之地據福寧供
各屬報災分數俱由藩司議定或于總督具

奏後藩司補取道結或取空白由藩司填定從未親
往勘驗卽放賑時亦從未親身監視等語其中情
弊已屬顯然且臣等檢查王亶望任內各屬報捐
實收及開銷賑卹原案卽如臯蘭一縣于乾隆四
十年捐實收四千八百張應收糧十九萬一千九
百餘石是年卽開銷賑卹糧十五萬五百餘石銀

一萬七千二百餘兩四十一年共捐實收八千張
應收糧三十二萬石是年卽開銷賑卹糧二十三
萬四千八百餘石其餘各屬雖參差不齊大約多
捐者賑卹必多其無災賑地方則報捐亦少是王
亶望發給實收之多寡竟若預知各屬被災之輕
重而定數者其爲通同侵蝕任意開銷已無疑義
至甘省上下如何舞弊分肥之處_臣等查閱王廷
瓚致福寧原札內有前任陞司于額收公倉費銀
外各屬請領實收每張議收銀一兩以給上下各
衙門吏役雜項之需等語查監生每名交公費銀

四兩以二兩解部以二兩作衙門書吏公費自五錢至二錢不等定數不爲不多乃王亶望復於此外議收雜費銀一兩是明知捐監一事弊竇多端借此取悅衆人以塞其口且王廷瓚到任後又於雜費銀一兩外每實收一張索銀一兩此衆所共知諒王廷瓚亦無從隱諱若王亶望之舞弊分肥臣等詢問福寧據供王亶望在藩司任內各屬給發實收多少由其專主報災輕重由其議定厚薄因人而施自有交通染指情事卽伊陞任後無人不知其擁厚資而去但當日如何婪需屬員如何

餽送不能指出實在憑據等語臣等伏思此事總不過首府首縣數人經手聞王亶望到任後卽稟知勒爾謹將蔣全迪奏調蘭州府知府承辦捐監事務而王亶望卽將實收交首府存貯轉發各州縣並于雜費一兩內議給首府衙門三錢是卽勾通舞弊之據且蔣全迪在蘭州府任內捐陞道員人亦有言其得厚資者該員現在浙江寧紹台道已于假捏結報案內另摺奏叅請

旨革職應一併提解至京與王亶望質訊再王亶望任內初開捐時之臯蘭縣知縣程棟現已捐陞刑部員

外郎在京供職應請

勅交畱京王大臣刑部堂官就近傳訊令其將在任時如何冒銷如何賄求各款逐一供明俟王亶望到時質對無難水落石出臣等現亦提到王亶望在任時接任臯蘭縣已陞狄道州知州陳善嚴切究訊據供王亶望聲名狼籍通省皆知有要捐的監生將監生名姓開單交給州縣令其用印填捐並不發給銀兩再四十年程棟辦理賑卹案內有運送適中給散賑糧腳價銀二千四百餘兩係我例應補領之項王亶望並未發銀等語臣等查王亶望

任內四十四一兩年所有臯蘭縣開銷此項腳價銀六千六百餘兩卽以通省均未給發而論亦不過三萬二千餘兩王宜望之貪婪當不止此然此亦侵蝕之一端其通省如何冒賑開銷之處現在設法研求俟訊得確情續卽具

奏均奏入

諭曰前以甘肅收捐監糧一案私收折色冒賑浮銷上下通同舞弊旣經發覺不可不徹底查辦因屢傳諭阿桂嚴切詳查據實叅奏今據阿桂等將折收銀兩在省包辦冒銷賑糧種種弊端已全行查出此時卽將甘省大

小各員一併革職審究亦皆罪所應得但此事總在藩司爲政其次則首道首府首縣勾通侵蝕爲弊較多此外各道府州縣雖弊實亦皆不免而此時尚未查明無庸遽行辦理所有前任蘭州府知府蔣全迪前任臯蘭縣知縣程棟自當革職拏解蘭州嚴審此外各員著交吏部查明其曾任蘭州本道首府及首縣者著卽一體革職拏解蘭州審訊其餘各道府州縣並加恩免其提訊著該部查明再降諭旨

十二日

公偕李侍堯奏言本月初五日海蘭察明亮派奮

勇官兵及屯練降番在木柵邊照常放礮打石使賊人不備午刻海蘭察明亮率同侍衛提鎮督率弁兵直至壞牆邊先將樹枝草捆隔牆撩入填滿溝壕然後拋擲火彈施放火箭引火焚燒其時賊人尚于牆邊抵死抗拒我兵站立壕邊向內鎗箭齊發勦殺甚多火勢甚熾賊人不能存住始紛紛退竄華林寺殿屋雖已擊坍尚存一角及圍牆賊人在內藏匿死守我兵一面施放鎗礮一面運送樹枝草捆及木植板片將溝內之火用土填滅直過溝壕用樹枝等物撩積寺基拋擲火彈燒起賊

人抵死衝撲數次俱被官兵鎗箭打回酉刻寺內
殘壞屋簷被燒坍塌倒賊人打死燒斃者甚多始惶
遽竄回華林寺後牆邊及兩廂房牆圈內藏匿放
鎗擲石盡力抵禦官兵正欲乘勢將燒殘木植拋
入牆圈再用樹枝草捆一併填燒令賊人不能存
立其時已至亥刻黑夜難以用力因暫將官兵撤
回初六日黎明海蘭察明亮率同彰靄泰斐英阿
福寧明山阿蘭保多爾濟色布坦海祿哈當阿三
德德寧武靈阿鄂輝阿爾都並侍衛章京帶領奮
勇屯土官兵由華林寺前撲入並預行分飭舒亮

仁和馬彪羅江鱗策布坦等各帶本卡官兵預備
賊人分竄卽協力擒剿卯刻我兵拋擲火彈鎗箭
齊發並短兵砍殺賊人竄入牆後壕內及燒燬房
基潛匿官兵緣牆而上站立牆頭向下放鎗擲石
打死壕內牆角賊匪甚多衆兵奮勇撲進擒拏剿
殺其時有賊人百餘從西邊滾下直礮我兵隨後
追殺至平坦處又有仁和馬彪等率領本卡官兵
將賊人重重圍裹在內擒殺淨盡其華林寺後躲
藏餘賊殲戮無遺共生擒賊人六十七名割獲首
級四百五十顆查逆回於光天化日之下輒敢肆

擾不法實屬神人共憤蘇四十三攻犯蘭州被官
兵擊敗後卽同衆死守華林山不復散往他處俾
我兵得以拏柵環攻盡數剿殺皆由

聖王洪福

上天眷佑而臣等奉

命督辦雖遲至三月餘將賊匪殲擒淨盡不致一名漏網

實仰仗

皇上天威得以蕆事

公偕李侍堯又奏言安定縣馬明心家屬及其心
腹徒弟並伏羌縣爲伊斂銀之新教阿渾與各逆

黨家屬業經派按察使福寧前往督率地方官按名查拏解省審辦如此間訊出各該處果有從逆回民卽行一併嚴辦至洪濟橋唐家川等處從逆回民于四月初旬自蘭州竄回被土兵勦殺及淹斃者二百餘名又陸續拏獲正法者百餘名隨賊打仗傷斃者三百餘名現在該數處所存新教餘黨諒已無多此外不過查拏各該犯緣坐家屬亦屬易辦臣等已提到該處烟戶冊挨查並檄調河州知州謝桓至省面詢情形仍向現拏各逆犯嚴切跟究實力妥辦總之搜捕逆黨務期淨盡根株

必不使復畱餘孽

公偕李侍堯又奏言賊匪肆逆以來所有從賊各犯省城正法二十名河州西寧二處正法五十七名業經具奏在案嗣省城盤獲從賊各犯及由河州循化等處提解至省審明應正法人犯二十六名又循化廳文武員弁帶領老教土兵陸續搜獲新教逆犯及婦女幼孩共三十四名俱經分別核辦內韓阿渾卽馬六十七一名前據省城拏獲賊匪供稱該犯蘇四十三帶領賊人分路滋擾一至河州一至循化蘇四十三困守華林山尚望其救

援等語嗣據舊教土司拏獲解省臣等嚴切研鞫據該犯供三月間起事時蘇四十三令其糾約各莊未到新教隨後接濟該犯糾約三百餘人尚未齊全卽被循化官兵帶同舊教土兵衝殺擒拏該犯藏匿山中幾及三月始被搜拏等語是賊匪所供分路滋擾事屬有因且聞該犯在撒拉爾地方爲新教衆回所奉信與蘇四十三相同其賊人未到河州以前謀逆起釁各情節可以向其跟究應解送

行在辦理其餘各犯業已隨時正法至現在省城及各處

監禁之逆賊婦女幼孩二百十五名口除蘇四十
三韓一提巴拉家屬十一名口業經正法外餘俟
遵

旨分別發遣均奏入

諭曰此次勦捕逆回雖因其死守抗拒遲至三月有餘始
行殲滅然使賊於一月前衝突而逃勦捕正自費力今
乃佔聚華林山寺俾官兵得以全數殲擒竟無一名漏
網此實仰賴

上
上
嘉祐朕愉快之餘惟益深虔畏耳至阿桂等所稱馬
明心家屬徒第并伏羌縣斂銀之新教阿渾與各逆黨

家屬已委按察使福寧前往查辦等語所奏甚是此等從逆回民露有形跡証據者必須全行搜查不可稍存將就了事之見至省城及循化河州等處監禁逆犯之婦女幼孩人數甚多著阿桂等查明將應發烟瘴者卽行分別發遣毋令久稽監獄

恭錄

御製詩

阿桂奏報淨剿番回信至詩以誌事

賊首雖陣斬餘黨十遺四乃竟弗出降死守華林寺釜底困仍鬪延廿日弗潰邪教固人心亦誠大奇事築柵近逼

之火攻下策試縱拚命跳跟圍戮無噍類剿回續斯葳飛

章馳信至賊首蘇四十三先于六月十五日經阿桂令海

取首逆蘇四十三等首級其餘黨四百餘人尚死守華林

寺思欲乘隙突圍竄逸茲阿桂奏報於七月初六日海蘭

察明亮率同侍衛官兵等由華林寺撲入重重圍裏拋擲

火彈鎗箭齊施短兵砍殺生擒賊六十七名割獲首級四

百五十顆寺內躲藏餘賊殲因思一月前賊或紛迸避爾

戮無遺不致一名漏網等語因思一月前賊或紛迸避爾

時圖未週使賊於一月前未立木柵時衝突而逃追捕正

自蘭州被官兵擊退後即死守華林山俾我兵得擊烏散

柵環攻盡數剿殺不畱遺孽實感上蒼恩施也

羅致知不足為患當更延久滯負隅待盡殲誠感

天所賜然世有逆民即為君德累教化所未孚言及惟抱

卷之三十一

七

公又奏言查辦理賊匪餘黨一事其洪濟橋唐家川等處從逆回民陸續搜捕勦殺已有五百餘名縱有餘孽已屬無多至安定伏羌等處亦無需帶兵搜捕毋庸海蘭察等在此幫辦臣卽令明亮先行馳赴

行在海蘭察額森特舒亮隨後亦卽帶領侍衛官員起程再土司楊宗業番兵一千二百名及保安土兵一百名俱於六月二十三等日飭令分起回伊番地訖又西安先撤回滿兵一千名寧夏先撤回滿兵五百名亦於七月初一等日分起自蘭州起程其

聞

西安副都統薩炳阿卽令帶兵回陝奏入報

二十日

公偕李侍堯奏言官兵于本月初六日殲滅逆回將割獲首級令前此被擒現尚監禁之韓三十九卽韓阿澤及馬六十七逐一辨認據認出頭人馬作南馬三十五首級卽于蘭州各門懸掛號令至生擒賊人內有馬良海受傷甚重於拏獲後斃命亦卽梟取首級懸示訖其唐宗第等六犯傷重垂斃不能取供當卽先行正法尚餘賊犯大小六十

名臣等詳細研鞫雖無緊要頭目在內擇其人稍明白于蘇四十三起事及盤踞華林山始終抗拒官兵情形畧爲知悉可備訊問且傷痕尚輕不妨起解者馬達烏特韓四個韓三個三名同韓阿渾卽馬六十七蕭得福共五名交待衛泰斐英阿福寧阿爾都管押于本月十二日自蘭州起程解送行在審辦此外傷重賊犯二十五名于取供後先行正法傷輕之三十一名于十二日致祭陣亡將士時正法同陸續正法之前次拏獲賊犯韓三十九一名又馬牢沙等六名及閏五月十九日官兵拏柵圍

攻後節次自賊營投出之老教二十名一併開單
進

呈奏入報

聞

二十二日

諭曰甘省監糧一案據阿桂等查奏開例之始全係私收
折色並無實貯在倉而從前袁守侗阿揚阿欽差前往
盤查據稱倉糧係屬實貯其言殊難憑信該省監糧既
未買補則倉儲焉能足數此必當日地方官一聞查倉
之信挪東掩西爲一時彌縫之計其簽量人役均係該

地方官所管易於通同弊混而袁守侗等受其欺蔽率稱並無虧短亦未可定當日州縣各官現在甘省者無難訊究得實著傳諭阿桂等卽行確切訊究令將袁守侗等往查時該員等如何挪移掩飾其人役等如何通同弊混之處訊取確供據實覆奏

二十四日

諭曰據韓鏞富勒渾奏黃河北岸孔家莊一帶漫口現在會勘籌辦情形一摺已於摺內詳悉批示矣據稱關家莊朱家廠二處業已堵築斷流牛家場一處亦可尅日完竣惟有青龍岡大李家莊及孔家莊三處灘勢最低

河水涯注仍與灘平灘面俱係新淤現在於關家莊一帶設法墊路作子埝以禦漫水並可乘時趕運料物一俟新淤可以駐足卽趕緊次第興工等語此次漫工關係運河緊要不比往常昭陽微山等湖經黃水淹灌湖身淤墊將來難以容納清水爲濟運之地此等湖面寬濶又非尋常支河曲港可以人力挑濬者比是否應用混江龍刷泥之法俾湖底淤泥浮活清水逐漸汕刷湖身得以復舊收水濟運似亦補偏救弊之一端阿桂久經督辦河務於全河形勢及堵築宣洩各事宜最爲熟諳且現在豫工不可無明練有識見之人爲之主持指

示阿桂此時查辦監糧冒賑一案已辦有頭緒將來全案完畢來京復命時即可順道就近先往豫東二省查看若已隄工合龍可以不必前去亦卽有旨迎往所有韓鏞國泰等前後奏到各摺及屢次所降諭旨並御製河工誌事詩一首一併抄寄阿桂閱看令其詳悉熟籌據實具奏

恭錄

御製詩

河東總督韓鏞奏報儀封十堡漫口奪溜詩以誌事
江南報漫隄邳睢魏家莊河南報漫隄南岸焦橋旁一甚

已致再厯念為徬徨那堪茲北岸奪溜洪波汪先是據薩

奏鄧睢南岸魏家莊大隄於六月初一日漫溢過隄水勢載李奉翰

甚汹湧嗣據韓鏞奏河南祥符南岸焦橋一帶漫水過隄旋即捨護斷流茲復據韓鏞奏儀封北岸曲家樓漫溢至

七月十三日因東南風大溜勢全歸孔家莊下注曲家樓勢甚湍急口門約寬百餘丈擬於外灘臨黃處

所堵築現在飭屬購料撥夫趕緊施工等語北岸近運

河其害不可量覽圖幸散漫獨衝勢難當北岸曲家樓漫

曹州歸趙王河至張秋西股由曹縣金鄉魚臺至南陽湖下注俱逼近運河雖幸而水勢散漫尚非獨流成河頂衝

可比然經過諸處必致淤墊後慮正殷耳然必淤諸河後慮正未央陰金生水

診調燮慚乖常北洩南勢徐邳睢或少康急則治其標調遣資南方

孔家莊上游漫口則江南魏家莊轉易竣事因飭河標副將李永吉帶領熟諳備弁樁埽兵丁

迅即赴豫幫辦并合李奉翰與薩載察看情形如魏家莊水勢平緩即令李奉翰星馳來豫會同督辦今據薩載奏

可文茂公手會

巳

連日黃水陡落二三尺濶勢平緩壩下已有停沙乘此進
 掃廂築施工較易此即曲家樓奪濶自必因江南河流致
 也網惟亟救災黎賑卹命安詳各該處漫水經過被淹民田
 實力查勘加意撫恤韓錄所奏
 母使災黎一夫失所於外灘築
 壩以冀漫口斷流河歸夙夜以憂心民艱愍南望
 故道所辦煩中竅要

公偕李侍堯奏言臣等查辦監糧一案將捏報災

賑之道府州縣通行查核自乾隆四十年起至四
 十五年止假捏結報之道府直隸州共五十三員
 各州縣內未捐監辦災者祇有十六員其止捐監
 而未辦災者四十六員捐監報災者一百十二員
 其收捐監生自數百名至數千名不等開銷賑恤

糧數自數千石至數萬石不等臣等連日將現在
省城各員嚴切訊問據供餽送上司代辦物件往
來支應捐修工程日用花銷各款大概相同伏查
各省報災皆由災民呈訴地方官勘報後又經府
道等逐層查勘始具報成災分數甘省則一屆夏
秋各屬紛紛具報而其准否輕重則總督與藩司
面爲商定厚薄因人而施多寡惟意所欲除首縣
供應各上司每年俱准多開外其他或藉口衝途
差務之賠墊則浮冒亦多至地居偏僻缺亦不甚
清苦如狄道河州等處而多開賑糧者大抵皆善

於逢迎及加意餽送之人藩司多給實收非酬其
素日之殷勤卽冀其將來之答報捐監旣多不得
不重報災賑以開銷總之通省大小各員聯爲一
氣冒賑分肥遂至積成弊藪牢不可破在各州縣
旣藉冒賑爲侵漁之地勢不得不稍爲給散及冬
間捐辦煮粥施衣等事以掩人耳目邊地窮民本
無必欲報災之念轉得年年食賑並可邀

恩蠲緩亦所樂從是以歷年以來並無出而控告此皆實
在情形也雖現在各員所供尚有不實不盡之處
而其浮冒侵漁情弊業已水落石出無難定案再

此等劣員慙不畏法爲天理所不容在我

皇上所以嚴行窮究止欲剔除官吏積弊使百姓實受賑恤之意原非靳惜監糧爲若輩所花銷而

國家數百萬帑糧亦不可懸宕無著况此等貪黷之吏卽將家產查抄入官亦不足抵其浮冒之數豈可使尚擁厚貲是以陸瑋鄭陳善楊惠言蔣重熹四員臣等接奉革職拏問

諭旨卽一面將伊等任所資財查封備抵並行知前任蘭州府知府蔣全迪原籍任所督撫一併查抄至道員劉光昱任所貲財亦已查封存記以備分賠其

附方公全言卷二十一
三
已離任而尚在甘省之陳鴻文等十一員臣等另行查辦外其原籍並查明移咨辦理至已離甘省各員凡冒銷賑糧者應請

旨交吏部查明各該員旗籍及現任處所

勅交留京王大臣及各督撫按名查封毋令隱匿寄頓並卽轉飭訊問各該員令其逐一供認如已得實卽可定擬具奏如或狡飾卽派員解甘質審歸案辦理其在甘各員因一時乏人委署暫緩叅革查封俟揀發人員到甘亦卽分別查辦奏入

諭曰甘省大小各員將災賑監糧侵吞舞弊上下聯爲一

氣茲阿桂等在甘查辦其積弊始得盡破現在阿桂等
屢次查奏俱已得實朕向有句云不爲已甚去已甚今
甘省積弊竟至已甚不可因罰不及衆仍存姑息朕實
無可如何矣所有捏報各道府直隸州知州內除按察
使福寧首先供出且經手事件較多暫行畱任外其現
在甘省道員奎明文德王曾翼永齡四員現任甘省各
知府及署任知府宗開煌彭永年彭時清鍾賡起汪臯
鶴張金城郭燹李本楠又現任甘省直隸州及署任知
府侯作吳黎珠趙明旭興德謝桓宋學淳董熙厲學沂
俟簡放分發人員到甘卽著阿桂等傳旨將該員等一



ZW

21101000765620

S

K82-64

17(102)

陝西通志卷二十一

三

併革職歸案審辦其離甘省各員現任鹽運使程國表
 原任布政使福明安現任道員觀祿前任甘肅知府及
 現任知府潘時選董元圮周人傑諾明阿富斌德明郭
 昌泰觀亮前任甘肅直隸州知州及署知縣博赫彥方
 奇明姜興周朱蘭王汝地各員又在京供認捏災冒賑
 及饋送王亶望銀兩之前任武威縣知縣朱家慶一員
 俱著革職交畱京辦事王大臣及任所原籍各督撫將
 該員提訊錄取確供具奏

